

嘉興府志

ル 5
1574
27



凡品
1674
卷 27

嘉善縣志卷之五十四

列傳

嘉善縣

明

孫詢字廷言博學多才宣德初舉嘉善縣人
徵於時鳴鑼發難府憲與是然詢以
對然自檢入宣士或歸來以定
嘉善縣志卷之五十四

嘉興府知府善化許瑤光重輯

列傳

嘉善縣

明

孫詢字廷言博學多才宣德初應賢良詔為廣西布政司

檢校時峒蠻竊發無甯歲安遠侯柳溥擬詢往諭之詢

毅然冒險入宣上威德事以定陞分宜縣丞歲祲平量

衡去冗費設法賑濟全活甚眾尋以疾致仕所著有忠

孝廉節武塘覽勝諸書孫璧字拱樞官景州訓導亦善

詩文

嘉善倪志
參于志

俞綱字宗正寓籍上元為諸生改隸順天舉修宣廟實錄
 歷中書郎王受封簡輔導詔綱侍講歷陞太子少保兼
 兵部侍郎改南京禮部成化二年致仕十四年卒賜祭
 葬綱和厚縝密謹身率職稱為長厚君子王世貞言綱
 入內閣不由翰林且係乙科亦本朝異數然考綱當日
 被命即辭實未嘗入閣也嘉禾徵
獻錄
 施奇字廷偉少好學寒暑不輟登景泰甲戌進士授工部
 主事奉使山後諸鎮閱視兵若邊將餽遺悉卻之尋復
 清匠江西至建德鄉人有官縣幕者以白金餽奇駭曰

是安得此若執汝是賣廉矣亟去鄉人慙而退擢知太

平府改知萊州卒

分省人
物考

劉侃字克剛景泰初領鄉薦選知涇州政尚寬簡朔方歲
 事征討涇當要衝大將提兵必道涇侃措置有方雖供
 億百出民不擾都御史馬文升嘉其績與御史劉廷高
 交章論薦擢守延平同知某恃才凌轢侃置弗較未幾
 沒撫恤其家時稱長者侃素廉約兩赴官皆鬻產以行
 及歸囊篋蕭然授徒自給足不入城市號樂閑翁工楷
 書詩文亦清麗卒年七十

楊霖字時望祖嗣宗洪武中以人才徵試工部主事霖自

少以氣節自負聞四明楊守陳遂易學負笈從之遊天

順中貢領應天鄉薦知玉田改任寶坻抑強扶弱清白

自守有古循吏風

以上嘉禾
徵獻錄

夏勛字汝建知內邱縣歲飢蠲民租仍出粟賑之全活甚

衆勛爲人疎簡持大體不屑屑細故逮居官持法不撓

除奸去盜境內肅然

高第字士元以貢授永福知縣先是縣被兵荒民多流亡

第至廣招撫給田開墾民復故業

周紀字廷理以進士授豐城令縣多淫祀有曰官將軍者

尤惑人紀下車立毀之人服其正

以上袁志參嘉
善倪志于志

任泰字亨伯成化乙未進士授上饒令時婁諒稱名儒屈

體事之爲政知大體增置學舍親爲講授立法清丈田

畝以杜爭訟作浮梁增社倉凡有利于民者行之不遺

餘力孫夔字公職爲新野王府教授王年少夔以輔導

自任進講輒以前代賢王事條析陳之夔事母孝父遺

產悉讓諸弟弟芹爲蕪湖訓導醕厚簡默不苟言笑里

人稱任氏世德云

嘉禾徵
獻錄

王琳字廷佩登進士爲兵科給事中彈劾不避權豪尋陞

福建右參議招撫永安頑民八百戶清廢稅千餘石轉

貴州參政卒

嘉善
倪志

王相字廷輔以貢拜蘄水丞邑田無經界多為巨室兼并相至首正之濬畝澮以興水利御史上其事特加旌異尋移疾歸

嘉善志

於珥字文瑞以進士知南皮縣遷吳橋丁外艱服闋改知無極皆有能聲擢建甯府同知革清軍紙價黜貪令衛有屯田久侵于民軍多逃亡凡五奏不得白珥按籍悉還之軍乃歸伍正德初擢知慶遠府土酋缺貢賦例出金昭守珥以其物充逋夷大感悅郡人不知學立程式以課文教大興

嘉禾徵獻錄

卞謙字信之父翻家貧客同里有女窺之辭去為諸生不

仕謙宏治壬戌進士授廣信府推官決獄精允雖老吏不逮嘗經鉛山嶺道有臥屍忽夜夢一人曰我傭者為主所殺密訪其人得之竟抵罪郡有巨室殺人匿屍燕室中謙廉其處發屍驗之遂伏辜其發奸摘伏類如此嘗謂姑息所以養盜乃嚴鉤捕得宿盜重治之盜乃止三載行取道卒兄子玉有至性母病籲天願代為廣東海陽教諭子錫負異才篤學登嘉靖丙辰進士官司勳時嚴嵩柄政不為屈又嘗卻齷賈賂時論重之

嘉禾徵獻錄參

嘉善志

王俸字廉父嘉靖壬戌進士授職方從尚書劉燾征曾一

本燾欲誅老帥王詔俸力爲解釋後竟用詔擒酋首以獻歷武選郎以議馬市忤高拱張居正而拱又秉銓遂出爲永州守庭無滯獄乞終養歸服除拱居正先後敗起廬州知府累陞湖廣道御史以疾乞休居家好施予宗黨賴之

沈科字子進嘉靖甲辰進士授工部營繕司主事庚戌邊烽直薄都下軍務久弛猝不能辦車牛科旦夕支給數日而畢飛輓旁午賴以濟知臨江府遷江贛兵備副使平劇賊李文標等時官江右者皆嚴嵩私人聞科才陰令人諷之科正色曰科卽不才柰何以天子臣爲相公

奴隸嵩銜之未幾轉苑馬寺卿左遷河南副使有欲爲

科謀解於嵩者科聞而謝之卒不聽甫之官嵩嗾言官劾罷之科事親孝撫其弟友愛生平磊落多大節嗜學能文著有史抄二十卷

以上嘉禾徵獻錄

盛唐字元陶嘉靖戊戌進士初授江西吉安府推官每讞獄摘發幽隱爰書成已手吏胥不能爲奸入爲湖廣道御史時重建太廟有希上意者奏當倣周制七廟以憲宗爲祖興獻帝爲考唐極言其非疏入世宗震怒覽其疏擲地者三浹旬後得旨罰俸邪議遂寢巡按陝西以劾仇鸞降湖廣布政司照磨陞國子監博士累陞湖廣

副使

分省人物考參
嘉禾徵獻錄

錢貞字子元博學積行嘉靖丁酉順天鄉薦授福建尤溪令操守峻潔愛民好士陞汝甯府同知悉心佐政保民如赤子代去百姓攀援不忍舍夾轂焚香追送數十里而後返以入覲卒于京師汝人聞之為之巷哭著有實政錄其在信陽捐俸薪以完逋賦西平則均馬政以省夫役確山則修庠校祀呂先生于鄉賢皆政之卓卓者嘗修尤溪志詳于土田戶口賦役尤人德之立碑祀名

宦

兩浙名賢錄
參嘉善楊志

陸瑯字秀卿嘉靖丙戌進士初任南刑部嚴嵩方為翰林

求訂交拒不納嚴令人私詢其意瑯曰此人雖有時名實奸雄也嵩銜之歷任兵部武庫出知武昌徙岳州在任崇節儉寬逋息訟措牛種開荒蕪歲飢竭倉以賑活飢民數百萬時嵩已柄政銜前事十年不調御史伊毓生巡歷至岳瑯供奉甚薄伊怒直入其署惟老蒼頭二人做筐無鎖檢之殘書百帙布衣數事而已特疏薦陞京堂瑯至都不謁嵩嵩遣人諷之瑯曰受職天朝拜恩私第賢者不為況未受官而先謁權貴乎卒不往陞太僕少卿轉光祿正卿以僉都御史撫河南乞歸

錢于鄰字德卿嘉靖丙辰進士授邵武知縣歷官四川按

察司僉事性儉樸絕無宦情孤立行意而已

以上嘉禾徵獻錄

丁賓字禮原隆慶五年進士授句容知縣徵授御史大學士張居正賓座主也誣劉臺以賊屬賓往遼東按之賓力辭忤居正意去官萬曆十九年用薦起故官累遷南京右僉都御史兼督操江江防多懈賓率將校乘一舟往來周視增守兵戍要害部內晏然南衛世職率赴京師請襲留滯不得官賓請就南勘襲妖民劉天緒左道事覺兵部尚書孫鑛欲窮治之詔下法司訊鞫賓兼攝刑部大理事力平反論七人死餘皆獲釋召拜工部侍郎尋擢南京工部尚書自上元至丹陽道路盡易以石

行旅頌之數引年乞罷光宗立始予致仕賓官南都三十年每遇旱潦輒請賑貸時出家財佐之初以御史家居及丁憂歸連三年大飢咸捐資以賑至天啟五年復捐粟三千石賑貧民以資三千金代下戶之不能輸賦者撫按錄上其先後事時已加太子少保詔進太子太保旌其門以年高三被存問卒年九十一諡清惠

明史

朱鳳字文瑞貢生為邵武教授郡有淫祠賽祭無虛日鳳往以杖擊之像自塌壞二子賢愚賢字汝賢以貢官沔陽學正戶部蕭某從賢受經讞獄至浙有大姓坐法論死用賄乞求未減賢卻之愚字汝明負氣節會上書規

郭縣令郭謝過表其書于門以示悔任松江府訓導嘉禾

徵獻錄

孫朝宗字賓江至孝事父百歲翁嵐及母鍾依依孺慕寢食未嘗不在側伯兄朝宰病瘵早世哭之慟啟其衾同臥曰今而後不復與兄同此被也隆慶丁卯鄉薦授福建順昌令歲大祲捐俸易家產佐賑全活數萬邑設關舊有私稅請除之沒祀名宦錢士升為立傳嘉善楊志
錢吾德字湛如食貧力學萬歷初禾郡推三名家一為袁了凡一為馮具區一即吾德時人咸以公輔期之庚午舉于鄉秉鐸莒上擢遷安令多惠政邑為闢藪槩不與

通補泰甯令益砥清白有置黃金于茗器以饋者密封

還之民苦逋賦為核產分戶均役平輸邑產斷腸草民有憤鬪輒輕生食之吾德令犯法者拾草多寡以贖罪重輕期年根芟盡絕移守甯州大水矯檄發賑居官不潤脂膏居家不問生產凡焚券裂責助婚助葬皆歡喜為之子繼登有傳次子繼振鄉貢不仕以孝友聞繼章

崇禎丙午舉人嘉禾徵獻錄

毛汝賢字見吾嘉靖丙辰進士授鳳陽府推官累陞郎中降南禮部員外遷大名兵備副使汝賢性坦夷不留宿忿其調禮部以御史周宏祖劾之故論降及在大名宏

祖適為屬吏于公事無纖介嫌宏祖亦詳其行事大愧

服焉

嘉禾徵獻錄

朱廷益字汝虞萬歷丁丑進士為漳浦令歲比不登捐俸賑飢全活甚眾補令嘉定時苦漕兌請于大司農改折二十萬石歲省民財以五萬計奏最得南儀部遷考功擢僉事督江西學政屏絕干謁益王餽古琴受而檄諸學宮曰此琴貯文廟以彰賢王崇儒雅意翌日王以妃弟囑廷益謝曰校閱時何由私識執法所以敬王也發卷置劣等擢南通政司參議

馮夢禎行略

支大綸字心易萬歷甲戌進士試政西曹時江陵秉政進

白燕紅蓮以為瑞綸言於朝曰大臣不宜稱祥瑞啟侈

心遷泉州司理時侍郎洪朝選失江陵意欲中以法乃為書具陳天道人事不宜枉殺大臣以媚人江陵益噤之遂罷官又七年推補江西藩幕遷奉新令復與上官不協掉首而還卒門人私諡文介先生著有嘉隆編年

史華平集行于世子如玉有傳

橋李詩繫

王慎德字允明萬歷庚辰進士知萬安縣力鋤豪強有能聲行取廣東道御史出按廣東復按四川與討平楊應龍之亂上功將遷值竝封事起疏請建儲甚力忤旨罷光廟立追贈光祿寺少卿

葉繼美字含章萬厯癸未進士知金溪縣清寃滯丁憂補蕪湖擢刑科給事中彈劾不避當路請建儲停礦稅及疏救王錫爵高攀龍甚力出典湖廣鄉試累進吏科都給事中以疏阻東事削籍後東事敗一如繼美言終不得申理子培恕字行可崇禎甲戌進士知崑山縣考察降福建按察司照磨不赴歸

以上嘉禾徵獻錄

袁黃初名表字坤儀仁子黃少負異才于三乘四部星雜諸書無不研究萬厯丁丑會試擬第一以策忤主試被落後改名黃至丙戌始第授寶坻知縣邑諸役倍于田賦車運皇木爲甚黃請由會通河運入移皇木廠於三

賢祠北使濱水受木便臺使爲奏報可因盡革重夫重馬採石及箭手諸役邑田窪下比歲大潦黃浚治三仝河築隄捍之海水時溢入爲患令海岸多植柳高數尺潮退沙遇柳卽淤漸成隄因于隄內地開溝墜課耕種曠土大闢遷兵部職方司主事適倭侵朝鮮朝廷大舉東征經略薊遼宋應昌請黃贊畫與劉黃裳浮海渡鴨綠江調護諸師提督李如松築鷲自恣黃數其罪大恨與黃裳比而構之未發如松大敗于碧蹄館兵部尙書石星意主款黃亦以將驕兵罷上書于星未幾而如松以十罪列黃黃遂以京察免歸熹宗立吏部尙書趙南

星追敘東征功贈尚寶司少卿子儼字若思天啟乙丑
 進士授高要知縣悉心籌畫興革甚多雨潦驟漲城中
 水深三尺儼走暑雨中竭力掇援治苦蓋作粥糜倚工
 撈溺斂瘞浮骸入秋淫霖不止米價騰踴細查貧戶而
 親給之以勞瘁嘔血猶親民事遂不起士民市唁巷哭
 如喪所生吳江志參嘉禾徵獻錄

錢承統字道光少孤事兄以禮從杜偉講學松陵獲聞羅
 念庵主靜之旨製一木榻晝夜危坐其中刻苦提撕後
 漸進平實嘉善章志

丁寅字直原幼敏嗜學入北雍無所遇遂屏舉子業遊王

畿唐樞之門講身心實學事母盡孝敝衣蔬食人稱爲

篤行云袁志

曹津字元會諸生以貢歷南安府教授課士有程調貧生
 卻贈賄秋毫無所苟著周禮集傳嘉善楊志

陳于王字用賓萬歷丙戌進士授魏縣父憂服闋補句容
 甫下車申飭保甲法奸宄屏息凡徵收節縮必殫思斟
 酌據道理遠近立爲限嚴胥吏出入防其侵擾聽訟多
 以理論令兩造自釋遷刑部主事士民擁道遮留若失
 慈父母于王以祖母年九十告改南兵部督龍江關稅
 中官在南者亦設科稅于儀真撓于王權于王曰該監

不得侵本部職重困商民有假中旨橫索者以法從事
 遂止不復稅調吏部陞湖廣按察司副使兵備武昌值
 淫雨漢水暴溢穀騰貴羣盜並起山谷深僻有數大姓
 實為盜首于王練兵按甲弗動檄諭何陳徐譚等十二
 姓反覆開導于是縛其渠魁以獻盜悉平尋陞四川按
 察使未蒞事歸逾年改推福建命下以疾卒子山毓龍
 正有傳

沈道原號淮槎科子萬歷乙未進士授樂安令以病歸樂
 安士民挽留甚切改松江教授陞國學尋轉工部主事
 歷改吏部道原在松江知青浦知縣某貪墨無狀及司

察遂斥之青浦民咸以為快調文選司以病告歸道原
 業可自給入官後中落人稱其清操以上嘉禾徵獻錄

馮盛典字桂海萬歷辛丑進士授刑曹出守歸德遷兩淮
 運使與巡鹽爭禮至上聞詔令抗禮累遷河南布政使
 謝政歸莊則孝字翼庵戊戌會試辛丑廷試授福建興
 化推官平反無疑獄陞禮部主客郎乞歸行李蕭然沒
 祀鄉賢沈萬鈞字玉臺鄉薦後力學著書有詩經類考

傳世嘉善楊志

曹穗字泰字家貧事父極孝養撫幼弟以恩婚喪之儀必
 式於古祭必齋器物必夙戒覃思性理河洛之言期月

間鬚髮為白執經者甚眾魏忠節大中出其門生平無疾行無情容無諱語無違心之言無欺人之事子勳有

傳嘉善章志

夏九鼎字台卿少從顧憲成學萬厯間鄉薦北上憲成屬其請益於李材時材官兵部侍郎誣下獄九鼎從獄中受講登進士即抗疏白其冤釋褐疏爭三王並封事艱歸補新喻令調安福皆清操自勵多政績上計卒於道貧不能殮生平秉禮蹈義畫所為夕必書之任安福時莫敢干以私人稱為夏鐵耳袁志參西江志

錢天允字延之萬厯辛丑進士知攸縣勤慎樸素革除羨

餘贖鍰豪猾望風束手毀諸淫祠尤詳慎刑獄民無冤濫入為工部都水司主事進兵部郎中卒祀鄉賢嘉禾徵獻錄

毛尚忠字誠庵萬厯甲辰進士厯海澄棗強令皆有治績陞工部主事杜絕中貴人請託光宗在東宮異之書承恩堂額以賜遷雲南僉事弟尚質尚文尚質字素庵狷介重然諾尚忠卒子幼尚質撫育遺孤辛勤備至尚文字郁庵以鄉貢為新昌訓導一作餘姚巡按以其才檄令查盤一郡庫藏積弊釐剔殆盡遷紹興府教授嘉禾徵獻錄參吳志計元勳號明葵萬厯丁未進士由南銓部郎出為山東參

政分巡濟南東省謀建逆璫生祠遂挂冠歸爲人敦慤
有古風宦轍所至咸著清節居家杜跡城市鄉黨推爲

祭酒

嘉禾徵
獻錄

蔣英號吧瞻萬厯庚戌進士初令松溪調漳浦服闋補宜
興爲江南劇邑賦煩民困英愛民執法薪米之需咸取
給於家厯遷南刑禮二部主事旋改南驗封司郎中轉
福建副使未之官時璫逆勢焰已極英與周宗建爲姻
家因于推升疏內批蔣英依傍門戶著革職忠賢敗以
故官分巡蘇松坐事貶秩未行而宜興民變上官以英
先治宜興得民心檄之撫治單騎往諭法豪家僮客數

人令亂民自獻其首惡亂遂定宜興故多豪家修撰陳

于泰編修陳于鼎兄弟尤橫遂激民變執兵鼓譟勢洶
洶賴英事旋定而周延儒方枋國與陳氏有連銜英再

貶兩秩遂歸

嘉禾徵獻
錄參明史

錢士升字抑之萬厯四十四年殿試第一授修撰天啟初
以養母乞歸進左中允不赴高邑趙南星同里魏大中
受璫禍及萬燦杖死追贓皆力爲營護破產助之起少
詹事掌南京翰林院卽謝病歸後起南京禮部右侍郎
署尙書事祭告鳳陽陵寢疏陳戶口流亡之狀甚悉拜
禮部尙書兼東閣大學士入朝請停事例罷鼓鑄嚴贓

吏之誅止遣官督催新舊餉第責成於撫按帝悉從之
帝操切溫體仁以刻薄佐之士升因撰四箴以獻大指
謂寬以御衆簡以臨下虛以宅心平以出政其言深中
時病帝雖優旨報聞意殊不懌也無何武生李璉請括
江南富戶報名輸官行首實籍沒之法士升擬旨下刑
部提問帝不許體仁遂改輕擬士升曰此亂本也當以
去就爭之乃疏言自陳啟新言事擢置省闈比來借端
倖進者實繁有徒然未有誕肆如璉者也郡邑有富家
固貧民衣食之源也地方水旱有司令出錢粟均糶濟
飢一遇寇警令助城堡守禦富家未嘗無益於國周禮

荒政十二保富居一今以兵荒歸罪於富家朕削議括
其財而籍沒之此秦皇不行於巴清漢武不行於卜式
者而欲行於聖明之世乎今秦晉楚豫已無甯宇獨江
南數郡稍安此議一倡無賴亡命相率而與富家爲難
不驅天下之民胥爲流寇不止或疑此輩乃流寇心腹
倡橫議以搖人心豈直借端倖進已哉疏入而璉已下
法司提問帝報曰卽欲沽名前疏已足致之毋庸汲汲
前疏謂四箴也士升惶懼引罪乞休帝卽許之弟士晉
由進士除刑部主事崇禎時以山東右布政擢雲南巡
撫築師宗新化六城濬金針白沙等河平土官岑儂兩

姓之亂頗著勞績已而經歷吳鯤化許其營賄體仁卽擬嚴旨欲因弟以逐其兄命下而士晉已卒事乃已明史

錢棡字去非原名格士升子少從婦翁吳兵部志遠講求性命之旨崇禎庚午漳浦黃道周典浙試得其牘謂必老師宿儒置第八及謁見年僅弱冠黃益嘆賞為人厚重寡言不妄交與鄉舉後益刻勵學問道周以言事下獄棡納橐餽不避險難後講學杭之大滌山棡病起寒裳往從竟中風露卒年三十三道周呼其名而慟之曰

吾道無傳矣

姜採撰墓志

錢棟字仲馭士升仲子崇禎丁丑進士授南職方轉郎中

察軍政剔夙弊中涓欲有所撓糾之不少枉南都稱健

決郎遷廣東僉事請終養棟伉爽豪邁其天性而言呐呐如不出口至於處大事決大疑臨大節雖古剛介大臣不是過甲申都城陷棟方病嘔血聞北耗糾兵勤王慷慨誓師聞者感激泣下一切糧餉皆破產爲之乙酉八月殉節震澤生平博綜正史兼採漢魏六朝諸名家皆有成編尤好爲書夏夏去陳論者方之李長吉所著有少司馬新艸儒園文部

余懷撰傳參樵李詩繫

錢梅字彥林士晉子崇禎癸酉舉人兵部職方司郎中國破死梅子默字不識崇禎癸未進士知嘉定縣鼎革後

不知所終或言其為僧名成回卒於越之顯聖寺有吹

簫草嘉禾徵
獻錄

錢繼登字龍門萬曆丙辰進士授刑部主事有珠商與大

璫乾沒帑金鞠訊不少貸轉郎中摘猾胥奸弊守饒州

修復芝山書院與諸生講學陞蘇松副使謫歸崇禎末

起江防都御史未赴淮揚失守歸卒年八十餘著壑專

堂集東臯問耕錄易窺南華拈笑孫武子釋等書弟繼

振繼章有傳吳志參嘉
禾徵獻錄

周宗文號開鴻萬曆丙辰進士令清江築隄以捍章貢諸

水邑多盜廉得為首者捕斬之黨悉散行取貴州道御

史時廣甯失守疏糾兵部尚書張鶴鳴緩師玩寇請明

正國典以儆後人京師大雨雹疏請扶陽抑陰時宦寺

專寵惓惓以君子小人消長為言不報值三案會議宗

文持論侃侃大璫銜之幾及禍以艱歸起尙寶卿請卹

死節諸臣糾李承祚等附璫之罪引疾歸再起光祿推

京尹為柄國者所抑解綬歸弟丕顯字知徵天啟辛酉

舉人時若有朗悟甲申三月忽呼同年曹勳陳龍正及

兄宗文謂之曰國家有大故期且不遠余死不及見諸

君好為之有頃捉鼻而逝後十餘日國破如其言嘉禾
徵獻錄

魏大中字孔時自爲諸生讀書砥行從高攀龍受業家酷貧意豁如也舉於鄉家人易新衣冠怒而毀之萬曆四十四年進士官行人天啟元年擢工科給事中楊鎬李如楨旣論大辟以僉都御史王德完言大學士韓爌遽擬旨減死大中憤抗疏力爭詆德完語并侵熿帝爲詰責大中御史周宗建徐揚先張捷徐景濂溫臬謨給事中朱欽相右德完交章論大中久而後定明年偕同官周朝瑞等兩疏劾大學士沈淮語侵魏進忠客氏及議紅丸事力請誅方從哲崔文昇李可灼且追論鄭國泰傾害東宮罪持議峻切大爲邪黨所仄目太常少卿王

紹徽素與東林爲難營求巡撫大中惡其人特疏請斥

紹徽紹徽卒自引去再遷禮科給事中是時恤典冒濫每大臣卒其子弟夤緣要路以請無不如志大中一切裁以典制遷吏科都給事中大中居官不以家自隨二蒼頭給爨而已入朝則鍵其戶寂無一人有外吏以苞苴至舉發之自是無敢及大中門者吏部尙書趙南星知其賢事多咨訪朝士不能得南星意率怨大中而是時觚排東林者多屏廢方恨南星輩次骨給事中章允儒江西人也性尤忮嗾其同官傅繼假汪文言發難文言者歛人初爲縣吏智巧任術負俠氣入京輸貲爲監

生用計破齊楚浙三黨察東宮伴讀王安賢而知書傾心結納與談當世流品光熹之際外廷倚劉一燦而安居中以次行諸善政文言褫其監生復逮下吏得未減益府丞邵輔忠遂劾文言褫其監生復逮下吏得未減益游公卿間大學士葉向高用爲內閣中書大中及韓爌趙南星楊漣左光斗與往來頗有迹會給事中阮大鍼與光斗大中有隙遂與允儒定計囑漣劾文言并劾大中與光斗等交通文言肆爲奸利疏入下文言詔獄大中時方遷吏科上疏力辨詔許履任御史袁化中給事中甄淑等相繼爲大中光斗辨大學士葉向高以舉用

文言亦引罪求罷獄方急御史黃尊素語鎮撫劉僑曰文言無足惜不可使搢紳禍由此起僑領之獄辭無所連文言廷杖褫職牽及者獲免大中乃遵旨履任視事楊漣疏劾忠賢大中亦率同官上言忠賢得疏大怒矯旨切讓尙未有以罪也大學士魏廣微結納忠賢表裏爲奸大中每欲糾之會孟冬時享廣微偃蹇後至大中遂抗疏劾之廣微愠益與忠賢合吏部推謝應祥巡撫山西廣微遂嫉所親陳九疇劾大中出應祥門推舉不公貶三秩出之外盡逐諸正人吏部尙書趙南星等明年逆黨梁夢環復劾文言再下詔獄鎮撫許顯純自削

贖以上南星漣光斗大中及袁化之繆昌期周朝瑞顧
 大章李三才輩無所不牽引而以漣光斗大中化中朝
 瑞大章為受楊鎬熊廷弼賄矯旨俱逮下詔獄鄉人聞
 大中逮去號泣送者數千人比入鎮撫司顯純酷刑拷
 訊血肉狼籍其年七月獄卒受指與漣光斗同夕斃之
 莊烈帝嗣位贈大中太常卿諡忠節錄其一子明史
 魏廷相字翊卿大中從子萬曆甲辰進士授汝陽令始至
 即開河以便漕輓居官清約人不敢干以私嚴持吏胥
 令不得訛法邑中春耕無桔槔取水為艱廷相乃令倣
 吳農作車戽水于是濱河之地皆可種稻墾荒數萬畝

民號魏公車服闋補棗強行取四川道御史未受事卒

嘉禾徵
獻錄

曹烈字允和更字鴻甫幼不好嬉動作有度通曉圖書天
 文地理已謂無益身心性命遂矢志濂洛之學卒年二
 十八語弟子魏學泚曰吾肢體日就銷脫而靈覺不減
 於舊卒之日從容言別神色不亂著蒙養錄果行編新纂
 魏學泚字子敬少隨父大中讀書破寺中刻苦勵志大中
 以璫禍被逮學泚號呼泣血欲隨侍入都大中勵聲曰
 若智出孔文舉八歲兒下耶奈何以完卵狗覆巢學泚
 易姓名密隨檻車行不令父知入都潛匿邸舍暮夜叩

當途父執無能發公憤者欲上書代父不得痛不欲生
 大中既斃獄中違遽扶櫬歸里見母痛絕仆地跡不入
 中闔日夜伏草啼號家人間進粥糜輒揮去曰詔獄中
 安得有此淚盡繼之以血遂死死二年弟學濂伏闕訟
 大中寃并白學泚死孝狀又瀝血上疏劾阮大鍼傅櫬
 交通逆奄實殺諸臣制詔褒美曰以爾臣忠彰為子孝
 泚濂之義生死同揆學泚許配父祠癸未學濂成進士
 入翰林時賊陷太原濂請東宮或二王往鎮南服又言
 當糾合畿輔義士為勤王師城陷作絕命詞自縊死濂
 豁達多大略痛父詔獄之慘終身布衣無重味母病割

臂肉和藥進乃瘳

橋李往哲編

李奇珍字四可萬曆進士知長樂縣定役緩徵興利剔弊
 任九載召入兵戶二科有爭國本止開礦議營田陳星
 變諸疏陞太常寺卿家居十五年無一字入長安卒祀

鄉賢長樂有雙清祠

袁志

李奇玉字元美幼擅文名與兄奇珍有二李之稱萬曆癸
 卯舉於鄉研思易學時高攀龍講道東林奇玉北面就
 正宗憲勛之曰發吾蘊者子也天啟壬戌魁南宮歷遷
 兵工兩曹再守汝甯數月引疾歸發篋中所箋註研晰
 疑義不停筆者十年雪園易義成大旨與師說相發明

甲申聞變悲憤卒學者稱荆陽先生子松崇禎庚辰進

士官歙縣令

儒林傳參
嘉善楊志

吳志遠號蘧庵舉孝廉三十年未嘗謁官府就教烏程擢

翰林孔曰改禮部司務時尙書孫慎行爭紅丸事託志

遠詮次章奏屬意用之志遠力請就閒轉南兵部郎璫

禍發嘆曰吾不能如皇甫規自附黨人尙思懷綬乎卽

告歸年八十終子亮中順治壬辰進士戶部員外郎

袁志

參嘉善
楊志

卞洪載字子厚從高攀龍遊獲聞性命之旨崇禎間兩舉

徵辟不就晚舉鄉飲賓亦不赴著有辨邪說持敬省察

約言綠雪軒詩行世

嘉禾徵
獻錄

郁調元字涵真性孝鄰失火從烈焰中負母出踰垣涉河

兩踝皆裂父母歿廬于墓側饗祀必哭終其身如一日

以廩例入國學謁選得儀封丞司河務秋水衝溢濬築

盡瘁河賴以平遷遼陽參軍單車赴遼區畫邊備嚴汛

守募勇敢儲糗糧廣芻牧放古金城方略召丁壯給牛

種耕具于山之右墾田萬畝鄉人有戍遼失所者厚給

之致政歸以子之章贈如其官

袁志

顧際明字良甫曾祖謹有義行父態見孝義際明萬厯已

丑進士選庶吉士爲雲南道御史請告養母丁憂起河

南道上言播酋應龍必叛宜早爲之備未幾應龍叛隨奉命按廣西事竣歸上方以言官交爭國本遷怒臺省遣斥三十餘人際明與焉天啟踐阼求言陞太僕寺少卿先是際明在臺巡視太僕洞悉馬政之弊至是益甚乃刻意節省減費不貲以黨禍將起引疾歸

嘉禾徵獻錄

陳龍正字惕龍父于王福建按察使龍正遊高攀龍門崇禎七年成進士授中書舍人時政尙綜覈中外爭爲深文以避罪東廠緝事尤冤濫十一年五月熒惑守心下詔修省有哀懇上帝語龍正讀之泣上養和好生二疏略曰回天在好生無過減死皋陶贊舜曰罪疑惟輕是

聖人於折獄不能無失也蓋獄情至隱人命至重故不貴專信而取兼疑不務必得而甘或失臣居家所見聞四方罪犯無甚窮凶奇謀者及來京師此等乃無虛月且罪案一成立就誅磔亦宜有所懲戒何犯者若此纍纍臣願陛下懷帝舜之疑甯使聖主有過仁之舉臣下獲不經之愆蓋陰指東廠事也其冬京師戒嚴詔舉堪任督撫者御史葉紹顒舉龍正久之刑部主事趙奕昌請訪求天下眞賢才帝令奕昌自舉亦以龍正對帝皆不用龍正居冷曹好言事十二年十月彗星見是歲冬至大雷電雨雹十三年二月京師大風天黃日晡浹旬

不解龍正皆應詔條奏大指在聽言省刑時議欲用龍正為吏部御史黃澍以偽學詆之十七年正月左遷南京國子監丞甫抵家而京師陷福王立於南京用為祠祭員外郎不就南京不守龍正已得疾遂卒

明史

孫朝亡號賓瀾諸生入成均為廣東藩司首領官有兄弟構訟經年不息者朝亡取具詞裂之諭以一體至愛二人恚悔各謝過獄地卑溼瘕死狼藉別營高敞徙居之遇大水立括贖鍰佐以薪俸扁舟風浪中且拯且賑他若平治道塗庀葺蠻序立義倉以備荒稔皆長治久遠之計晉階奉直大夫三舉鄉飲賓粵中祀名宦邑祀鄉

賢禾郡雜記

陸敷錫字德承光祿丞遷柳州通判署象州事安仁土司何公思等聲言花蘆古陳諸賊倡亂請為朝廷除之其實欲藉此剽掠為奸邊地居民騷然聚眾數萬與土司相攻殺上官遣吏往慰諭之不解賊曰即欲撫我須陸通判來敷錫單騎往撫遂帖然散去尋署賓州事時斷藤峽雖平然道險民少間為山賊竊踞敷錫乃相要害移置衛所一十九處由是山賊遠遁以母老乞歸

浙江通志

柯元芳字月傳崇禎進士授建甯府推官署甌甯浦城接壤甌甯江山麻錠賊盤互剽掠元芳募壯勇設關謀擒

賊首五大王餘黨竄伏元芳還郡而監司僨師以遺寇
 許元芳坐鑄級已而賊嘯柘浦約日取浦城元芳謂知
 之午夜勒郡邑兵分道掩捕質明七十餘酋反手就縛
 諸大吏驚相告曰是果能辦賊非縮朒縱賊者當元芳
 鑄級時屬邑令夏允彝與直指抗辨而閩人亦相率訟
 言之卒用得直解官歸居十五年而卒元芳天性至孝
 初釋褐得父平安信忽心動急馳歸而父病劇侍母終
 身如孺子歡居鄉多行陰德著述自娛子晉有傳

參嘉善
楊志

曹勳字允大崇禎戊辰會元授庶吉士官至禮部侍郎時

門戶角立勳負時望在講筵每隱護正類魏大中被逮

周旋患難吏垣章正宸言事下獄請救得釋乞養十年

留都召起見時事日非規切相臣尋以母喪歸勳精於

易著易說三卷祀鄉賢

樵李詩繫參
嘉善楊志

沈鴻起歲貢就教累轉太湖教諭左良玉以師東下人勸

其去鴻起毅然曰吾木鐸明倫而苟免君父之難乎卒

死于寇闖門一十三人俱遇害

明史

徐遠字道招少孤力學崇禎癸未進士任中書國變堅臥

不出長吏至門輒辭以疾葛巾野服三十八年不改

吳志

參嘉善
戈志

陳揆字子眾平居節儉自謹好周人急遇歲旱設法救荒

少善病絕意進取專心學古于經史多發明晚歲研悅

性理所著有省心日記十卷弟修字子近專攻三禮貫

穿六經有經緯書分九部藏于家

袁志參嘉善楊志

沈崗字若英本姓蔡性沉毅端謹究心濂閩受業百餘人

一時稱為安定弟子兄弟五人友愛無間言皆諸生

嘉善

楊志

丁鑛字九貢賓子恩廕當得官不就中辛酉副榜研究宋

元諸儒宗旨身體力行化畛域忘喜愠與人語嘔煦惟

恐傷之然外和中嚴不苟同雖燕處必整飭盛暑未嘗

脫帽露頂邑令以望重造請見率婉辭以謝不問戶外

者四十餘年日手一編凡論人物臧否政事得失皆窮

極源委若鬻產償族孫逋賦歲饑發粟賑濟其為善多

類此卒年八十七

嘉善志

沈龍翼崇禎十七年以府試第一入庠年已五十順治二

年王師臨境是日戴儒冠登東亭橋赴水死時有訓導

錢一選陳鶴鳴在城亦死於兵

嘉善萬志外紀

國朝

錢楞字芃生士晉子順治三年隨征入閩署將樂令會山

寇吳長文等竊發建甯失守將樂被圍城中無兵楞與

丞方抗督鄉勇登陴拒之堅守九月城碎率家丁夏允
中沈貴等巷戰手刃二賊馬蹶被殺家丁死者數人雍
正五年楞孫禮部侍郎以塏陳奏 贈按察司僉事祀

功臣廟 福建名宦冊

柯聳字素培己丑進士授棗陽令邑當楚豫關陝之衝流
寇穴西山數出為患聳厲眾登陴寇旋散舊帥孟應學
歸誠返蜀道由襄有利其資者誣為奸宄下獄死聳廉
其枉盡釋其家以卓異授禮科前後歷五垣凡十九年
奏疏凡五十七上如請卹楚省凋敝蠲吳江歲租及建
言春秋宜四傳竝重不得專主胡傳又請以理學名臣
方孝孺從祀皆卓卓可傳轉通政使參議乞養歸著有

存古堂文藁霽園詩集子崇樸維禎有傳鄧枚陝西甯

夏兵備道 嘉善崔志

郁之章字衷恒順治己丑進士歷官分巡道駐上杭時海
寇入漳聲言來攻人情驚恐之章以靜持之密約城守
張國棟整飭營伍趣士民集演武廳手草檄以忠義激
發士民咸願効死賊知有備而退陞大理寺丞以譴歸
杜門課孫獎掖後進執經問者甚眾纂修邑乘若干卷

福建名宦冊參嘉善戈志

沈鱣字木門順治辛丑進士知建安縣事兵燹後土田荒

蕪蠹胥巧為影射鱗廉得實窮治不少貸先是藩廝以
錢貨窮民勒息數私禁榜掠有鬻妻孥以償者官莫能
制縛曰愛一官而脅於輿隸使民無告吾恥焉捕置之

法民大悅

浙江通志

張茁字文葭順治壬辰進士家貧四世不異爨兄芷早亡
撫其子如己子歷部郎出為安慶守開荒田二千餘頃
其請蠲請賑諸書民頌之有流涕者以註誤歸

袁志

吳亮中字寅仲與錢繼振郁之章魏學濂學洙學渠曹爾
堪蔣玉稱柳洲八子構來問堂鍵戶力學順治己丑登
進士授戶部主事督理漢中糧儲有碩聲轉員外郎

橋李

詩繫

孫籀字潔初順治己丑進士任山西學道稱得人大學士

陳廷敬吳璵侍郎田逢吉皆其所拔士尋補福建糧道
值廈門用兵先時籌餉刻期奏捷移鎮靈武開屯治河
在安廬撫凋瘵鋤豪猾修學校善政畢舉轉南汝因辦
公馳驅墮馬傷足告歸每去任士民鑄碑建祠卒祀鄉
賢子復煒由縣尹陞主政復煒有傳

嘉善志

沈鼎字止岳順治己丑進士隨征入粵授肇高道適蒼梧
陷獨守孤城二載又平洞荷諸寨山賊陞福建海道築
隄防通水利廢墜悉舉轉徽甯道

吳志

丁彥字文博順治己丑進士授工部都水司主事督理江

南蘆政有政聲著有暇日堂集行世志

丁旭字子葵父洪夏夢歸子慕入其廬是夕生旭及長號

慕庵砥志礪行講身心實學其慮周憂世有類西山胸

中灑落有類濂溪我

朝徵修明史學使李文襄公薦之於朝書成議敘當得官念

親老不仕父母沒哀毀盡禮廬墓以居卒年七十八著

有寶晉齋初刻再刻二集明史稿志

曹爾堪字子顧勳子順治壬辰進士選庶吉士性強記博

覽能舉原委輿圖要害山川形勢指畫纖悉聽者神從

歷陞侍講學士屢蒙

聖祖嘉寵有曹爾堪學問最優之語罷歸偕二三老友選勝賦

詩與宋琬施閏章沈荃王士禎王士禛汪琬程可則稱

海內八家有南溪集行世子鑑平鑑章有傳馮李詩繫參嘉善戈

志

魏學渠號青城順治戊子舉人授成都府推官時蜀中初

定戶口尚少民疲于差役學渠招撫綏輯定嘉眉邛雅

四州賦額公私稱便舉博學鴻詞陞刑部主事歷官江

西分守湖西道加意撫綏務從寬簡其俗生女多溺死

嚴為之禁生全者甚眾生平輕財好施親友緩急立應

嘉興府志 卷五十四
從祀名宦鄉賢

浙江通志
參吳志

周宸藻號質庵宗文子順治乙未進士由庶常改御史屢

陳時務禁旗丁勒索請清查倉穀皆切中窾要巡兩淮

鹽課罷歸擅書工詩有柿葉齋詩集

吳志

夏長泰字季保原籍華亭父嘉遇官考功郎著清望長泰

順治乙未進士授文水令輕刑緩徵得士民心擢刑部

主事請假歸布素蕭然會蘇松撫臣議築隄捍海推長

泰廉幹請視工事勞瘁卒

嘉善
楊志

陸翔華順治進士任鬱林州知州時李定國餘黨未散侵

擾諸州縣鬱林參將提兵遠出賊乘虛猝至圍城翔華

率眾登陴固守賊攻不克引去後補廣德州著有惠政

崇祀鬱林名宦

廣西通志
嘉善崔志

錢黯字長孺士晉孫弱冠成順治乙未進士授池州府推

官以敏練受知臺使所至輒以自隨以註誤罷職年甫

三十家居事親盡孝暇益肆力經史百家書法追二王

兼擅潑墨自設科來登第踰七十年者史冊罕見年九

十五年

嘉善
戈志

楊應標字勝林順治乙未進士授甯國府推官歷溧陽鄆

陵令牧劍川所至俱有惠政可紀能詩著永思堂集子

恒孫方岳舉人爾德會元有傳

吳志參
李詩繫

朱張銘字西渠順治乙未進士授行人司奉使者三屏絕

請謁典試雲南陞戶部主事會長子兆渭能文早世傷

痛卒於京邸

嘉善 崔志

顧儀字可桂歲貢生授金山衛教授沿海邊邑無廩額儀

請于上創膳堂分經課士文風聿起始登解額

曹相駿 楓溪小

志

顧耿臣字奕聞際明孫順治戊戌進士知鄜州兵燹後加

意撫綏劇賊投誠約束得宜不為州患陞戶曹典貴州

試尋督權蕪湖秩滿知大名府釐正豪右隱糧有愚民

倡亂止罪渠魁脅從者盡為寬釋民戴其德

吳志參嘉 善戈志

孫榮字曙東性穎異究心天文河渠由舉人授亳州牧兵

後民多逃亡榮勞來安集墾田萬餘建巨橋十一以當

菑蕩渠之衝轉開州築城濬河建倉修學積穀三千以

備荒歉墾田七十頃舉博學宏詞尋陞兵部郎子雯鏡

由縣尹陞綿州牧詩文俊逸著鸞嘯軒稿

顧向字羊舌辛卯舉人授四川蘆山令蘆地荒遠離城三

里即為天全董北諸土司生熟蠻雜處向竭力撫綏蠻

旣帖然民亦安輯時逆孽未靖協辦軍餉具有成績後

清田賦豁賠累集流亡葺城郭勸農宣教一以實心舉

行比歸囊橐蕭然子鼎升鼎恒至性肫篤鼎恒有傳

以上

嘉善
戈志

沈湛字淵伯前明諸生踐履篤實當湖陸清獻極推重稱先生而不名慨世人浮薄殘刻無非涉險蹈危因集倫常日用語訓二子瑤璿署名怡安清獻前後兩序之並摘三教合一一條謂偶涉獵於神仙力勸改正立言垂誠衛道基嚴居名五柳村著有閩游草響雪堂古文參

魚堂
文集

王睿字聖若副貢授興化通判旋陞同知時海禁甚嚴出界捕漁者論死睿原情平反全活者眾著有曠期堂集龔在升字聞園順治乙亥進士為蘇州推官督漕決獄摘

發奸惡請蠲版荒停修土城為三吳永利改湖廣通山

令嚴禁耗羨停薦新茶事事為民請命卒于官民皆哽

咽流涕城外山中刻有思公石

以上嘉善
崔志

李振宗字欲仙康熙甲辰進士初令陝西禮縣後補湖廣

蘄水政寬訟簡士民樂業以卓異內陞歷任郎中轉平

涼府同知以勞瘁卒于官子允符舉人授什邡令有惠

政陞御史

吳志參嘉善
戈志

錢霞字赤城四歲而孤事母盡孝庚戌成進士授山東冠縣令諮訪利弊嚴保甲勤開墾均賦稅又修葺學宮興文教改承德令兼署治中通判有守將欲徙民分戍上

陽堡百姓大噪單騎曉諭民乃帖然內陞主事

曹鑑倫字彝士勳孫己未進士選庶常典試山左所拔士

如何世堪李永紹王沛壇顏光燾王懿輩皆著清望再

主北闈試歷陞內閣學士預修 國史典訓方略膺一

統志副總裁

賜錫類堂匾額以示優寵歷陞吏部侍郎卒年六十三

賜祭葬子源祁貢生源郁源郊有傳源邦舉人雲陽知縣

以上嘉善

志

沈辰垣字紫翰乙丑進士授翰林與纂修明史及續唐類

函羣芳譜諸書又奉

敕繙閱等韻標摘差誤謂吳興識四聲而不識七音失三韻之

原四聲為經七音為緯辨甚詳悉游陞侍讀學士尤喜

汲引後輩乞歸卒祀鄉賢

丁策字嘉猷康熙乙丑進士為諸生時遊粵西同里蔣孝

修任奉議州判適病亡策經紀其喪并為申理錢穀之

未清者事竣護其柩歸後任昌黎令慈惠得士民心

以上吳志參嘉善志

錢以塏字閻行士晉曾孫戊辰進士授茂名令以才能調

東莞遷隰州牧內陞員外歷通政特轉少詹事躋清華

之列奉

命至雞林叭喇甯古塔白都納地方相度形勢設立州縣繪圖

入告擢副憲陞禮部侍郎祖楞殉難閩中瀝情叩顙得

贈卹簡本部尙書以疾乞休奉

旨褒嘉加宮保致仕卒七十一

賜諡恭恪予祭葬

嘉善志

王濤字見平武進士康熙十三年隨征福建授遊擊以勞

歿於行間能詩工書不苟然諾子醅業諸生力學修行

于志

丁棠發字卓峰賓曾孫戊辰進士授新安令減耗革積弊

恤民訓俗建義學課士月給廩餼特舉鄉飲酒禮繪圖

定儀注士民始知禮讓以才能陞御史潔已率屬綱紀

肅然歸奉八十老父貧無餘貲承權菽水自號一餐居

士

吳志參嘉善志

金皋謝字應台髫年喪母哀毀如成人戊辰進士授莆田

令莆邑濱海之田常被水災捐俸築隄以捍之延紳士

重輯邑乘以親老力請終養歸卒祀鄉賢

嘉善志

陳霆萬字子敦康熙甲戌進士授臨朐縣邑正供四萬餘

兩向有胥蠹私收包納之弊甚至挈家遠遁累民重完

霆萬至一變其法散歸業戶使各自輸糧其弊遂革卓

薦行取病卒祀名宦鄉賢鍾之枚亦甲戌進士任義烏

教諭師範端莊儒林推重子承烈字武傳亦有文名

江浙

通志參嘉善戈志

孫洙字魯淵康熙乙卯舉人授臨湘令崇尚教化不事鞭

扑荒歲設法賑濟建啟聖祠設義塾以勞卒于官貧無

以殮眾為贈賻得扶柩歸

嘉善戈志

張王典字堯若康熙丁丑進士授山西平順縣下車減耗

費絕苞苴省差徭值歲當編審秉公釐剔從前隱漏之

弊重役之苦一時頓清陞吏部主事旋擢吏科給事中

官京七載賃屋數間僅可容膝公餘焚香玩易及卒惟

圖書數束而已

浙江通志

陳培字用楫丁巳舉人授廣東高明令發粟賑濟以恩信

招撫盜魁俾巡緝地方民得安枕粵有毒草民遇忿爭

輒服以陷人培以德化之此風遂革任十三載卒于官

著鳳覽堂文稿粵遊吟行世

嘉善戈志

孫衍字宰工康熙甲子舉人授長山知縣在任五年減耗

羨賑貧之以病乞休邑人攀轅臥轍者相望于道有廣

川去思錄建專祠祀之所著長山邑乘孫氏宗譜等書

許湄字臨洲康熙庚辰進士知湖廣石門縣苗蠻雜處湄

開誠撫諭諸土司咸格心向化巡撫趙申喬保奏內召

卒于途居官十五年家無寸椽尺土沒後人益信其廉

子王謨王猷有傳以上浙江通志參嘉善戈志

楊爾德字質為戊戌會試第一選庶常歷陞掌垣條陳學政事宜深中窺要視廣東學政歲試甫周以校文勞瘁卒于官

詔卹其家

曹源郊字東牧戊戌進士以編修入直南書房充實錄纂修官甲辰典試貴州丙午典試廣東冒暑馳驅入闈力疾校文榜未發而歿著有桂園詩集

許王謨字端操由舉人分發四川委署宜賓令邑稱繁劇又值承辦軍需籌畫無失上官重其才簡往督築雷波

城工在萬山中王謨伐山開道觸犯嵐瘴而卒
以上嘉善戈志

孫錄字古隍順治辛丑科

廷試二甲第一故事二甲第一稱傳臚多得館選時更令以推官用及謁選而推官又奉裁授福建南靖縣知縣靖故巖邑奸民率恃險抗糧錄躬歷窮鄉勸諭民感動始樂輸將又嚴私稅之禁新學宮集諸生講經制府范承謨知其才值大計欲薦之而拘於格因先行風示為循吏勸會捧檄以事往鄰省逆藩變作不得歸
大兵入粵錄夜行晝伏至軍門將軍見制府檄且素知錄有經濟才遂題補潮州府通判丁外艱歸著有廉靜堂集

浦文焯字元量康熙丙戌通士選蠡縣知縣地居畿輔習俗強悍難治文焯之官法令一新任九載有奇慈祥愷悌士民稱為浦菩薩陞正定府同知甫蒞任即擢河間府知府雍正三年直隸巡道改設按察使司即以文焯陞授尋鐫職歸乾隆初起廢員授福建糧驛道而卒著有鶴貽堂集平恕齋文稿

孫燾字叔荀貢生善詩文倜儻負異才遊川陝賓某觀察所撫軍察公見其詩甚嘆賞延至幕使掌箋奏會山賊竊發古聖廟命辛壬

上諭察往勦燾請從倥偬戎馬間羽書旁午措辦悉中機宜賊

聞察諸邊事皆竄伏謀欲出降而懼誅燾探知之請往宣諭單身入賊巢愷切曉諭賊感泣羅拜事平以軍功議敘選廣東廉州府同知調肇慶署廉州府知府興利剔弊所在多惠政後以耳聾致政歸

許王猷字賓穆康熙癸巳進士以翰林累擢少詹事主試江南如沈德潛楊大琛吳虎炳倪承茂皆其所得士書法力追北海片楮寸簡人爭寶之歸後與里中耆舊仿白香山故事為尊德會居鄉謙厚與人交外和內介累官內閣學士兼禮部侍郎年八十卒

孫浚字殿揚康熙丙子舉人選舞陽縣知縣遇疑獄摘伏

如神制府調留省垣使清理積案浚斟酌情理多所平反保陞知州薦剡已發矣時制府威重某官素所嘖者因公望議欲吹求以重其罪使浚雜治之浚竟白其寃制府怒人咸爲之咋舌浚拂衣曰吾不能殺人以媚人也遂引疾歸

顧心錯字嘉集康熙辛卯舉人父秉堅以孝廉教諭會稽修學校置祭器歿後門人私謚端毅心錯博學能文通刑名家術湖廣衡永道汪櫛以茂材薦授河南溫縣知縣調河內邑有漑田渠二偷注越洩爭鬪有死者爲設夫司啟閉挨日遞洩民無旱溢之患右族以義男爭繼

速訟幾破家心錯使就讞於邑廟片言而兩造悅服擢光州直隸知州光城中貫大渠北城根逼水城中地高等女牆民環堞而居圯則盡爲魚鼈心錯捐俸修築密排以石下張上斂永無坍決患年老乞歸卒年八十四錢家堅字惟若康熙癸巳舉人補湖北鄖西令調南漳漳地遼闊奸宄竊發家堅力行編甲互保法盜賊不得發又捐俸修干工堰以利蓄洩民名其堰曰嘉善曰水壺曰彭城誌勿諉也秩滿陞中書制府奏留題授隨州牧丁內艱服闋補直隸保安州歲大祲盡心撫賑災黎皆得所後因公降補寶坻令寶坻爲鄉先輩袁黃舊治家

暨顏其堂曰景袁民有嘉善兩名宦之譽以迴避改補山東博山令告歸乾隆甲午重赴鹿鳴宴壽八十一卒所著有般居吟稿

朱一蜚字健沖以貢入成均時值準夷草竊

詔命舉茂材異等一蜚以宗人府丞蔡嵩薦

命往陝西軍前岳大將軍鍾琪檄令馳赴鄂爾多斯查點軍旅糧儲器械一蜚以書生從事行間約束嚴明指揮如意岳深器之歷署高陵麟遊令補韓城調臨潼所在多惠政歷陞清河道擢山西布政使既又移江蘇復調畿輔仍轉晉藩一蜚起家縣令二十年中開藩者六護督篆

者再卒以用非其人被議家中貲產祖遺田屋外無長物也羈滯潞安當事延主起文書院講席卒

程鍾彥字驥超雍正癸丑進士入翰林改御史甫視事卽條陳水利他如請寬換照限期添築石道以便行旅等疏皆准行擢禮垣充河南鄉試正考官歷陞太常寺少卿巡視西城奏請禁止附近香山一帶毋許開煤窑巡察東漕相度運河緊要奏請添夫挑浚以收利濟實效凡所疏奏皆見施行著有經義日纂皇華紀程南村堂詩文集

孫惠棠榜名觀茫雍正巳酉舉人選授山西廣靈縣知縣

廣靈地素瘠民欠丁糧多流亡惠案力請上官仿浙西
 例將丁糧移派田地起科十年帶徵得准行以妻弟朱
 一蜚任山西布政迴避補山東武城知縣有民婦年六
 十餘獨居被焚死往驗屋已燼屍自項以下皆焦灼惠
 案密語幹役曰此縊而後焚者也急緝勿失後廉得真
 犯寘之法蓋婦有姪夜盜姑財為所識以結襪帶絞死
 焚之以滅其迹遠近稱神明惠案以愛民為心故所在
 多實政比去民懷其德不忘

陸偉然字季容乾隆丁巳進士選新樂縣知縣潔已愛民
 上官皆善視之獨失方伯意請掣回調簡治新樂未及

期人士有清廉敏惠之頌制軍知其剛介委署雞澤縣
 事偉然坐理裕如改補高陽旋以濫應驛馬鐫級偉然
 篤行力學為文章根柢經史闡發精奧有稼墨軒詩賦
 行世

陳興祚字緒三乾隆己未進士選福建仙遊縣知縣時有
 泉人俞得海越獄拒捕通緝未獲仙邑林姓等七人以
 疑似羅織陷獄興祚廉得其情力請開釋屢觸上官怒
 堅持不撓卒如所請內艱服闋補河南洧川知縣洧故
 瘠土興祚撫字得宜民有起色政尚慈惠而摘發如神
 所至豪強皆斂跡他若賑窮黎新學校毀淫祠均徭剔

嘉興府志 卷五十四
蠹閩豫之民至今頌之

陳作梅字燮原乾隆壬戌進士官刑曹由主事遞陞郎中
歷掌給事中多建白稜稜有風望其任御史時條陳綠
旗營務及江浙一帶海塘事宜均得議行又有分別原
衙門注上考之奏遂著爲令巡視津漕奏運弁宜鑄給
印信及幫船更調之法俱關體要膺外擢分巡雲南迤
東道旋調迤西後以公呈議事白以疾卒著有雪園小
稿

許椿字董園乾隆辛酉舉人以知縣發四川試用歷署雙
流儀隴等縣有政聲會

大兵征緬甸蜀省協供驟馬委官督解灌令沈鵬以母老病
憚行椿慨然請代上官義之調度得宜未半載事竣在
途不廢吟咏著有南征旅草二卷既補內江令值金川
蠢動定邊將軍溫福進討檄椿司正林口臺站飛芻挽
粟軍用以饒又調登春臺站六月師潰賊突至椿率站
夫力戰以救援不至被執罵賊死事聞

賜卹贈道銜賜祭葬配享雙忠祠廕世襲恩騎尉

錢金殿字鶴雲以塏嗣子髫齡能詩文及長援例選合肥
丞補江甯知縣陞海州牧擢鎮江守治有寶晉書院幾
廢矣延師集生徒資其膏火暇與諸生講論經史旋擢

江安糧道本生外艱服闋補江西饒九道署臬篆尋奉旨署理巡視南漕御史外吏得此任異數也後以事左遷徐州守歷太平廬州以勞卒著有自信紀言靜甯室詩鈔

朱錦昌字畫圃一輩子乙酉順天鄉試舉人謁選大理府雲南知縣尋陞雲州知州制府以錦昌熟諳邊事奏調騰越州州轄五關七土司土司來謁例佩刀拜跪雖品高不稍假錦昌霽顏溫諭得悉其地方土俗并其族姓賢否其後隴川因承襲失序擾及內地于千崖蓋達戶撒拉撒各處搶掠錦昌與總鎮許世亨隨地鎮壓并誠其子姓毋妄動因得無事擢蒙化同知丁內艱服闋補

大關廳同知歷署大理順甯知府所至多惠政以勞瘁卒于官著有產芝室詩集

周翼洙字迪文全錫子以選貢入成均受經義於宛平黃叔琳受詩法於長洲沈德潛學日以進甲戌成進士選衢州府教授弟澧字芭東兄弟互相師友以科名非不朽事沉潛於馬鄭賈孔諸書旁通天文輿地兵農經世之務晚尤究心通典通考二書拾遺糾繆不下萬餘條爲諸生二十餘年庚午同兄翼洙舉於鄉辛未會試第一以及第第三入翰林旋以親老乞歸卒

蔡以臺字季實甲子順天鄉試副榜考補景山教習以知

縣用不就庚午舉順天鄉試丁丑冠南宮

廷試第一授翰林院修撰尋補

日講起居注官以親老乞養歸以臺自幼穎拔好古博通羣籍鐘鼎圖書金石之品寓目卽辨真贋生平著述多不屬草僅存姓氏竊略六卷

朱鑑昌字宗盛四歲而孤性聰慧及長益倜儻不樂爲經生業援例選縣丞分發楚南尋補通道令改發四川值金川肆逆軍需旁午上官委鑑昌督役修日耳拉山路兼總兩臺甫題補漢州牧以積勞成疾卒

金汝珪字同侯父榮文行重一邑乾隆壬辰成進士授吏部文選兼考功司主事尋丁母憂扶櫬歸葬時南陽夏鎮間河水驟溢狂飈陡起船欲覆家人掖汝珪將呼他舟載汝珪抱棺痛哭不肯去服闋由郎中擢江南鹽巡道在江南五年累署藩臬儉約自持未嘗一召優伶演劇被議歸卒年五十一

謝墉字崑城乾隆辛未

召試一等一名授內閣中書壬申成進士入翰林歷官工部侍郎三充鄉會試同考官兩主鄉試兩任學政兩知貢舉一充會試正總裁墉以文章受

知遇甫入詞館卽

命上書房行走出入三十餘年其歷掌文衡積學之士多出其

門辛丑狀元錢棨鄉會榜首皆壩所取為

熙朝盛事後被議降編修仍

上書房行走以疾卒京邸嘉慶五年

上以師傅舊臣追

贈三品卿銜并祭葬著有詩文集書學正說等書

曹焜字素為乾隆癸未進士選四川新都令疏堤堰以溉

田疇均驛站以安夫役民咸便之制府阿爾泰奏調成

都兼署華陽以卓異薦歷署嘉定雅州潼川諸府事兩

金川逆酋蠢動隨制府桂林專治文書嗣被吏議革職

留任調赴定邊將軍明亮軍前奏開復改授員外郎金

川方略館纂修官以繼母年老乞歸養里居十餘載卒

王啟焜字東白以新江例選四川大竹丞擢成都令時

大兵進勦金川羽書旁午擘畫悉中窾要陞簡州牧尋遷瀘

州牧權守夔州大吏咸倚以為重旋擢成都守晉川東

道廓爾喀軍興檄辦打箭爐軍需轉輸迅速大功告成

賞戴花翎值川匪滋擾總籌軍務以勞卒

以上伊志

朱潮字學瀾以貲郎為府經歷洊升長沙府知府攝靈壽

縣時遇水災典質以賑母錢亦脫簪珥助迨官福建署

福甯府值海寇蔡牽於三沙為巢潮乃察地勢練民勇

購獲賊黨悉牽踪跡出奇搗巢未幾殄滅補淡水同知

治民番械鬥率勇直前宣布威信經年而平新纂

程廷泰字西泉乾隆甲寅舉人就江西布庫大使嚴禁牙

行私秤校準印烙商民稱便尋擢刑部郎中有婦被火

死同官將嚴治其子廷泰諦視形迹研詢親戚供稱母

子本無間因坑火延燒睡酣不知逃避子在別房聞聲

奔救已遍體焦灼哀號莫及案定子得免見魏塘人物志

程廷濟字悅舟廩貢生由方略館議敘得江西臨川縣丞

升浮梁知縣訪獲鄱陽湖盜鄭萬年洪四保等置之法

景德鎮兩大姓聚眾械鬥單車往諭即時解散丁艱吉

補直隸曲周增堤防廣書院士民沾惠調署良鄉擢雲

南鄧州知州引疾歸見魏塘人物志

陳孝泳字賡言號松崖以婁籍補博士弟子員後歸原籍

精篆隸金石乾隆丙寅詔修西清古鑑冢宰汪文端薦

叅預討論壬申中順天舉人修書成供奉懋勤殿授

國子助教累遷至陝西道監察御史晉授光祿寺正卿

參曹文植撰墓誌

陳祁字如京號紅圃由膳錄議敘得邵陽縣丞升臨潼令

值敘匪不靖生擒首逆李貴誠歷陞甘肅布政陝甘總

督賞戴花翎積勞成疾制軍那彥成爲繕墓誌深致

慨焉著有從戎草南國雜詠新豐吟稿商於吟稿尤散
本誼叔祖孝泳欲創義庄不果祁與堂叔暲贊成其事

楓溪
小志

孫銀槎字階青乾隆丙戌進士歸班選山東濰縣引 見

改安徽績溪其為治以端士習為先分校所得皆名士

請加學額邑人有澤留鬻序之頌 見魏塘
人物考

范寶瓌字六泉乾隆庚子進士部選山西山陰縣引 見

特改四川嘉定縣并 賞給紗袍褂時教匪方熾檄督

兵餉稱職歷署石砭同知嘉定府知府調赴西藏管理

錢局藏俗親死不葬教之殞殮又畏出痘有患者輒委

棄致死為設痘局居病者醫治之仕至湖北蘄州知州

著有古品節錄行軍須知駐藏識略 新纂

錢樾字撫棠少時器宇端重讀書過目成誦喜作擘窠大

字乾隆壬辰翰林累遷吏部左侍郎坐失察銓吏降編

修復累遷內閣學士兼禮部侍郎嘗主試陝西江西又

督學四川廣西

召入

尚書房行走于役江西之歲

睿皇帝方在藩邸製詩寵行有冰心玉衡句嘉慶元年督學江

蘇先是蘇有獄連諸生懼羅織樾會鞠得雪所全多知

名士會徐州壩工火又瓜儀鹽臬盤據為閭閻害

上命密訪二事械指陳利害本末甚悉歲辛酉畿輔大水疏請

以工代賑又請禁南漕折色諸弊乙丑督學山左戊辰

丁艱回籍服闋患病屢蒙

溫諭問疾無虛歲甲戌力疾覲

闕以江南番錢盛行奏請嚴禁其所歷半天下熟悉民間利病

知無不言里居未嘗有干謁地方官事年七十有三卒

於家于志

陳蘭徵字香王乾隆庚辰舉人銓廣西永淳令署橫州時

山水驟漲民多登城避溺蘭徵立發倉按丁口分給民

賴以安水退為脩城垣二百餘丈署懷集縣邑素健訟

蒞治甫三月才風頓息時值邊西荒歉上官知其恤民

瘼仍調橫州蘭徵立請出倉穀五萬石官為平糶全活

數千餘人後官至山東濱州知州引疾歸卒壽七十有

九著有粵遊吟二卷樹香齋詩集六卷于志

吳書城字擁萬嘉慶戊午舉人由中書入軍機陞戶部郎

中補貴州遵義府知府值大旱米價騰貴飭各屬開倉

平糶並諭殷富量力捐賑治無飢黎擢貴東道兩署臬

篆凡遇重獄必反覆再三以勞卒年五十六生平事親

孝自以祿不逮養為終身恨與諸弟歡好無間有詩古

文彙各二卷筆記八卷撫苗事略一卷于志

周以勳字次立性倜儻有幹濟才乾隆丙午舉人補山東嘉祥令萊陽勢豪因爭麥場曠羣奴斃其人正凶不得檄以勳會鞫廉得之將定案而勢豪內控

欽使來按獄以勳反覆辯論卒抵勢豪罪後以姻親迴避改江蘇奉縣丹徒賑務周歷城鄉勸捐二十四萬餘兩活人數十萬計任寶山時捐廉堵築海隄悉臻鞏固陞海門同知旋署江甯知府以勞瘁卒於官于志

錢清履字慶徵以塏孫乾隆甲寅舉人官蘄水縣時嚴斥候清戶糧進邑中子弟教之如家兒而發奸摘伏不稍

姑息膺卓薦陞白河口同知年踰六十告歸居家十有餘年邑中官紳重之每有疑難得其一言以決平生喜為詩有松風老屋詩稿十六卷詞二卷于志

倪景點字檢之由安徽府經歷陞至順天府治中服官四十年所在皆實心任事而於西隆煙瘴要地尤多德政州人至今思之于志

周升桓字穉圭乾隆癸酉同兄鼎樞舉於鄉甲戌同父翼洙成進士入翰林擢侍講外補廣西蒼梧驛鹽道粵產斷腸草獠民遇忿毒人死歲常數百計升桓令犯笞杖者納草以贖罪不數年根芟絕慘毒之獄遂除又獠民

自煽禍大吏疑士司勾結欲坐之罪升桓白其寃調土
 司征之戮其魁釋餘黨其他鋤奸釐弊雪枉決疑類如
 此旋署臬篆以事望議謫戍在臺供應臺站外惟課通
 鑑摹古帖凡六年如一日歸里後長鍾山書院卒年六
 十有九書法宗顏詩清婉有皖遊詩存子以輝由通判
 籤發南河官至河南開歸陳許道旋署臬篆所至辦理
 河務有政績以疾乞歸廉俸所贏並助親黨喪葬于志
 盛堂字素園少端重乾隆甲辰成進士選四川長甯令邑
 故有健訟風甫蒞任即嚴訪訟棍每訊案隨判隨結由
 是四境肅清後因公望吏議生平褐衣蔬食課子弟極

嚴家居未嘗有干謁地方官事年八十六卒于志

周以忻字亦次嘉慶戊午舉人宰河南偃師課農桑興文

教有令名陞雲南甯州引疾歸居家孝友工書翰于志

王煥字中照少有膽略官四川萬縣丞嘉慶初川楚教匪

滋事經略勒公調赴營理軍務煥擘畫悉中窾要子培

字陞升四川百丈司巡檢時亦隨營數帶兵戰殺賊魁

升雲陽縣知縣加知州銜以丁母艱服闋任貴州普安

直隸同知卒官于志

陳鵬字翼雲官貴州州判從征逆苗署定番州事會鎮戎

統援兵到州鵬獻奇計敗賊於廬山凡殺苗一千二百

餘人官兵死傷者二人鄉勇七人而已時制帥抵貞豐設軍需總局於安順府飛檄購備軍糧接濟貞豐一路鵬不惜重貲分路購辦又於沿途各站分佈丁役陸續起運先後四月餘凡運米六千餘石又署普安州時有巨猾陽黨中者本州民久於滇結黨羽至十餘萬欲謀不軌嘉慶十五年潛回州境將取老幼赴滇尅期舉事鵬方抵任聞之遣偵其家則已束裝秣馬待旦行矣遂選集兵役乘夜直入擒之明日制府差官帶兵至卽以授之後升興義縣知縣官至廣東連平州知州里吏議鵬級歸著有萬里蛩吟一卷卒年七十

于志

黃安濤字霽青父凱鈞入孝義傳嘉慶丁卯舉人已巳傳臚授編修丙子出典貴州試差旋充文淵閣校理與修一統志文苑傳尋除江西廣信府艱歸服闋補廣東高州府調劇改潮州初涖高州俗好訟多積獄乃檄屬州縣書兩造兩辭揭通衢約以期自至暮獄平以干計潮人好械鬪殺傷事發市人代抵名曰宰白鴨前守利易了率不復窮治安濤思移俗獄上輒語囚曰若但勿承毋他慮我養若衙中獲犯而後釋以故終其任未戮一代抵者屬吏成案懲失入多駁詰怨望所積浸潤達上官卒坐督捕疏懈被議改簡罷歸與諸文士詩酒往還

有真有益齋文集詩娛室息耕草堂詩集又著說經中

義一百卷權濟錄綠箋詞鈔昭代詞選嶺南從政錄

吳江

沈曰富

撰墓志

鍾汪杰字元甫嘉慶丙子舉人丁丑進士分發山西授壽

陽縣歲值水旱蝗蝻後籌積儲勸墾荒作歌剴切民感

化馴復繁庶杰天資高妙學易頓悟故言性宗新建之

說然博覽經史洽聞殫見不為心學空言所著遺書有

二十一種詩集名小網川書屋

新纂

浦曰楷字端培號又垞母沈氏嫺禮教善吟詠有身時怡

情蕭選生日楷讀書過目成誦漢魏六朝文若夙習然

嘉慶辛酉舉人丁丑成進士館庶常散授山東萊陽縣

清積案嚴保甲創設書院與國寺為祝 釐之所捐廉

重葺並脩宋琬安雅堂會大旱禱雨輒應冒雨捕蝗卒

有雙歧之麥道光戊子保舉卓異旋調滕縣聞治萊陽

有威名猾吏斂迹地素產煤掘者半亡命挖過深一壓

斃數百人嚴禁之祇存一窑供日用修上宮館肖孟子

像其中吏治儒雅政聲方著以肝疾告歸著有自怡齋

文集晴蘭書屋詩稿

浦氏行述

孫成彥原名鈞號廉甫嘉慶癸酉優貢考取八旗教習以

知縣分發廣東署龍川有江西定南民人與龍邑人爭

婚埋滅七命之案盡心究辦不兩月屍犯盡獲各補博羅籌賑水災有政聲權南雄州仁化巨盜蒙叫化等出肆焚掠成彥故弛捕限密伺不備掩捕之盜駭戒毋入境再任博羅平反盧某械殺命案旋獲正犯前議抵死者十餘人得雪英德匪首鄺亞清等嘯聚拒官兵宰英者孫福謙求退大府命成彥往匪聞旋解散嗣西匪竄入躬冒矢石馳往黃茅峽百花巖千段石等處追剿將密保擢陞遽卒

新纂

查奕照字丙唐講求經濟年少館京師侍郎琅玕宅琅赴

浙聘掌章奏時值英吉利入貢與當道渡海觀蓮花橫

首諸洋卽欲有所設施借海甯牧張玉田轉餉甘肅遇

張漢潮匪警居圍城匝月策守禦阿林保督閩浙專弁

來迎適海寇蔡牽朱潰勢方熾策以絕接濟援擄劫截

剿躡擊諸法寇得撲滅百齡督兩江威望嚴重委令鞫

獄有劫庫戕官案捕者以難民三人當之具白其無辜

百督始詰責之繼器重之歎謂渺小丈夫乃能以氣節

抗上官後隨慶保撫黔條奏運銅虧帑之苦部格於成

議再駁再奏並請 欽使會勘遂邀 特允慶

陞督兩湖楚省例食淮鹽而永州逆流挽運寶慶鄖陽

施南在萬山中道險難至為稿奏請改引界議雖寢民

感之通山鹽梟拒捕戕官梟遁強獲二民人背有刺字者實之獄上疑有冤力勸慶率司道會鞫卒得雪修脯所入援例官通判進權淮安同知值河南潰決工繁帑絀部議按田派夫預征雜稅為條陳不可狀請借提淮商引費卒如議行既歸里與嘉興張廷濟同邑黃安濤相友善往來倡和尤超然塵壒云所著東望閣詩鈔及隨筆行世其未刻者南北史小識敬業堂集註藏於家

子世璜善畫工詩

參汪能肅撰傳

陳傳均字衡甫號皋蘭祖作梅宦歿雲南襁褓自滇歸貧不能延師稍長知苦讀母鍾呼使罷始就寢年十三補

博士弟子員娶妻十八日殂終身不復娶中嘉慶丁卯鄉試第一甲戌入翰林散館授戶部主事陞郎中道光年西陲用兵指撥餉需司農著績京察列保一等尋以失察降官遂南游楚為制軍琦掌牋奏巡撫吳榮光器重之遂主講蓮池書院啟迪多人氣度和平雖御臧獲亦無疾言遽色以耆壽終

郁鼎鍾字彝齋道光丙戌成進士入詞林散館授江西泰和縣知縣甫下車即懲蠹吏飭法者有宿盜案廉知退役某能召之跣緝卒獲寘諸法聽訟以誠感兩造各愜意而去邑有萃和儲英兩書院捐俸獎勵文望翕然時

粵東有兵事邑當孔道供億頻仍紳民喜其廉而無擾
 集資相助差畢悉以廉俸償鼎鍾性冲澹苦案牘勞形
 遂乞休貧不能歸贛州守王藩重建陽明書院適落成
 聘主講席在贛五年教有程式士風丕振歸鄉後足不
 入城鍵戶著書遠近從學者踵至著有平川舊聞心香
 閣詩鈔彝齋文集平川詩徵舊聞識餘校補袁氏紀年
 顛編注釋王脩竹論畫詩

上海賈履
上撰傳

錢寶青字萍砭內閣學士樾曾孫幼岐嶷能文章道光辛
 丑成進士由戶部主事荐擢至宗人府府丞仍在軍機
 章京行走一典湖北鄉試一充朝考閱卷咸豐七年京

城鐵錢壅滯條陳疏通八年俄嘆欲派員駐京桂良花
 沙納先與照會允准然後奏聞寶青疏摘原摺有駐京
 是否另有詭謀實不敢信等奏則是姑爲是請以貽朝
 廷憂他日准行之害君相任其咎而彼已先事聲明其
 立足不爲不穩應請宸衷獨斷應剿應撫悉歸僧格林
 沁督辦桂良等立與罷斥九年奉詢湖北軍情歷陳官
 文胡林翼和衷濟事規畫四路進兵誘堅守之賊使之
 野戰復沿江躡擊俾疲奔命楚軍成敗視林翼去留爲
 轉移毋任撫臣以奪情爲不安許離署任言中機宜悉
 嘉納之仕至戶部右侍郎都察院左副都御史

節錄
國史館

傳

謝字澄字石雲由廩貢議敘任甯晉縣滹沱河水溢設筏救民無算西陲用兵轉餉有功保陞知州後因盜案被

劾歸工詩畫著有傳雅堂集新纂

曹銜達字子安善記誦卯角讀時憲書三遍覆不遺一字

年十二九經三史已畢酷好三蘇文謂老泉峭潔東坡橫厲樂城容與我欲合而一之初入試文無破承某邑宰大駭黜之繼同學示以式笑曰易耳逾年再試遂冠童子軍旋食餼道光戊子北闈南元癸巳進士以知縣

用簽發福建時閩中方苦旱大吏屬僚屬撰禱龍王廟

文伸紙濡墨詞成典博懇切某中丞才之遂檄飭知邵

武縣事決獄引經準律翕然有聲旋署知府卒任所新纂

盛錞字瘦金廩膳生道光登極 詔舉孝廉方正邑人舉

瘦金應後中壬午鄉榜大挑分發河南知項城縣事有

鄉民以開堰細故惑堪輿家言訟案久懸錞履勘諭曰

地理六經首郭璞及身不善終且無後其難憑可知况

今開堰灌農田普獲利遂呼民壯畚鍤之民理屈不復

辨有同族爭繼殤者執曰殤不立後產宜瓜分折以禮

經為殤者以其服服之眾議阻決案坐堂皇戒役勿辟

人將定讞問眾曰合理乎否眾言毋隱聽訟悅服稱賢

父母歸田後質樸率鄉里婚嫁勸勿從奢後進衣冠不

正不敢恃其側

新纂

孫正錯字雲浦中道光壬午舉人以知縣分發四川歷署

清溪新津榮縣射洪夾江補鹽源升成都府同知貞幹

廉明所至有政聲尤善讞獄疑不決者皆平反無枉不

事刑求民以情告罷官家居足迹不入公門

孫氏誌狀

孫爾榛字酉山歲貢生幼不好弄祖兼金病足淹牀辱父

汝蓄咯血均侍奉寢室竭誠事湯藥甫入小學習楷法

兢兢點畫程子所謂卽此是敬之意已能領略長敦內

行家庭間片語怡然中理便消嫌隙交友偶訂言誓不

更易艱窘忍饑一二餐緘口不稱貸授徒督幼以少儀

範長以文律敝衣蔬食躬行示儉經造就者知爲西山

門弟子也光緒紀元邑人公舉孝廉方正蹙然曰名實

之間克稱爲難卒時太息猶以無裨名教爲憾云

新纂

章裕善字竹虛性孝友方介道光甲午舉人大挑以知縣

分發江西咸豐三年署吉水縣值粵逆竄金陵江右戒

嚴裕善練勇守禦五年賊圍郡城分擾吉水登陴固守

自然礮擊賊賊已緣城而上十二月朔城陷裕善章服

坐大堂濡硃筆書案上曰勿傷吾民遂遇害事聞

百優卹予雲騎尉世職

新纂

馬世鑑字衡齋邑庠生授徒自給庚申粵寇至城陷趨詣

明倫堂正冠巾自經於齋房

新纂

[Faded bleed-through text from the reverse side of the page]

嘉興府志卷五十五

嘉興府知府善化許瑤光重輯

列傳

嘉善縣

孝義

明

丁長如字海鶴其先從宋南渡居嘉興永安鄉卽今丁澤
析縣隸嘉善長如生元季明洪武初徵授黃州府倅告
歸宣德時析縣興築長如年逾八十率子弟爲眾倡撤
廳事改構明倫堂撤岸石爲麗譙址縣令李遜以其賢

祀于鄉郡丞曾維倫為記勒石賓其六世孫也嘉善志

王仁本字樂山元末寇亂避居清風涇慷慨好義嘗於洪

武初獨建圓明橋曹相駿楓溪小志

陸琦字文璐汾湖人宣德中父坦將建學宮不果而沒琦

承父命捐地復建義塾於汾湖之陰學士曾鶴齡為記

浙江通志

顧琮字宗玉號樵雲好善樂施詔旌義民子文昱字怡松

天性孝友父年高與弟同構怡養堂奉之景泰間輸粟

五百石佐河防費賜冠帶文昂字怡筠郡庠生歲饑賑

粟施棺焚券捐逋晚年治地得錢鑿井作亭覆之以便

行汲楓溪小志

支茂字宗衍幼孤弟榮甫三歲遵命不析居貢吏部授樂

安丞奉府督租有王某者貧欲鬻女以償茂為代輸女

繪像祀之浙江通志參嘉善楊志

趙純字希文以舉人授階州學正初學於項襄毅忠正統

己巳傳忠死日夕泣奠後忠還柄用純適遷襄王府教

授有將校坐法當刑謁純求解卒不以私撓法忠益重

之嘉善楊志

周玘景泰中兄當戍五開玘年十七慨然請代父兄不許

有司亦難之玘曰家貧役重非兄無以養親請益力官

不能奪

浙江通志

江吉字季正以舉人令萍鄉有政績告歸事親色養備至

徐鵠由掾敘官倉大使父久病竭力侍湯藥以勤瘁卒

吳志參

褒祀編

王尙賓字肖峯貢生趙府教授動無越禮嘉靖間捐田一

百二十畝後學使者于學租內每年奏銷扣給銀十兩

以助其子孫為祀讀資

孫顯字顯一明洪熙時以儒官奉詔親早沒終身蔬食祭

必哀遇人急質貸以濟子麒孝友有父風

以上嘉善戈志

魏邦直字君賢少喪母懷慕不置事舅氏如事母居家友

愛慈和終身無疾言遠色鄉里化其德行卒私謚康惠

子大中

嘉禾徵獻錄

葉守德字小江與弟守禮友愛自置田八十畝與均分且

時以財給之子翹拔貢為昌樂令

吳志

倪津字雲橋萬厯中遇水旱散粟施糜建午莊橋撫膳糶

獨官給冠帶旌之壽九十

浙江通志

章普音筆工也事母以孝聞母歿刻像以祀顧昌鑷工也

母年八十餘患痢且革昌日往里中真武祠稽顙祈以

身代度不可為即於神前剗心探之不得割旁膜煮羹

進母已數日不食聞其氣香甚食之頓愈每陰雨瘡痕

痛楚不令母知昌年亦九十餘

嘉善志參
浙江通志

鄒昊字孟昭母年七十因夫昶故慟喪明昊延醫治之不

愈朝夕禱祀俄而母兩目中各重生一瞳復明如故

劉志

錢春字應仁以進士為行人和粹孝友人以非禮加之置

弗較拜監察御史卒祀鄉賢曾孫天允以進士官兵部

郎裔孫永善母病刲臂以療邑令旌其門曰純孝重光

以春亦嘗割股云

劉志參嘉
善楊志

孫奎字山隱幼孤事母篤孝營三世墳塋積學好義以博

士徵不赴年九十三舉鄉飲賓

吳志

沈槩字一之居憂蔬食三年臥起不離喪次考定四禮尤

嚴于喪祭兄槃性嚴毅承順得其歡心師事張東溟福

友魏莊渠校邵端峯銳學益淬勵島夷寇三吳槩抱宗

祔祭器避之郡城著布菜翁傳以見志著有鄉約釋義

筆思記時務議詩文集

兩浙名賢錄參
嘉禾徵獻錄

陳謨字昌言父吉應貢卒于京謨扶柩歸哀毀骨立繼母

悍數欲致謨死謨事之益謹以已所居產讓弟母卒感

動晚應貢不仕卒

浙江
通志

沈稱字子德科弟諸生奉父母不違左右有事必長跪請

科謝政歸寢食必共家有二狸各育而共乳人以為孝

感袁

志

顧態字汝美少喪母父納一婢挾父勢凌態事之益虔積
館穀置田百餘畝與婢所出弟均析之父死婢就養二
子態曰父之所愛亦吾母也豈以存亡易心乃舉父遺
物委諸弟畱婢養之終身貢授涇縣訓導崇祀名宦鄉

賢祠 浙江通志參
嘉善楊志

郁本宗字和川有至性父病割股進未痊再割以進以貢
授吉水丞署邑令修葺文信國祠歲饑賑恤人稱慈母

歿祀鄉賢 袁黃傳參
嘉善楊志

周寅字汝欽奉母至孝安貧守義嘗有盜其桔槔者已而
復還曰吾有慚于周君寅博覽強記嘗纂修郡志集註

小學校正四書音考有百櫟堂稿 橋李詩繫參
嘉善于志

陸申字天厚父忤劉瑾下獄刺血上書寃得釋以貢授楚

府典儀世子英燿弒逆官僚受賄不言申獨踰垣告變

英燿伏誅獄竟致仕歸 嘉禾徵
獻錄

陸道乾字子勉歲饑以私積散宗人兩兄早世割產恤其

孤困宣公墓在忠州乞官蜀府紀善著吳山漫稿孫輝

錫集其遺文行世 橋李
詩繫

吳儒字汝為積學工文貢授儀真訓導與醴使陳有舊商

人持金求援固卻之歸田十餘年吟誦自適 嘉善
章志

孫嵐字汝瞻孝友終身為孺子歡代兄任劇役好施舍飢

者予粟暴露者掩埋子朝宗以舉人令順昌嵐就養行
事必請命有異政三年將報最促之歸曰爾樹德于民
旋養志於親兩得之矣遂奉父歸嵐百歲建坊旌表有
司歲廩之設者英社推嵐為祭酒

嘉善楊志

顧脩字可葵由吏部掾歷官曹州同知解任歸里畱心元
學製藥濟病弟傳號九槐進賢縣丞母病乞歸破格予
告冢宰萬鼎元舒撰歸養序贈之補上海縣丞陞九溪
衛經歷以母老不赴嘉靖甲寅倭寇風涇脩與傳衣冠
往見諭以大義同遇害

楓溪小志

錢繼科字忠所父病踰年一夜數十起父構新居讓于弟

居鄉寒予續飢予糲病予藥道殮予槥贖故人之子助
疫死之喪予士升士晉皆為名臣弟繼美字成所諸生
遊南雍謁選授江甯丞念母年老棄官歸蒙師李某死
子幼推解衣食委曲安置之族妹適沈寡挈之歸好善

如兄

袁志參浙江通志

丁鉉字九玉光祿寺丞以父病不之官歲祿傾囊以濟衣
食醫藥日不暇給蠲田五十餘畝備春秋學宮之祀邑
令上其事朝議旌之

袁志

孫光祖字豹韋孝友力學少遊王守仁門以明經授湖州
訓導遷開化教諭所著有龍賓堂稿祀鄉賢孫在鎬崇

禎丙子舉人

袁志參嘉善楊志

褚附鳳字梧崗貢生性耿介教授里中授吳江教諭師範嚴肅陞縣令不就

孫宏祖字致虛諸生讀書過目成誦淡仕進常以敦行教

子弟次子世芳字蘭林日誦數千言弱冠同從弟兆昌

登賢書令瀘溪清慎有聲改青浦令未而月解組歸子

世芬字子庸諸生年十五父病顛天請代及歿事祖母

以色養世遠字子毅亦以孝友稱

以上嘉善楊志

朱國望字士翹舉人崇禎中舉賢良方正不赴幼失怙箠

燈夜讀輒泣數行下及長師事高攀龍所居嘗苦澇國

望倡義鳩工築堤千丈鑿渠二里許民患以蘇歲饑發

粟賑濟子顏復曾省舉人孟淑程涓選貢張銘進士官

行人

嘉善楊志參橋李詩繫

沈春山字愛梅孝友好施鄉人欲鬻女償債山為代償又

捐貲築斜塘環秀橋高泰字以彙安貧嗜學弟升廢疾

撫之極友愛處人和易鄉黨重之

吳志參嘉善楊志

王任相字爾玉日積籌記善行里黨稱貸歲歉弗責償更

應之有鬻子者焚券給以資

袁祀編

孫峯字仰山貢生所居東郊外衆水交匯處名堰兜不通

舟楫白于官疏通水道建石梁行旅便之子朝寵字賓

湖廓父志易方梁為環洞其他好義亦如父
浦廉字若虛葬親擇穴旁有二絕冢地師謂宜移去廉曰
久埋之骨何可毀隣人為債家所逼將搯死弱女陷索
逋者廉聞遺金償所負女賴活夫婦壽俱九十六

以上嘉善

戈志

錢吾仁字廓如父貞官汝甯府同知以代覲卒京師吾仁
聞訃哀號徒步入都扶櫬行數十晝夜兩足俱裂幾不
能支苦塊三年如一日奉繼母吳若所生吳待之甚嚴
吾仁事之益謹後感動無間言

浙江通志

陸維祺字九如國子生孝友敦行歲饑死亡載道維祺典

質買棺殯殮買米賑濟全活數千人卒祀鄉賢

浙江通志參嘉

善楊志

顧朝樞字仲執際明次子舉人性嗜學好義戚友緩急無
不應負亦弗較兄朝衡失父歡樞周旋曲至

嘉善楊志

周丕顯字知微舉人敦孝弟重氣節天文地理兵農禮樂
諸書洞悉原委邑中有大興革皆折衷之弟丕承字君
烈重然諾邑蝗倡義勸糶施糶掩骼傾資無吝色

袁志參嘉

善楊志

沈懋德字雲高幼失怙恃歲時致祭輒飲泣兄性豪邁廢
祖產勿較隱居查溪課子孫誦讀歲饑倡議平糶有負

逋者以女償卻之焚其券緝有五倫坊表錄

丁洪夏字養凝父病擇醫進藥口不甘味者累月及卒廬

墓哭泣洒樹樹為之枯以副貢授官母老不赴魏忠節

被逮竭蹙稱貸以贈歲饑出粟賑濟崇禎辛未詔訪地

方人材撫按疏薦授常州府通判辭不就

以上嘉善楊志

夏繕字季脩舉人倜儻負奇耽經史與魏學泚討論無遺

義不事生產事父尚文典醫承歡與夏彝仲交契不通

譜牒嘗同陳幾亭周知微究心實學知微沒輯其遺文

行世

誌行編

張所見字曉生更名介號吉先崇禎戊辰會試副榜授司

理不就性孝友累世積善歲大祲飢者賑粟寒者給木

絲設鄉塾建塔瘞暴骸戚黨婚葬必賙修築津梁葺古

今格言以訓子弟

嘉善楊志

魏廷薦字無咎忠節從弟諸生潛心河洛之學箋經註史

為後學宗法敦洽姻黨有大事傾資濟之所著有息踵

居集以子學渠貴 贈官

蔣蒔字若子貢生所居遭火從烈焰中負父出母喪茹素

三年有友負千金後因事陷獄復捐金以救弟卒贍養

遺孀立繼析產讓以膏腴買婢詢為士人女亟遣歸

橋李詩繫

孫應文字懷川母病劇割股進負財不償者檢券焚之至

家貧壁立無悔以子籀貴 贈南汝道副使吳志

王道隆字爾愚性至孝姊適郁早世撫孤甥授以田宅如

己出妹壻沈逋賦二百石代為輸納親族待以舉火者

數十家歲旱蝗捐賑三百石復倡議平糶全活甚眾出

私錢募人捕蝗縣令劉大啟旌其門浙江通志

孫忠字忠一父嘗溺水為風浪擁去忠投水披父抵蘆渚

獲免母病侍牀褥數載無倦容季弟達早世母以哭子

失明忠刺血書金光明經竭誠籲禱瞽障復開二親相

繼亡廬于墓側旦暮號慟孺慕至老不替嘉善志

錢清性至孝父遇盜將殺之清哀求代死得釋妻曹氏遭

兵投河死悼之終身不娶褒祀編

張念省字覺源廉靜剛介年未三十喪偶不更娶撫姪芷

為嗣旋天芷兄茁又卒撫茁子可賓教育備至賓力學

好善篤行誼嘉善志

孫叔呂號士諧國子生考授光祿寺署丞戊午中副榜居

鄉倡舉利濟事邑人蒙其惠父朝宗純孝叔呂亦曲盡

孝道嘉善志

王周官字存樸幼有孝童之目母疾中夜起祝願以身代

事後母盡歡心隣有以室售者價既倍而復據之周官

出私錢俾滿欲而止袁志

孫枝良字遇明遊雍有聲親亡哀毀垂絕父妾無子養葬

以禮待前母兄友愛彌篤歲祲多方賙恤嘉善志

陸敷樹字暎萼母感心疾調護十餘年弗怠待異母弟二

人不別籍異財嘉善志

郁期字幾先郁際字兆先兄弟敦倫尚義族黨有三十未

娶者婚之三喪未舉者葬之歲饑出米百石以濟蝗灾

復施糜三月全活甚眾吳志

毛士龍字伯乘諸生坦易不事矯飾出為伯父尚忠後尚

忠舉子力請歸宗分授辭不受母病顛天求代父母歿

哀毀不欲生撫幼妹遣嫁盡禮友愛弟士麟事祖父母

備極悃摯兄弟終身無間言袁志

戈用忠字蓋臣以歲貢授隰州知州性敦厚決獄平允用

杖輒流涕丁內艱攀轅載道歸家杜門著書嘉善志

繫

蔣鑑字永徹歲貢事母菽水盡歡有友寄金而歿其子不

知立攜還之嘉善志

孫養濂字浴凡貢生恬靜不求榮利授江西安仁訓導不

赴父歿毀幾滅性兄養源遘外難悉力捍之從兄養佐

賃其第不戒于火折券勿問袁志

朱顏復字克非國望子天啟丁卯舉於鄉布衣素履不妄

交接嘗道過武進其令為同門生疑有所謁屏人曰子

有欲言乎顏復正色曰無所欲言也即促棹去年三十

七終病革弟曾省涕泣曰兄幸勿怖張目答曰死生有

命何怖為言迄逝顏復文章夷雅詩參韋孟著鹿柴咏

藏于家曾省字魯參崇禎丙子舉人甲申之變痛不欲

生作自祭文以卒弟程淳才名與兄頡頏順治甲午選

貢痛父殞于賊手懷七刃執仇者再嘔血而亡高士傳參新纂

案舊志朱國望傳不載被賊事此言痛父殞賊手未詳

毛尚質字素庵性狷介重然諾兄尚忠令清漳困疾千里

扶掖兄卒撫字藐孤辛勤備至季弟新居遭火代為繕

葺析產推肥居瘠鄉里稱其友于嘉善楊志

錢棻字仲方士晉子崇禎壬午舉人少失恃事繼母盡子

職流寇披猖閣部史可法招至幕下辭不就溫清如所

生暮年著書大滌山有熹宗邑乘讀易緒言莊子緒言

諸書子黯有傳構李詩繫參嘉善楊志

孫紹祖字君裘遊北雍為倪元璐器重母病目刺血書光

明經忽復明繼得危疾禱北辰祈代凡四十九日甦袁志

陸奇字平侯諸生慷慨好義蝗災減價平糶冬夏施蚊幃

絮衣暴骨樞痊所交皆寒士歲時餽遺勿絕

支允堅字子固如玉子性篤孝父病疽吮之嘔血幾斃及

卒哀慟欲死明季民解白糧繁重應者破家允堅上書

陳北解十弊直指左光先用其言勒石禁革

以上嘉善楊志

郁性善字承泉天性至孝父京病疽吮之立愈嗣父觸怒

豪貴遭冤獄善走千里白父冤跋涉成痼疾謂其子曰

父母全而生我我以父故致疾當復愈疾果瘳

袁志

毛士麟字文石母卒勺飲不進事兄溫克內外事悉諮而

行弟士望病篤哀號籲天醫藥必親歲饑減價平糶湖

寇焚掠出粟贍族人四方知交攜詩文來者解榻盡歡

乃去

李悅字聯河生數月倭寇至母抱之奔避度不得脫泣而

置之橋下越宿寇退母往撥草視之酣睡如懷中父母

歿兩兄以悅出贅錢氏仲兄亡悉以家產讓遺孤子二

然字元實剡字元晦然諸生博覽洽聞剡援例入雍拮

据恢父業嘗曰智勇仁強缺一不可否則田舍翁耳然

子嘉生順治甲午舉人剡子振宗康熙甲辰進士

以上嘉善

楊志

孫世蕙字仲晚諸生篤倫嗜學有以醜餌世蕙父世蕙覺

之急取嘗嘔血數升暈仆逾日始甦是秋讀書樓下隱

几聞神呼曰孝子速起蕙趨出樓柱遭霹靂矣著有雷

耕堂集

懿行編

孫世選字在公諸生家貧授徒束修必奉父與兄甚友愛
 出處必偕父母俱年七十一日同逝世選一慟而絕袁志
 徐汝璠字孔望諸生祖知禮字敬渠有千金貸程某歲饑
 不能償璠遵遺命焚其券善事繼母新溪萬安橋圯捐
 貲創建里人誦之

沈之治字修能兄之浩字天如皆諸生友愛寢食必偕之

浩慷慨好施予遇貧交曲加周恤之治每先意承之之

治卒妻守節三十餘年當事表其閭以上嘉善楊志

錢天相字輔之春曾孫文行推重士林與陳山毓龍正丁

洪春洪夏訂道義交著有豫遊草晚而好學兄天錫字

法巖持身清介長子汝元事親孝著聽松軒稿嘉善崔志

李標字子建精於戎機戰略軍律營陣王遁諸書史可法

辟為記室後可法死揚州渡江會葬其衣冠于梅花嶺

歸而繞屋皆種梅賦詩三十首蓋自託于西臺謝參軍

云著有東山遺稿靜志居詩話

周宗宜字敬生父成禮折節好施歲大水禾稼漂沒寬量

貸粟不責償宗宜居父喪哀毀逾禮仲兄宗榮早世遺

孤振豐甫四歲撫育教訓體恤備至他若周貧乏置祭

田建橋梁為德于鄉甚多

蔣芬字去華父小江隨兄英宦遊悉以家業付長子分產
 不問肥确偕魏學泐講濂閩之學璫禍作魏璫誣贓數
 千金捐貲代納吳門張溥倡復社推為領袖遊北雍會
 流寇充斥上命卿部各舉經術一人侍郎姚思仁以芬
 應詔念母年高辭不就啟聖宮圯獨任修葺歲洊饑貴
 糴賤出著有孝經疏義

柯茂林字秀崗父得仁累世忠厚茂林侍奉甘旨溫清維
 謹兄成林字萃崗歿于王事遺孤三人以已所置田產
 分授曰我不欲使我子獨豐也

陸靈海字若生父輝錫早失怙叔遭無妄白其冤令惕以

刑不屈試以文奇之遂得釋兩中副榜撫異母弟友愛

肫摯遇人急難必多方拯救舉鄉飲賓

以上嘉善楊志

魏愷字嘉虞大中從子性恬靜不矜崖岸詩文有逸氣侍

大中二十載服膺遺訓終身勿踰尺寸兩舉鄉飲不赴

易簣時囑其子曰勿怛化勿奏樂勿作佛事

嘉善楊志

魏學洙字子聞諸生大中少子兄學泐死學濂走闕下學
 洙侍母錢患難中能得歡心里人有踐更之役諷洙緩
 頰致百金洙曰此輕則誰重且干澤非分寵賂非德靡
 之去侍母疾心力瘁竭母愈洙竟以是殞年僅二十七

浙江通志參嘉善楊志

沈大政字為吾事親孝待庶弟有恩戚族子女無依者撫

養得所修宗譜創祭田晚舉鄉飲賓

嘉善楊志

錢燾字子壽士升孫恩廕中書舍人不仕鍵戶著書嘗論

晉陶潛多彭澤一出生平志尙可想見所著石語草堂

集八卷史論二卷

伊志

蔣士宏字耦萬諸生疎財好施嘗代族人輸漕七百石又

以千金之居贈一貧孝廉後孝廉宦成不責報好讀書

無所不覽漳浦黃道周深器重之復社陳子龍夏允彝

輩皆為忘年交壬午陳入淞聞出歎曰吾分校而失蔣

耦萬彭仲謀當不復論文矣老手一編不釋著麗農集

嘉善戈志

王衍之字甯野父歿茹素終身家貧遺田數畝讓兄鬻之

精岐黃術治疾輒愈不受人酬從子憬字一庵嘗遇異

人授金丹秘旨善療人疾對坐佈烝沈疴立起

嘉善崔志

龔黃字孟循少工制義因母疾潛心岐黃濟人甚眾敦友

愛讓其宅於兩弟弟潔字楚仙敦倫好善壽九十三

嘉善

戈志

曹爚字舒光諸生父以入火救親柩病廢爚日侍左右扶

持無少懈售己分產償弟負著有鈍畱齋集

浙江通志參嘉善戈志

志

龔在明字幼霞諸生恬淡不矜榮利絕意進取撫育諸孤
姪捍禦外侮誨養幼弟在璿辛勤備至弟亦事兄如父

嘉善
崔志

蔣睿字正言憲副英子諸生力學嗜古邃于理學奉母盡
色養及歿泣血三年居常恤孤寡葬露櫬賙乏繼匱三
黨德之著有聽鴻樓集

錢森字秋聲諸生親歿廬墓三年以敦倫立品訓子弟舉
鄉飲賓壽八十二以上

李策字獻之性剛直仗義里有不孝者策至其家痛杖之
後其人以盜陷策宛轉得雪生平篤於愛敬兄屢棄產

捐資代贖教子多義方子孫克世守焉楓溪
小志

李學孟字醇卿號慕雲唐元和中真靜者避亂至吳家
華亭之楓涇鄉世有顯人學孟贅郁寵家郁翁無子學
孟從容諷使納姬姬有子遂謝去不持郁氏一錢後郁
貧輒出資收葬郁翁夫婦子自華舉進士及第為史官
不色喜及身自有封猶衣故衣至京師得大官珍膳輒
歎曰吾故羹藜飯糗時有此耶以誠自華無忘上恩申
時

行撰
墓誌

潘師正字斐伯家貧親在淺土以麻束髮者三十餘年師
事劉念臺黃石齋與陳獻可魏子一交善精醫學濟人

奇中子遵字康先養庶母弟姪終其身著有脈緯等書

以上嘉善戈志

蔡浩字宗孟幼失怙嗣于從叔尋又亡明末寇盜充斥浩

扶母及弟潛匿鄉曲屢撻鋒刃以孝感獲全授徒奉養

曲盡孝道繼母失明求醫露禱踰年復明

懿行編

劉啟先魏忠節公鄰忠節構閹禍被逮劉更姓名為僮僕

從入獄忠節拷掠之慘皆親見之輒痛哭為整額帕覆

背衣驅羣蠅之嘬膚者忠節獄事劉實始終之視王鳳

洲應養虛之周旋楊忠愍者蓋無不及焉

真有益齋文集

呂元聲字惕輔諸生父被誣羈閩奉母盡孝綜理家政父

還盡色養刻意勵行尤敦友愛舉鄉飲徐公石麒麟為立

傳子逢申諸生性孝友

嘉善崔志

國朝

錢棐字子輔繼美孫八歲賦白燕詩傳誦一時登順治壬

辰進士痛從兄柵慘亡撫其孤再世無間築託園于東

郊扁舟往還足不入城市

吳志

魏允柵字交讓忠節孫廕入南雍事節母嚴盡孝病篤禱

神刺血書孝經及歿哀毀骨立茹齋十五年博極羣書

著有維風備忘鈔詩玉詩穀

嘉善戈志

李西涇任俠好義本朝初定鼎尙踵明舊政庫以有產

士民值宿順治三年西涇女之子范廷桂與是役適值寇入城庫儲劫去因獲重累西涇破產助之廷桂得脫

新纂

許巢字爾雍四中區許家埭人父鼎宰遊南雍聞母變倉皇奔喪以孝聞一友人入書齋匿多金反誣僮侍或白之宰曰母指發以傷友誼友感愧密投金還更有友會厚貸歲餘死子幼來償逋宰偶出紀綱踰額收彼不覺也宰立召還叔氏幼失明艱薪水暨族貧不能婚嫁自存者飲濟之至巢尤純孝叔父仲升無子捐館哀毀骨立父中風痰寢臥牀第視湯藥目不交睫歿痛哭幾絕

辛巳夏蝗道殣相望施粥活人無算

國朝順治丙

戊徵辟遺賢準作貢官固辭不受

見顧陞撰行狀參許巢行述

孟重德字尊素號治宇亞聖六十一代孫高祖良居孟家堰重德幼喪父內外交侮賴中表韓伯淵力持得存田三十畝供膳讀以歲貢就試見魏忠節被逮絕意仕進卒贈儒林郎子春先嘉府廩生入貢授司訓不就居城西南隅衡木為門學者稱衡門先生

楓溪小志引孟氏南支譜

孟春和字穎儒諸生母徐早卒以亂故不知厝所稍長涕泣不已有老嫗自遠歸謂曰吾子曾言汝母殯椿樹下顧從軍去十年矣春和詢其狀貌歷四方求之數載遇

于泉州偕歸指殯所恐傷遺骸以手代鋤十指流血撿一齒不獲哀號顛天以泥中得之獲全葬廬墓三年隆冬不忍去染疾卒

浙江通志

李雲鵬字松庵母范氏患日幾瞽舌舐五旬得愈迨母歿喪葬獨任樂行善事還遺金無德色

程士文字煥然太學生讀書明大義國初藩變近郡採

辦大木督造戰艦賠費千金遇里黨雀角事輒破囊排

解貧者施鍼藥死者助棺槨道路遺齒買地於白牛蕩

側建塔收瘞當事嘉之給扁額曰德及重泉

以上楓溪小志

鍾仁字振寰性謙和敦實行故交藍縷者解衣衣之父子

祖孫相對怡怡壯者勸力善少者勸力學年八十餘舉

鄉大賓

呂三錫字命子精繁露法言諸書與錢棻徐彬臣劉芳以

文章名入闈置副榜益篤學著書家貧授徒以給授永

嘉教諭以行誼勸諸生風教一振

盛國友字賓王諸生好獎掖後進處族黨姻睦文行有過

人者以子際斯贈如其官

王珣字子璘諸生弟璋字啟明友愛篤至性母病璋顛天

割股事珣甚恭珣好施于親友匱乏無不恤歲凶鬻產

賑濟盜起劫掠村里過珣門相戒無犯當事旌其門曰

一鄉善士

以上嘉善楊志

錢象儀字瞻虛沈潛力學遊南雍一試不售棄去事親勤

恪父喪哀毀成疾而沒以子霞貴

贈官

嘉善崔志

丁穎詮字茲勉諸生年十三母錢卒哭絕復甦事父鑿竭

盡色養父病刺血上神疏願減己算叩顙流血父沒廬

于墓側與弟嗣澂裔沆孝友相勛年九十卒嗣澂字集

虛諸生事父能養志父歿寢苦膺痼疾比葬冢寒斷流

匍匐冰雪中病益劇臨歿痛不終喪囑用衰絰殮嗣澂

與裔沆元旦孿生甫免母殞終身哀慕令家人勿祝歲

裔沆字函巨舞勺入泮工詩文為陳維崧盧元昌推重

康熙戊午當事欲薦舉博學宏詞以親老辭不赴事兩

兄甚恭倡葺鬻序年饑施粥又舉廣仁會備賑他若恤

貧周乏資葬助婚竭力無倦嗣澂著雪庵文存詩存裔

沆著香湖草堂集

浙江通志參嘉善志

沈琳字玉衡諸生負異才淹博經史踐更之役獨任其勞

不分任昆季析產推腴居瘠親族里黨多所周卹晚年

好作詩著述甚富

浦之純字夔侯少工文長習經世之學交遊遍海內事父

天球盡孝父沒後舉所受分房產讓弟以敦本立學訓

子孫有豫章吟粵遊草以子文焯貴 贈官

嘉興府志 卷五十一
陳華允字克讓少孤奉母程曲盡孝道與弟友愛甚篤從
兄華育少失怙恃允事之如同懷生平樂善不倦教子
孫嚴而有法

蔣德學字子亢諸生值歲試聞母病馳歸例當除名不顧
父大彰好施竭蹶供命父歿廬墓十餘年妹字葉景榮
幼孤而貧招致教養為諸生後卒養妹嫁三甥女子閨
奇舉人力學敦行以上嘉善志

孫世遠字子毅少失怙事母色養周貧乏解爭競捐田置
義塚邑人頌德以子錄貴 贈官

陳五達字星瑤少孤與妻沈奉母得歡心有弟不治生產
三析已資與之弟歿膳寡撫孤久而彌篤子聖奇字伯
珍重然諾好施予友夏諸生鄉飲賓

劉孝字君升與弟伯玉敦倫樂善遇親族乖和者輒為解
勸人以橫逆加怡然順受歲大禋設糜食餓者所活甚
衆舉鄉飲賓子萃藻有傳以上嘉善志

盛濟英字千士事親孝養代納宗黨逋賦以恩例入成均
侍郎王度欲援薦辟例堅辭歸龔在選字達可幼入泮
博通經史資脩脯奉親盡孝養勵名節為詩古文辭立
就嘉善志
參崔志

張邦豫字立生築九里灣塘二百五十丈建橋十三周急

賑荒施帷絮置義冢重修郡邑學及縣倉廩皆有成績
孫景鉉字玉珂國子生亦助修黌序

魏文焜字孟明與弟文煥同居三十年晚始分析推肥居
瘠舉鄉飲

蔣鳴西字聞九痛父明經鑑宗卒於京語及輒垂涕授徒
養母撫弱弟友愛教及門勤懇無倦容以上嘉善崔志

陳華育少失怙母殉節死忌日必素服茹齋閉門悲泣自
少至老如一日迎養寡姊撫諸甥誨養婚娶同己子負
郭止數頃節縮贏餘以贍三黨冬授衣夏給帳施粥施
棺疾疫施藥建育嬰堂橋梁道路應修者無不捐資修

浙江通志

吳勳字曰放諸生好學立品居家敦孝友見義必為舉鄉
飲賓顧以恭字公安事親色養兼至弟不善治生屢周
之又割產分授從子宗黨有急傾囊勿倦顧氏向有義
莊恭復捐田二十畝暮年修族譜未就子維祚繼成焉

吳志參
懿行編

朱之榮字廉臣少孤事母孝兄炳好施與業中落推宅讓
產及卒代償所負置祖塋祭田延師課子戚黨乏膏火
者招之來學會賓興必傾橐賙貧士董率葺學宮貸錢
某屠某資入粵二人卒于外更出資扶其櫬歸築石岸

便行人舉鄉飲賓

嘉善志

周隆字履綬幼失怙事父盡孝慕范文正公義莊率二弟

陶陞置田二頃奉先之外以贍族姓友人金某葉某負

累百金焚券更周之歲饑賑粟冬夏施襦帳以為常著

有訓家恆言郡三舉鄉飲

浙江通志參嘉善志

葉允升字萬山事父母家貧必極甘旨與人交然諾不欺

龔在公字約苗宗黨貧乏者周卹不倦年未四十卒妻

錢養親訓子克守先業

郁輝字闇卿與弟五十餘年不析產課子弟以孝友張湖

字九逸幼失怙恃喪葬盡禮又獨任伯兄窀穸事舉鄉

飲賓

以上嘉善志

孫藥字芳巖孝事嫡母待寡姊妹恩義備至辛酉議漕事

持公論旗丁肆毒致疾不起子燾肇慶同知熙縣丞張

履綬字紫襄州同知事親孝慷慨好義鄉黨稱之

嘉善志

參褒祀編

陸應賢字耀莊少失怙恃有兩兄獨任殯葬為從子婚娶

析已產與之子觀政三歲喪母善事繼母庶弟

趙秉智字啟明昆弟六人獨侍養兄病割股投劑諸弟貧

輒代償其逋

嘉善志

金全璧字禹九諸生授徒以養親撫兩從子如子嘗館嘉

興有屠氏二子貧而好學其父欲令服賈全璧捐館穀

周之使卒業俱補諸生年五十餘遭父喪哀慟失明卒

毛植字子建諸生少失怙母嗜橘每出必市以歸庭栽一

樹母沒攀條哀號逾年樹亦萎撫弟訓從子恩情曲摯

以上嘉善戈志

程文字天章值明季負母避亂遇盜欲加刃抱母哀求盜

釋之父宏遠日失明朝夕以舌舐復明次兄世字百芳

諸生博學工書法子孫讀書砥行

朱紫字宸黼四齡失怙母多病每夜籲天願減算益親壽

以上嘉善崔志

孫或字荀若諸生父爾祥與李令陳玉善令欲于北郭良

隅建書院鑿河院東以利通邑風水就爾祥商之或踴

躍贊爾祥捐田十畝今柳洲亭東河道是也歲饑勸募

賑濟莫令大勳官收官兌法或贊畫居多懿行編

蔣廷棟字蒼符童時父僑寓吳間往來問視無虛月事母

曲盡愛敬家中落藉館穀以給非道義一介不取晚年

與同志唱酬門無雜交著有盟鷗集及家言百則吳志

丁璜字夏玉諸生工文善引誘後進經其指授輒登科第

去敦行嚴師範人咸欽重同學王景齡字以介諸生孝

事繼母嚴取與慎交遊與璜契嘉善志

陸樹本字子道國子生成童代父當糧役有與父同名懼法者以疑似幾陷獄本挺身赴辨得免事兄愛敬撫從子如子舉鄉飲賓從兄樹奇字正子諸生品行方正張元默字識庵待宗黨以和睦皆舉鄉飲賓子垓字宇涵以孝友稱懿行編

孫世綸字子佩諸生七齡喪父哀痛逾成人孝事節母昆弟極友愛償族子逋賦修學宮嘉善志

龔廷鈞字肇權國子生父在明沒析居讓宅於弟母病屏息伺起居五年不怠周人急甚多博學能詩文著嶺雲賦草穀貽堂詩集吳志參嘉善志

夏照字昭遠十歲喪母慟絕復蘇後以哭父致重疾弟默

字謚臣諸生髫齡執親喪盡禮待昆弟暨諸從子恩義曲至葬親時貧甚父執魏學渠致助默與兄照堅辭不受默子慥有傳懿行編

支宏化字寅臣遊粵東鹺使知其才延之幕擘畫悉中窾要居粵久凡浙西之來客者居贈斧資沒營扶櫬授縣尹歸恤三黨匱乏葬三世墳墓生平義舉多類此嘉善志

戴家理字爾齊國子生年十五侍父舟行遇盜奮身捍禦得脫赴水亦赴水掖父溯游里許獲救免性喜施濟待昆弟及諸從子尤友愛

曹爾樽字古卣少負雋才因母病精究醫理待弟六人極友愛一妹寡居畱養終身中表兩弟為其兄所不容養諸家悉為婚娶與弟奕雲輩俱工詩著東干小草

孫復輝字含石父籀病篤復輝療治百方憂勞成疾猶強起侍湯藥事嫡母生母皆得歡心平生敦友誼舉廣仁會以濟貧乏工詩文書畫以貢遊成均以上懿行編

汪文源字聖傳父士俊病篤偕弟文瀾勤侍湯藥父沒遵遺命同居數十年一門雍睦妻亡不再娶歲祲施糜粥子楷字端書弱冠為諸生讀書砥行早卒褒祀編

孟世奇字曾唯亞聖六十四代孫諸生家貧授徒奉甘旨弟早歿存恤其孤寡嘗鬻田代償外祖逋賦兩還遺金嘉善崔志

費道成字永修州同知事繼母汪待幼弟道登曲盡心力施予親族不倦孫銓字文衡幼失怙母病危籲天虔禱得愈製丹藥療人冬衣夏帷捐施不倦嘉善崔志

曹春字涵生父疾割臂以療從子幼孤失所族人貧無以娶皆撫恤之歲祲捐粟施糜粥代宗黨納逋賦懿行編

朱秉義字咸中諸生事親終身孺慕親友有急輒周卹兄秉仁歿撫其遺孤張元杰字秀英父喪慟絕復蘇者再事母孝養三十餘年母歿哀毀盡禮為人廉謹篤同氣

嘉善戈志
參懿行編

金文遠字鳳山有友人負千金以其貧竟焚券歲祿施糜

同里諸生江南秀字令則敦學力行亦號長者嘉善戈志

陳仁字元愷考授縣丞父華育病劇割股和劑孝事嫡母

諸母待昆弟友愛周恤三黨倡育嬰堂遇善事竭力行

之懿行編

張埴字夔典貢生父諸生元熙字淡明曾代幼弟踐更不

辭艱瘁埴事父盡孝遺妾無子事之謹戚黨匱乏者多

方伙助築陶圃於南郊隱居課子不與戶外事嘉善戈志

胡允滋字來修康熙丙午武舉父愛客招戚友置酒肴以

娛之撫幼弟膳寡妹恩誼周摯著詩與及竹亭存稿子

然諸生能詩文李濤字符九父中風臥牀扶持不離左

右者十餘年母九十四終時濤已踰六十晝夜號慟哀

動旁人歲歉貸租晚年究心醫學嘉善戈志
參懿行編

徐善建字孝標貢生幼喪父哀毀若成人事母葉色養兼

至母沒號慟嘔血數升從陸隴其學教人讀小學字義

諸書謂先識體段方可下手與馮異字漢良交最契延

課子若孫馮篤信謹守士也同里王又維字觀光貢生

授徒養親闡發性理諸書鄉黨奉為人師嘉善戈志
參褒祀編

孫廷鑾字御安諸生父世偉博學嚴毅足疲不良于行鑾

出入扶持惟謹痛兄鉞早世言輒淚下子浚舉人汪士
 俊字繼美少失怙母守節負病十餘年奉事不少怠夜
 扶母榻前有毒虺蟠其足久之竟無恙濟貧周乏樂善
 不倦嘉善崔志
參褒祀編

費宣字紀龍本姓符出嗣外王父改今姓事母孝與人交
 始終不渝雍正初 朝廷慎重牢獄令州縣擇良吏典
 獄事時縣令邵煜察宣才委之嚴鍵鑰清桎梏故事重
 辟囚仰食官廩他囚否飢斃相踵宣傷之出家財給餼
 粥不足則走告鄉里募濟錢粟絲是多全活五載當代
 復留之計十年隨事救濟鉗赭嘉賴章愷
撰傳

劉萃字可佩諸生篤孝友撫教異母弟藻妹適夏振璜早
 寡常周卹之誨幼孫成立藻字映淵諸生八齡生母病
 且死抱屍哭絕母忽甦曰恍見一老人救母子皆獲全
 事兄嫂如父母萃子傳彪有傳誌行
編

程雄飛字雲翼考授州同知敦孝友推誠接物壯遊四方
 當事折節與交居鄉力培後進惠逮嫻黨子輝祖緒祖
 並授州佐靖祖崖州吏目多善政黎人不靖入洞善撫
 之州賴以安嘉善
崔志

戴六用字聖萃事親色養親沒廬墓三年風晨雨夕嘔血
 哀號墓傍產靈芝數本終身不御葷酒族兄患中風臥

牀三年大用代謀薪水措藥餌及沒經紀其喪姊適李

寡無子迎養于家

浙江通志

張鴻隱字柯山精岐黃父文光為毒蛇傷足成廢疾隱晨

負至堂洗瘡敷藥晚負安寢而後退數十年如一日

吳志

陳泰字堯階州同知事親孝待諸母及弟和而有禮施及

三黨育嬰建橋每偕諸昆季協力從事子廷聰有傳施

達字儀吉州同知孝友好施

潘士龍字華林兄弟不析產還遺金友死出資以殮以行

善訓子郁如彥徵孫翔九雲九好施不倦置義田贍族

顧鼎恆字輔華至性篤實父向令蘆山歸宦囊蕭然恆以

脩脯奉養甘旨必備兄弟雍睦處鄉黨樂行善事子洪

憲貢生孫樹本入成均俱敦氣誼有祖父風

程錫珪字天玉母朱病劇割股作羹進教兩弟成立嘗還

遺金子法稷輩皆孝友吳承立字君植親沒哀毀泣血

每祭悲號不止

王誕錫字觀上諸生少孤事節母盡孝歲游饑減價平糶

百餘石嘗遵母命夏施帳冬施襖累年不倦獨建太原

橋行人頌德子學洙國子生以孝謹聞

以上嘉善志

夏慥字非遠舉人八歲失恃盡哀如成人父沒哀毀嘔血

數升幾不起歲時必廬墓事繼母孝養母病典鬻奉參

餌衣不解帶婦陳日夕進乳於姑後慴沒子鎔尚幼從

兄學遜撫成立人多重之

浙江通志
參嘉善志

陳禮字天敘國子生父及生母皆早卒育于嫡母張禮先

意承志曲盡孝謹母沒後念輒流涕兄振諸生早卒以

子廷玉嗣撫仲兄孤孫二撫育教誨竭盡心力生平好

施予樂善不倦子廷瓚廷玉俱克家敦行

蔣兆增字甯遠憲副英孫貢生少孤力學奉母不違左右

友愛弟妹三黨中貧不能養死不能葬者盡力周卹之

敦實行無倦容妄語陸隴其稱其有儒者氣象

以上嘉善志

夏惠疇字訪陳國子生幼孤讀父書輒慟哭母歿哀毀盡

禮歲時哭諸墓年饑減糶子敘倫敘典敘九皆孝友行

編

錢揆字文揆少孤事母以色養有鬻子償租卽捐所負令

贖之子鼎諸生高標字懋邨父病剜臂肉和藥家貧好

施不倦子星遠諸生孫埏廩生圻國子生皆以孝友稱

錢遴字君林母病劇割股以進侍奉祖父尤誠摯

懿行
編參

褒祀
編

沈芳字升文養親喪葬獨任事兄嫂盡恩義族之無依者

力爲婚娶課諸子世濬輩以孝弟施構賑饑利濟甚衆

錢嘉遇字懋錫國子生父贅于朱嘉遇事外祖父母養葬

盡禮有親黨以爭產結訟捐己田解其紛貧戚鬻女贖而嫁之施櫬賑饑平治道路皆竭力行之子脩祺州佐孫景澤字斐公諸生置五世祖嵐祭田改築臥龍石橋有貧友鬻妻輸稅出資贖還

許澄原字清遠父病剜肉作羹進獲痊復患瞽朝夕以舌舐年餘復明訓諸弟極誠懇戚黨有急必周濟

徐雲字凌霄幼失恃事父孝待昆弟友愛弟亡撫其孤膳兩寡姊鞠孤甥葉如珪事節母呂養葬盡禮事兄如父兄亡撫孤三人以己產讓之著有嶽樵閒唱以上嘉善戈志

張廷璋字殿輝國子生父嚴毅委曲承歡長兄同眉早世

遺孤六產薄無以給率諸弟讓田二頃贍恤之親戚老而無依者竭力以養錢永懋字茂公父早世孝奉母四十年逢父忌辰杜門以泣母病祈代及歿哀痛成疾踵

逝嘉善戈志參哀祀編

孫肇勳字乃賡父赴公車母染疴危篤肇勳以髻齡奉侍觸暑求醫夜則露禱北辰母愈而已病日深猶強起供子職竟以勞瘁死浙江通志

陳寶硯字大為國子生龍正孫父病危百計以療後沒喪葬獨任妻母凌苦節敬事勿怠產不及中人周恤弟姪勿懈錢象坤字孝陔士升曾孫貢太學母病累年跬步

不離晨夕禱神獲痊性好學著有楚江雜咏
周陞字御掄廩貢選訓導幼孤事母孝與兩兄隆陶友愛
偕置墓田戚有貧乏者慨然賙之遇事侃侃無回互工
文善行楷書

陸在選字子銓父歿哀毀骨立七世祖邨長房子姓貧乏
祭祀墳糧在選爲代任每歲製蚊帳絮衣周閭里子銓
鍾授州佐陸宏倫字聖爲伯父遭無妄宏力爲辯釋賑
貧恤孤子廷魁字聚拱捐資脩學助建育嬰堂歲饑倡
捐賑

閔國琦字仲韓先賢子騫裔事親孝祖遺房產悉讓諸弟

代族人完逋糧百餘金次子殿勳亦好善

李天機字宸樞國子生母疾奉侍百日嘔血成疾不數月
亡顧惟祚字裕伯諸生幼喪母哭泣盡禮父以恭欲輯
家乘未果祚承父志編纂捐刻成黨有貸無償者折券
不索

林昇字紫萼諸生母歿幾不勝喪家好施濟子光早歲食
餼陸鳳章字榮錫諸生父文韜有疾籲天求代歿極哀
毀臨試聞庶母疾篤亟歸後以慈母報艱一如所生
李天植字坤儀諸生歲祲濟貧賑饑全活甚衆子文煥諸
生陳涵德字方廷幼喪父事節母純孝外兄任某貧甚

招至家生養十餘年卒爲營葬買金姓女諡爲舊家還
之不索價建南星橋人便之子作霖作楫作梅俱克承
父學

陳志字爾士國子生十齡失怙事母得歡心遇忌辰流涕
祖塋爲人侵削捐金復故壤建宗祠撫兄遺孤置產擇
配蔣闇範字言如弟閑正早卒撫其四子成立復割產
與之事兄聞奇事必稟命建康濟南星橋及掩骼育嬰
皆竭力爲之

曹烱字抒煌考授州同知幼喪父母哀毀如成人稍長營
葬二代捐產建祠兄子早世一孫出繼他姓烱使歸宗
授以產有穿窬入室鄰人也贈以脫粟曲爲化導感泣
去孫鐔字漢堅五齡而孤每讀父書哀慟欲絕母蔣病
割股療焉子澧邦泰能承家學

錢以坊字禮存貢生長兄以塏宦遊仲叔相繼逝以坊獨
勤色養依依孺慕究心理學持躬端謹脩學築堤諸善
舉殫力從事疾革之日邑中無論識與不識咸歎息悲
悼

黃鳳翔字子羽里中捐賑修學皆爭先倡子鍾太平知府
孫治安候補知府曾孫興仁刑部郎中俱克守先訓龔
銘益字襄夏大令在升子授州吏目父終通山官署聞

嘉興府志 卷五十五
訃哀毀幾絕母病呼天割腕

張王錫字季勇國子生七齡時父患疽吮吸而愈年十四母病拜禱北辰歿後哀毀骨立依母柩三載不離受兒王典訓事如父王錫早世妻吳氏守節盡孝敦婦道

嘉善 戈志

張騫字駕六父恆施年八十有八隆冬露頂遊市騫力供甘旨外日奉百錢以資奕戲仲弟爲翁鍾愛生給日用

沒則厚殮以慰親心

褒祀 編

陸白誠字西上力耕養親具酒食邀賓娛父母病瞽舐之復明親相繼沒築墳舍傍朝夕省視除喪猶飯蔬茹菜

以積哀致疾卒李雲鵬字松庵母病目幾瞽舐五旬而

愈

懿行編 參戈志

任王仁字博含少孤母吳撫教成立好施予倡建育嬰堂

全活甚衆臨沒時惟以育嬰事囑同人無一語及家事

張墀字形九國子生十齡後兩親踵逝哀毀如成人事繼

母曲意承歡姊早寡撫其孤歲饑減價賤糶富者從之

市價立平

陳廷聰字臨先考授州判母喪哀毀致疾卒好爲善修橋

施絮樸尤敦族誼子啟昂授州佐屠許昌字文侯諸生

父病割臂和藥以進家貧積館穀爲弟娶婦終身不析

方輿府志 卷五十五
嬰

張翼字蜚仲諸生八歲喪母哭踊如禮事繼母盡子職父病篤同妻陸奉湯藥寒暑無間析產以腴讓兄著嶺雲集禹貢刪略子增生泰安校刻行世

郁璿字象中國子生父之萼病篤顛天祈代得瘳李令天桂漕米浥爛首捐金助舅氏曹貧不克葬為擇地安厝他若賑恤親族歲饑賑濟皆力行之

汪文瀾字聖容國子生遵父遺命與兄文源終身同爨妹適吳貧屢周恤歿為營葬鄉黨構訟殫力勸解洊饑賑粟七百餘家

薛靖字四其國子生遭父喪借弟奇哀毀盡禮歲歉煮粥以濟侍母疾酷暑終夜不寢蚊蟲嚙體無倦怠奇字四表亦仁慈好善與兄刻勸善書行世

王濤字見平武進士康熙十三年隨征福建授遊擊以勞歿於行間能詩工書不苟然諾子醇業諸生力學修行朱紫佩字懷玉事母盡子職有諸某負銀願以女為婢佩念其母久病賴女扶持義不納即焚券王朝佐字大瀛髻齡割股療母疾及長言動不苟嘗拒奔女于客邸撫育弟妹雖貧好周卹

馮肇元字漢英國子生事繼母孝二姊俱貧兒女婚嫁力

任之鄰里告急無不應課次子玟爲諸生項逢熾字映南父病竭力以事棄產助育嬰遇善事爲之如不及上以

嘉善
志

魏儒燾字荀仲大中曾孫諸生性孝幼喪母哀痛如成人長從陸隴其遊講求性命之學得其傳父病衣不解帶者累月及卒哀毀嘔血幾滅慙廬墓三年及卒門人私諡正孝著有詩文集柳洲詩義選

沈應霞字旭青諸生事親終身孺慕妹寡周卹備至歲與同志貲米年饑出以賑濟子鱣成進士由邑令遷州牧時以清廉慈厚爲勛卒祀鄉賢

蔣兆昌字靜遠幼孤孝事母與兄兆增不析箸兄沒分產兄子三兆昌子一四分之朱檢討彝尊祝其母壽文有曰目不覩嬉戲之具耳不聞絲哇之音長而學成士林稱領袖指兆昌兄弟也子學原克承家教

錢佳字平衡士升元孫諸生父歿哀毀事後母得歡心娶曹氏爲陸清獻女甥佳親炙清獻言論身體而力行之邑有義舉罔不殫力贊襄晚刻相國遺集輯嘉善形勢說又與丁廷煊輯魏塘詩陳著臨谷詩鈔子二源來有傳浩充貢生有才工詩文

徐育和字靜初國子生性真率周卹羸厄雖家落未嘗責

報晚尤嗜學手鈔書盈數尺著有心友齋稿子燾字熙
天諸生少遊桑弼甫門務根柢之學著有夢花軒草
孫曰檀字蘭皋國子生髫齡失恃事父孝父卒極哀葬有
日矣日者謂支于不利于己曰檀泣曰世安有求利己
而遲親之葬者如期卒無恙

姚廷訓字殿倫國子生邑有義舉無不與尤敦族誼貧不
能婚嫁者必量助之生養死葬皆有所卹年踰耄耄五
世一堂乾隆四十九年

恩給聖世瑞徵額表其間

黃漢字學海諸生嘗慕高宗憲陳幾亭同善會義舉與其
弟泳倡舉于楓涇之鎮北後置館于鎮南之務前坊泳
牒請兩省當事不避寒暑苦口勸諭會事克成濟者甚
衆

張身浩字史傳由明經歷任義烏教諭善事父母友愛昆
弟所至以正文教端士習爲己任時值邪教叟得星等
滋事民惶急欲遜身浩曉以大義勉爲守禦著有松鱗
書屋學吟草

孫燦本名煌字象三幼失恃事繼母如嫡繼母病日不交
睫藥不嘗不進及卒如居父喪嘗舉陸清獻與族姪書
誠子弟敝衣糲食安之晏如戚友有急輒傾身赴之蓄

書數千卷披誦不倦著有尙書要義學古彙編自省編
朱承勳字書常性樂施與邑有育嬰堂需用日繁承勳前
後捐貲五百金至若敦族睦鄰賑窮恤寡罔不竭力其
祖廷策號彝庵負奇才值明季不遇著萃遊草及家訓
一編勳終身服膺不失

程國珍字方貢秀監生幼孤力學能文章事母先意承志
思以祿養援例授縣丞未及服官而卒性好施與人以
緩急告百計以應工繪事錢觀察元昌張徵士庚極口
嘆賞以子維岳貴 贈官

周旣濟字協均乾隆癸酉與從子鼎樞升桓同舉鄉試甲
戌登明通榜當得官以兩兄皆仕親老奉養二十一年選
慈溪教諭以經術行誼教士子卻饋遺捐俸建文昌閣
及廊廡齋舍在任五年卒

孫業字廣勤諸生生有至性早喪父善事母母卒慟幾絕
因已爲叔後格于制乃服衰期月飯蔬食衣墨終三年
著有周易集粹十二卷

吳本禮字禹門孝友樂善建宗祠置祭產友戚困乏者周
之買一女後知爲良家子視若己女爲擇士族嫁之
孫澧字遷穆國子生事父母盡孝與弟友愛嘗兩次疏濬
城河澧董其事子樹珠貢生敦倫力學有祖父風

吳燦字錦川少有至性父梓禮中暑疾革思瓜及橄欖醫禁弗與及卒脣齒焦灼燦終身見二物輒愴然淚下撫甥成立擇配授產有衣冠後將鬻女卹其家鎮有同善會幾廢設法經理二十餘年

魏爲埒字虛受家貧不爲利動妹婿朱一蜚爲山西布政郵書招之往旅次有客以事干囊白金爲壽怒卻之後一蜚被議法當籍直隸制府方觀承馳書浙大吏曰無累廉士魏某蓋方知爲埒卻金事也

王國鼎字安九國子生少孤事母孝從子廷相字端書誠樸有古風歲饑共設粥食餓者至半月餘里有迎秀橋歲久傾圯捐貲改建不煩閭里因呼爲王家橋

沈韶字師夔貢生性肫篤工詩文父捷爲讐誣陷罪且不測韶歷控莫伸康熙四十五年

聖祖南巡韶具表叩

闡願以身代父抵罪

聖祖嘉其孝飭撫臣竟赦不問韶工詩長洲殷銘選入魏里詩存

徐正誼字方子諸生天性淳固執親喪寢苫不脫衰絰卒哭乃啜蔬食三年不進蔬果免喪後不衣裘帛者十年乾隆初州郡舉孝廉方正邑人以正誼應辭不就

黃士章一生好善五世同堂壽至九十二歲乾隆壬午

恩賚束帛八品頂帶

程緒祖字纘三諸生性敏嗜學家中落父命投筆覓衣食
依依不忍去時其子鍾彥已長父慰諭再四乃行服賈
盡孝養有弟沒于崖州間關萬里扶櫬歸後鍾彥歷清
要緒祖杜門陳故策課幼子及孫不問家事壽至一百
又三歲乾隆三十六年

欽旌昇平人瑞給帑建坊

錢鏐字茂泰以塏嗣子性端謹雍正己酉

欽賜舉人授中書家不中貲人有緩急輒解囊助起補內閣中

書旋因本生母年老乞歸著有息廬詩文鈔

蔣銓字山衡諸生敦孝悌母病篤割股以愈父卒哀毀嘔
血幾絕弟析產後家落銓以己產讓之學政劉公瓌之

旌其堂曰重品彝倫以上伊志

夏鏞字古喤己亥副榜選太平教諭勤月課生平孝友性

成睦姻任卹于志

袁璉字惕三黃六世孫年十二補縣學生家素貧念學者
當先治生遂為賈積貲買田分湖上課子弟力耕農隙
課讀其不耕者仍遣服賈賈還復讀不數年而賈者耕
者接踵入泮晚設家塾以教羣子姓與戚屬之貧者且

贖戚族無養之婦歲荒出粟以糶鄉里斗減百錢嘉善萬志

查涉字濟之性純篤官鮑郎場鹽大使聞母訃以不獲視

含殮服除遂不出居恆手一卷杜門靜坐如老衲然于志

吳堂字宸辰性至孝八歲失怙哭泣不食者累日母錢氏

督課甚嚴嘉慶庚申舉於鄉辛酉入都旋聞母病星夜

馳回母已先旬日逝擗踊號泣幾不欲生茹蔬骨立淚

無乾睫未幾哀毀卒于志

曹應青字選之八歲喪繼母擗踊哭泣如成人長愛吟咏

著有烏榜閒吟草花陰不繫舟吟艸韻味軒詞三種客

山東卒猶子裕鈞時年十九請於父應圻往扶柩以歸

後遊閩聞母訃哀毀骨立得咯血症遂卒于志

郁昌齡字魯良性至孝少孤食貧母沈紡績以養長業賈

奉菽水無闕沈疾侍湯藥脅不帖席疾篤刲股進越日

而病若失昌齡無胞兄弟故視同堂不啻同胞生周其

急沒任其喪至若舖餒絮凍樁死梁涉濬市河製水龍

諸善舉無不倡眾捐資而身任其勞年九十四卒于志

黃大佐字贊侯少喪母嘔血不欲生事父能色養待兄弟

極友愛于志

黃凱鈞字南薰秉性孝友母高氏得水腫疾甚殆日侍湯

藥夜輒露禱百計療治得痊咸以為孝感所致為父母

卜葬躬親負土建丙舍數椽廬墓終身名其地曰馴鹿
 莊處事寬厚而耿介嘗以屋旁隙地假人後切不還笑
 置不問又買鄰人之屋而其屋先已賃人爲店慮其他
 徙失利垂立券而毀之嘉慶甲子縣被水倡率平糶大
 暑烈日持蓋戶行罔有漏失貧民賴以舉火幾半載夙
 工醫以濟人爲急療治頗夥并合善藥以施閱五十年
 弗懈著有友漁齋詩正續集及醫話庸言錄遣睡雜言
 悅日益心等書行於世

于志

沈融字岫青號北海進士泓曾孫六歲遭母夏孺人喪哀
 慟已如成人事繼母許孺人極孝待諸父昆弟必盡其

誠同里許閣學爲立孝子傳

楓溪小志

陳暲字二癡布政司理問孝泳子善事寡母族中物故者
 多浮厝暲於公田中擇一隙地叢葬得安又以故父光
 祿廩祿所贏節縮經營置田五頃建立義莊以贍貧族

楓溪小志

程廷璵字理孚倡建宗祠置義田一千餘畝以贍貧族

朝廷旌之

楓溪小志

袁青字雪持璉孫歲貢生爲人端慤無飾鄉黨推爲儒者
 弟茂荆蚤亡撫姪昌齡成立茂荆字範韓文法古人屢
 試不售某公視浙學有戚爲其幕友密貽書饋以關節

荆得書遂不赴試所親爭勸之以死自誓未幾卒分湖小歲

程大卓字伯高曾力贊堂叔廷璵等捐田千畝置義莊族

人瞻焉又嘗遍貸親友義贖徐姓婦使夫妻完聚其平

生好義多類此志

顧照字新德年十一失恃哀慕不已父邦楨遊粵久無耗

有傳謂已死者欲往尋以祖父母命止孝養重闈相繼

歿諸妹亦遣嫁道光甲辰照乃拜墓隻身行數千里卒

負父骨歸新纂

閔旅字寓生性孝友父愛書畫購求以悅之家貧恐貽親

累乃為弟娶婦日弟有子即吾子也已以鰥終新纂

屠存基字秀嶺居張涇滙性誠慤尤勇於行義道光甲申

邑宰憚敷開古華亭塘修普濟橋以存基督工實力奉

行事竣給績懋河渠額以寵之次年勸募巨資修張涇

滙街弟玉壘字松圃咸豐四年復捐修街費錢八百緡

居民賴之邑宰馬給為善最樂額新纂

袁嵩齡字翰生道光庚戌進士散館授知縣不謁選歸闕

卹宗族旁及里黨先是己酉歲大水悉力捐賑拯活無

算新纂

袁瑞字巨明篤於行誼喪偶不再娶同治五年江蘇巡撫

郭題旌義夫新纂

顧慎薇字協華國子生秉性和厚祖遺田麤足自給佃有
 疲頑不忍赴縣下狀被受敲榜曰佃以手足養我堪坐
 此毒楚耶有偷兒入室已眩篋裏束矣會厨有餽餘惜
 然竊食臥比曉覺家人謂縛之官意不可翻謂偷曰視
 汝身手或可作勞乃爲此苟且今周汝作活勿蹈故轍
 卒悛改務正業焉衣服飲食務從儉約惟義舉則慨任
 之嘉慶二十二年冬跌坐逝

貞有益齋文集

唐潮號秋濤道光癸巳進士由翰林改戶部員外郎秉性
 篤誠居京時有陝邑舉人勞丙坤病旅邸貲艱援絕慨
 然招與寓卒棺殮送其櫬歸在官十餘年卽告歸里捐

賑平糶施粥捨衣活人無算著有祝三堂集兄漣號晴
 江世業布僅中貲慮荒生產急棄舉業獨任家政使弟
 潮專心力學析產時推多取寡毫不蓄私逮潮登內翰
 以五品馳封受惠報德人兩美之

新纂

金韻鈴字適庵少擅文譽尤以孝聞其繼母數摧辱之承
 順無間迨異母弟逆其親繼母將控官韻鈴涕泣跪請
 遂完好如初人多敬之中嘉慶庚午鄉試年齒已踰強
 仕無志進取爲青田教諭十餘年士心翕服

新纂

許經邦號友漁咸豐壬子科武舉人以軍功保至叅將
 賞花翎癸丑劉麗川踞上海鄰境悚惶練勇有功

閻同治癸亥倡義丁家柵隨大兵進攻西塘楓涇支應

淮軍能顧桑梓辦理善後亦中機宜惜積勞成疾卒新纂

袁蔭槐字晉廬性孝友同治五年江蘇巡撫郭題旌孝子

新纂

程文杞字楚卿號又韋生而聰穎九歲十三經傳文選畢

讀十歲能文十九舉於鄉嗣以痿疾廢書居心仁厚道

光己酉大水倡捐濟貧困邑寒士應舉向無登雲會悉

力成其事堂嫂陸氏苦節無後力請同爨以子熙恬為

嗣率家人敬事之同里顧秋士能詩時與倡和並周困

乏性嗜菊尤好植蘭著有蘭蕙論畧楓溪小志

王濤字雲庵仁濟里人授徒養母咸豐辛酉三月被賊擄

出門母追奪相持哭賊傷母手呼號愈甚賊怒殺之並

戕母寇退鄰里醵金以殮事聞奉旨入忠義祠楓溪小志

汪光孝號雲閣幼孤母氏程撫養成立賊犯楓涇扶母逃

避教化濱遇賊不屈斫之喉未斷猶嗚咽呼母而死賊

焚其屍事聞賜卹入忠義祠楓溪小志

張鎬字湘舟秉性剛直咸豐庚申九月初六日被擄至南

城隍廟不屈反縛戲臺柱抵死罵不絕口面如生事聞

奉旨入本邑忠義祠楓溪小志

吳汝侗字寅生庠生性孝父復晚年好遊玩出入潛隨遇

橋危路險輒扶持行家訓蒙朝夕趨父館定省咸豐辛

酉被擄至縣城不屈死事聞得卹廕楓溪小志

程文榮號蘭川官江甯北捕通判善書兼工金石文字凡

所到處輒訪求湮蕪古刻斷輒片瓦摩挲審視不忍去

著有嘉興府金石志若干卷江甯金石志補四卷鍾鼎

欵識校誤一卷漢隸續補一卷南村帖攷若干卷咸豐

癸丑正月粵匪攻江甯榮奉委巡城城陷死事聞

卹道銜入祀昭忠祠楓溪小志

蔡潤琛號佛華官湖北廣濟知縣咸豐癸丑春粵匪犯縣

境率兵堵禦經旬賊退方擬查辦撫卹因抗糧滋事褫

職經吳制軍文鎔畱營効力隨同防堵黃州賊悍兵單

同時陣亡事聞加贈知府銜楓溪小志

謝仁溥字湘屏號芝齡庠生河南試用縣丞咸豐初隨袁

帥甲三勦捻匪功署宜陽縣知縣督練堵勦巷戰遇害

豫撫鄭元善奏聞加贈太僕寺卿銜入祀昭忠祠楓溪小志

陳二璋字鑑源號又莪道光乙未舉人居邑茜溪生平窮

經考史諸子百家靡不流覽時人以遠大奇之尋為險

者所搆致郵吏議家居授徒寇至人勸他徙二璋曰至

則死耳因率鄉里為拒寇計卒以眾寡不敵死事聞得

旨優卹新纂

徐廷楨字星白監生遊滄州知州沈如潮幕咸豐三年粵

匪陷城與如潮同殉難新纂

孫汝鼎字梅若附生性嚴正教人敦本弟子多嚴憚之咸

豐十年館鳳階橋聞縣城告警憂忿不食死新纂

金雲錦字冠山幼孤貧入泮後課徒終其身庚申賊至率

團練守禦城陷巷戰遂被害身受十數刃支體幾不全

朱御史澄瀾為奏請恤入昭忠錄新纂

謝調梅字鼎人任吉林伊通河巡檢代權理事同知時土

寇倡亂親率弓兵團勇剿擒之以親老告歸書畫自娛

同治元年十二月團勇保鄉里為賊獲罵不屈與妻周

氏同被害事平得卹新纂

蔡祖存兩淮候補鹽知事咸豐十一年奉委至海州總巡

擒匪至板浦禦賊殉難新纂

陳珠樹號漱泉孤介自高咸豐辛酉八月粵匪犯風涇樹

忍饑不出獨居小樓絕粒以死年七十有一寇退堂嫂

徐氏收殮之事聞 詔旌忠義楓溪小志

范兆景字若谷議敘從九品咸豐十一年正月集團扼粵

匪於白茅河中槍尋卒他若唐大林錢惠均孫文鳳項

德嘉李均俱死於難新纂

朱容照陳徐河顧鴻吉均議敘從九品咸豐十年七月闔

邑戒嚴容照遇賊西塘募勇潰散遂奮矛陷陣徐河接
 戰西門外陣亡鴻吉被賊脅抵死罵不絕口亦遇害新纂
 程菊孫字淡如御史維岳孫議敘從九品工詩畫精技擊
 嘗客遊燕晉賦詠古詩驚其長老年二十後寄居郡城
 隱於醫存心拯濟出必步行博覽方書集要編次為四
 診便讀咸豐庚申知世變將作手寫所著書分遺親友
 自以世受 國恩義不受辱約妻孥堅守故廬至四月
 郡城陷驅妻暨二子投水死持刀出門奮力擊賊賊蜂
 至攢刺之死并毀其尸僕周貴匿旁舍親見慘狀逸出
 述之

文苑

明

周鼎字伯器博極經史正統中征閩寇沐陽伯金忠辟置
 幕下議進取方略嘗與千戶龔遂奇從數騎入尤溪山
 寨降其衆而還授沭陽典史罷官遨遊三吳賣文為活
 吳中墓誌譜牒皆出其手年十九修杭州府志燈下書
 蠅頭字界畫信手不折紙為範門人最有名者松陵史
 鑑用柳文例志其墓曰桐村繭室

姚綸字允言本姓卞才思高邁為詩清麗書法規摹晉人
 隱居教授有夢草集孫翼亦以詩名有桂巖集元孫瑞

袁綸及翼集合刻之為雙璧曾孫諶復姓卞有傳以上嘉禾

徵獻錄

湯滌字新之以進士為清豐尹恥干謁臺使聞其能詩命

賦有半明半晦雲間月如有如無夢裏官之句臺使疑

其隱諷湯謝曰此滌自輕其官也取卽綬置案揖而出

著有思庵雜稿浙江通志參嘉善楊志

周澤字天雨博學有才為文清婉詩亦工不多作每一言

出人膾炙之成化癸卯鄉薦第一登進士累官福建同

知轉贛州卒兩浙名賢錄

郁袞字九章改名天民博學善詩文纂靖難盡心錄子敦

易自號斗野山人有言志稿稿李詩繫

沈燭字士明弱冠舉于鄉閉戶手一編與弟炤相師友詩

文根本理學佐以韓蘇不事雕繪書法遒勁似米南宮

著石聯遺稿兩浙名賢錄

郁應元字槐泉學于從父袞嘉靖甲子舉于鄉計偕遇歸

有光遂訂交知黟縣令砥勵清節邑健于訟温言勸諭

訟日簡公餘吟咏不輟未幾歸與歸子慕吳志遠講學

荻秋著有北征草南遊雜編

馮盛世字念羅選貢工詩文歲祲作救荒書致邑宰用其

議民大有濟授福建鎮海衛訓導著有桑榆館集以上嘉善

楊志

許明字子遠與高攀龍吳志遠歸子慕遊文章行誼為一時推重家貧嘗絕糧處之泰然惟以著述為樂于術數書靡不研究有地理傳心集行世嘉善崔志
王周號質齋嘉靖諸生有別業於鴈湖之側稱鴈湖釣叟著自在吟二卷顧珊字子聲諸生馮科教諭與周同時皆能詩

沈大奎字子聚萬歷初明經官教授有澹滄集盛時龍字雲將諸生有天選篇北游雜咏二刻以上橋李詩繫

沈萬鈞字玉臺鄉薦後力學著書有詩經類考傳世于志

卞洪勳字泰華稽勳錫子性嗜學早歲入成均官東鄉主簿歸以道誼自持著有漱石居集同時有周珍沈璋沈

榮姚懋勳沈嘉賓顧忱皆能詩靜志居詩話參橋李詩繫

孫茂芝字若英幼失怙事母極孝天啟辛酉以副榜入太學晚謁選為沔陽同知有循譽見時事日非卽請解職曰我不能以塵案易硯枰也所著有讀經疑離騷釋硯

枰齋遺稿伊志

朱廷旦字爾兼以貢入成均遇幸學上書不報中應天副榜有警枕集擣堅錄廣友論數花軒雜俎

陳山毓字賁聞于王子戊午鄉試第一為文長于騷賦精

思苦吟寒暑無間中歲有嘔血疾讀書不輟作自祭文

極曠達之槩卒年三十八弟龍正集其文以傳私謚靖

質以上嘉禾徵獻錄

郁泰徵字參吾父耀宗泰徵為諸生性孝友父歿躃踊廢

書享薦必哭從子之章少孤有家難竭力護持平生沈

酣經史多著述有松筠堂詩文稿袁志

孫文鋒字韞玉戴叔遠字元邇同結文社皆以貢為學博

文鋒選昌化以病歸卒叔遠為象山訓導聞文鋒死歸

憑棺痛哭嘔血以殞嘉善楊志

支如玉字甯瑕大綸子萬歷庚子舉人官監丞有半衲集

弟如增與京山李維禎華亭陳繼儒無錫鄒之麟為文

學交嘗上書岳元聲陳朝政五條勉以格君又貽書賀

燦然謂駁永陵之非且詰其毀父中崇禎庚午副榜作

謝棘闈賦著有硯亭小品濡削叢笈構李詩繫參袁志

倪煌字令倩國子生有小宛集弟點亦以詩著名邱遂字

叔遂初為僧後反儒服為諸生有邱叔遂詩草靜志居詩話參

構李詩繫

凌斗垣字麗天履試棘闈不售閉戶著書著有樹杪閣集

孫如升如恆皆能文王時杰字百凡少遊魏大中門詩

文在大歷元和閒蔣睿字正言副憲英子雅慕高蹈遇

佳山水流連不忍去有聽鴻樓集

嘉善楊志參
橋李詩繫

夏緇字雪子初字幼青天啟間諸生有西泠維摩孤望三

集其詩早務纖豔晚趨空淡南中夢遊諸作與削蒼涼

點染特妙絕句尤多風調有竹枝縹緲之音王佐字佐

之崇禎辛未進士休甯令工詩

錢繼振字爾玉繼登仲弟兄遭誣就訊徒步數千里周旋

北寺嘗與郁之章輩結柳洲詩社晚歲築室曰鷗旅以

老有蕭齋集西園日箋弟繼章字爾斐崇禎丙子舉人

孝友力學鈎纂甚富晚築谿默園綴石蒔花垂老不倦

著有逸民遺風詩雪堂自刪集

孫聖蘭字子操崇禎癸未進士遭亂不仕隱居三十年有

曉傳堂集長溪詩話

以上橋
李詩繫

陳奇字達可貢生嘗受學于徐石麒嚴介抗俗為文力宗

大雅處姻黨調卹備至閉戶課子授學博不就著有淡

思集

橋李詩繫參
嘉善楊志

錢熙字漱廣柘子諸生少負雋才詩學漢魏初唐柘性豪

逸絲竹滿堂熙焚香披誦如無覩聞有思存集弟點字

鑒濤早歿有百可堂詩

橋李
詩繫

曹谿字崑仙原籍華亭弱冠補諸生後棄去坐臥一小樓

貯法書名畫中設陶靖節像日朝夕與此老對如置身

桃源中矣著有花嘯谷音二集嘉善楊志

劉芳字墨仙有清喚齋集倪撫字曼倩與錢棟唱和崇禎

間諸生

李樾字子方奇珍子恬淡不樂仕進殫心經史至老彌篤

著雨花齋集樂律解以上橋李詩繫

呂諧字皆言從子洪聲字公亮俱負奇博學一時稱為二

呂諧登崇禎壬午鄉書洪聲早卒有詩文遺稿嘉善戈志

盛于焯字犀然諸生好古博覽性恬淡閉戶隱居悠然古

處有孤嘯集吳志

吳祖錫字稽田諸生敦氣誼廣交遊中年淡泊寡營幅巾

野服作向平五嶽遊卒于濟南子濩字于東有先友詩

一卷胥朱臣字清遠諸生絕意進取遊四方垂二十餘

年所著遊草及讀史鏡蕉牕隨筆數十卷吳志參嘉善崔志

支紹昌字克齋如玉孫諸生高尚不慕仕進老屋數椽面

文水顏曰竹所讀書處禁足不出垂四十年性篤孝友

膳寡姊撫孤姪式罔與兄紹熹白首相愛嘉善戈志

戴孝字子華工詩喜讀史與人言忠孝廉節娓娓不倦錢

華字萃露諸生授徒講學尤邃于易郁素字繪先諸生

力學能文善談論風致不減晉人

駱雲程字天遊放浪詩酒山水有素券堂集卒年九十餘

陸龍光字貫揚顧之鑑字念亭俱工詩善書法以上吳志參嘉

善戈志

沈煌字大文明季文弊競獵六朝浮豔煌昌明程朱之學負笈者三百餘人順治甲午選貢不仕有宏益堂稿櫛李

詩繫

葉宜春字明台歲貢生安貧樂道子元美善庠生克承父志放情詩卷外著有格言雜語理學洞豁接踵南明同里顧際明作記表之楓溪小志

許應試字元甫號宇懷宋進士克昌後世居奉賢里少游庠文筆縱橫高古督學紫溪蘇公首拔試牘達部丙辰

中副車廷對擢第四選諸暨訓導著有家箴八議八訓八款諸篇子鼎宰鼎相皆孝友篤學時人比三蘇焉楓溪志小

夏允懷字季思貢生早歲能文與允彝為鴈行稱二夏行己方正嘗館一巨室坐構釁幾殆允懷悉力捍衛全其幼孤著有尚書句解歷代史斷吳志

國朝

曹爾坊字子閑勳仲子髫年應試宿儒不能及工詩並善繪事子鑑倫有傳櫛李詩繫參嘉善楊志

王辰字天市號餘庵順治庚子舉人授江西吉水知縣戊

午同考官旋調保定府經歷少工詩文敦品行與當湖
陸清獻交最契有魏塘名宿沈大文者博通經史清獻
聞其講書之精偕天市往聽之清獻語天市云吾悟其
講書法以從容為主以文雅為貴傾動後輩有以也楓溪

志小

陳舒號道山順治己丑進士官布政司參議工花鳥草蟲
長畫荷搆小園雨花臺下善詩詞凡畫必自題信手疾
書不出思索而有韻致畫徵錄

蔣玉立字辛彥少從張溥遊順治甲午拔貢父有疾夜不
解帶廁牖必躬浣詩文峭厲力追正始有泰茹堂集弟

椽一名玉章字禹書九歲能詩順治辛卯副貢不得志

卒著有三徑草靈威集構李詩繫參嘉善楊志

孫在鎬字西自與從弟鏣同受業于徐遠遠歎曰老生避
三舍矣弱冠登賢書下帷蕭寺識緯星官奇門周髀之
學靡不殫究薛昌字光尊諸生詩古文有江鮑淹通之
目

孫鏣字長清貫穿經史豪飲能盡一石與人交無面諛背
毀錄先儒座右銘自警家庭雍睦著有鄂鞞樓稿

陳增新字子更順治戊子舉人工詩古文搖筆苦吟得句
輒欣然喜謁選授安仁令革火耗寬刑罰邑人德之祀

名宦

以上嘉善楊志

魏允枚字卜臣學濂子順治戊子舉人授西安教諭未仕

卒著有詩集六卷弟允札字州來允植字虎臣允札諸

生博覽典籍詩文直逼兩宋著東齋集允桓事兄如嚴

父侍母湯藥至于嘔血百家之書無不瀏覽為文風發

泉湧時稱其兄弟文章行誼不愧名父之子

構李詩繫參吳志嘉

善楊志

計善字廉伯元勳孫潛心理學事母極孝家貧竭力奉甘

旨撫幼弟體卹無不到博極羣書有古文雜著百餘卷

弟五人能敬正法辨才名與兄埒時稱為六計

嘉善楊志

陳秉字夏臣龍正孫順治辛卯舉人父歿以哀毀寢瘵天

馮運隆字昌言盛典孫弱冠與秉同舉鄉榜馮母山毓

女秉從姑三黨中同學同榜同深于詩古文詞而同天

折人惜之

構李詩繫參嘉善楊志

陳舜薦字羽格諸生卜居郭外種梅百本構小軒曰亭玉

著書其中以老沈湛字淵伯諸生善古文辭傍舍有五

柳因以名其所居為五柳村著有易伸及貽安錄

嘉善楊志

參崔志

支隆求字武侯與兄景良字畱侯皆工詩隆求舉順治庚

子第二授遂安教諭以文行勛士擢山東沂水令多惠

績致政歸著書講學有泊庵集嘉善志

毛蕃字穉賓少與弟正學字義上楠字讓木博學工文稱

毛氏三俊蕃副貢正學楠諸生高才困場屋以經術授

徒蕃子灑正學子璐楠子永圖皆以能文世其家吳志

葉翹字楚若少擅才名選貢授昌樂令潔己愛民捐俸倡

修學宮歸里後閉戶著書支揆英字會侯任乳源知縣

支孔願字功禹選桐廬教諭陶憇字冰修辛卯舉人天

台學博皆卓然文行之儒與翹交契

沈受祺字獻吉諸生通敏有經濟才與楊廷樞錢禧輩同

學知縣莫大勳欲行均田役官收官兌法祺條議贊成

為清賦平役新書上之臺省頒為定例所居北山草堂

九松皆宋元遺植徜徉嘯咏為樂著有五韻便覽詩餘

圖譜

李煒字赤茂諸生研窮經史為時輩折服晚益肆力于古

陰符握奇無不研究于光堯應機皆師陸隴其稱高弟

人號二難光堯有吳梅村詩集註以上吳志參嘉善志

毛正學字義上諸生研精理學與陸隴其張履祥友善事

親盡孝父疾顛天求代值歲饑鬻產以賑尤好汲引後

進嘉善志

周振璜字渭陽貢生弟振瑗字蘧玉甲辰進士山西安邑

令季弟珂字越石貢生文章行誼一家自相師友門多

負笈兄弟俱工詩振璜尤工書法吳志

馮瀛秀字青掄丁酉舉人為文整飭兼工書畫淡進取杜

門課子清介越俗有散仙子稿嘉善志

顧鏌字聖修諸生事親孝撫兩弟恩義兼盡著四書辨疑

禹貢廣註及百穀堂詩文集以子衍貴吳志 贈官

錢煥字蔚宗楞次子少孤力學為名諸生與兄爛稱二難

泛覽百家纂輯古人嘉言懿行母毛有心疾事之謹嘗

修學宮置墓田著續最樂編息深齋集爛字尚子諸生

博學性耿介授經自給非其力不食吳志參嘉善志

陸淮字秀壑諸生為文根柢至性盡削浮華又有孫蕃字

天毓諸生勵志攻苦詩古文以作者自命嘉善志

郁褒字子弁以貢官江西永豐令有詩偶一卷蔣雲翼本

名會貞字鳴大順治甲午舉人任江南涇縣知縣王辰

字天市順治庚子舉人任直隸保定府經歷皆能詩

顧艾字病已周宏藻字丙仲徐之陵字子京陳學謙字庭

益皆長於詩張逸字泰庵精岐黃術善琴工詩畫有日

休堂詩陸淮字秀整諸生少孤事母以孝聞曹禎驥字

觀機有握蘭軒詩曹爾垣字彥師勳第四子戈元穎字

長鳴兩人工古文皆早世陳昌字漢彬龍正孫以貢授

雲和訓導克守家業

柯崇樸字寓匏副貢工詩古文辭弟宏本字聿修十歲通

五經入太學試不遇早卒有鼓應初編維楨字翰周舉

人有澄煙閣詩與樸同舉博學鴻辭丁外艱不與試季

弟用楫亦博瞻工詩宏本子炳字煒昭長洲汪琬謂其

沈靜爽拔兼而有之早卒有蘭唐集

以上樸李詩繫

曹鑑平字掌公舉人汎濫六籍入古人闡奧詩文流播人

口弟鑑章字達夫善承家學令萬載有惠績子源邵拔

貢兩任縣令

吳志參嘉善戈志

曹鑑徵字徵之貌寢偏眇不修飾所交必奇士與南粵朱

斐北平韓畱善門有椽樹中庭有紅杏客至多咏其側

偶移石廢二指遂病狂不曠不履行於市數年死其集

曰紅藥園白石樓

李炳字令文煒弟諸生沈志高字幼升吳大震字子濤任

星客字右宸皆工詩星客兼工畫蘭蔣禹錫字尚陶少

罹患難而有冲愉之色隱居著書以樂其志有榆村集

以上樸李詩繫

王國珍字席之諸生九歲能文與潘炳字顧巖沈志高結

詩社名流畢集極一時之盛著有南雅堂詩文集弟份

字季隆舉人攻苦力學為時輩推重

吳志參嘉善崔志

張芷字佩方苗弟性嗜學讀書常達旦母愛之甚不令攻

苦芷匿火甕中候母熟寢始出火以讀竟以勞卒嘉善志

褚偉字駿如勤苦嗜學從子茂章字昭質力學如偉張鶴

書字隴士諸生詩文折服流輩弟辰字北是與鶴書齊

名邑中目為二張嘉善志

嘉善志 參 構李詩繫

葉鈇字潛夫繼美孫諸生事親盡色養親沒廬墓日誦孝

經數千過著有孝經註疏大全小學衍義續小學人譜

大全諸書子汝謨校刻行世

孫滂字磨公少受業張溥博覽羣書每歲手錄一編積成

卷帙題曰類考卒無子及門醵金以葬以上嘉善志

王之圻字肇城熟先秦兩漢諸書詩宗漢魏初盛唐性坦

易不作欺人語年未強仕卒妻郁氏撫三歲孤成立邑

人重之

葉簡字夢在弱冠食餼通經史百家孝友不事私蓄疾革

取五經朗誦一過而逝以上嘉善志

丁樞臣字子衡貢生理學一本朱子為人慎言謹行繩檢

秩然善屬文兼工書法著有恒齋遺集嘉善志

陳謀道字心微龍正孫諸生工小令得南宋風致王尚書

士禎選入倚聲集稱其數枝紅杏斜陽句勝于宋子京

人稱為紅杏秀才著有百尺樓稿從弟哲詢字懷季工

近體詩書得二王法同學魏世基字野臣朱得琬字宛

玉皆博學能文早卒

嘉善戈志
參崔志

孫琮字執升諸生性孝友兄因累毀家琮投徒養親親亡

獨營喪葬仍養其兄所居山曉閣喬木皆數百年物藏

書萬卷丹黃點勘每評選一書出輒為紙貴晚歲放跡

名山笠屐所到悉見于詩著有山曉閣詩文集

嘉善
戈志

葉汝詵字廣基早孤事母孝康熙戊午發解淡仕進日以

著述為事晚得痼疾欹枕手一編季子廷棫字季標諸

生工文沈潛經學侍父疾十餘年無少怠

吳志參嘉
善戈志

顧秉堅字雲一際明曾孫嗜學無書不讀為文刻深力追

古作者中丁卯鄉舉授會稽教諭修黌序補祭器有居

民十八家佔學基請于郡守復故址教士子以正心術

立人品為本歿祀名宦著有詩文八卷

徐鵬字培青以諸生入太學少孤事母得歡心撫育兩弟

遺產悉授之詩文縱橫排宕迥異恆徑著有修廬草露

蟬吟二集

以上嘉
善戈志

魏坤字禹平父文煌能文稱隱君子坤弱冠善詩古文辭

遊京師就試國學撰石鼓賦國子師擊賞以為絕倫晚

舉于鄉不仕卒坤持己正臨財廉其學叩之不窮著有

倚晴閣詩鈔水邨琴趨

吳志參嘉
善戈志

嘉善文苑

孫序皇字子黃甫成童父謀以誣下獄請身代寃乃得白
長工文沈酣典冊夜讀燈不燼不止感疾卒同學王廷
標字史名撫諸弟極懇摯行文豪邁有俯視一切之槩

嘉善
崔志

李葵生字西雲弱冠通經史百家作古今文下筆立就與
同學胡應宸字殿陳顧璟芳字宋梅同選蘭皋詞葵生
又著四書存是編嘉善
戈志

錢士壯字大輿繼登嗣子貢生事兄士賁極敬愛讓產分
宅兼恤其孤為文高雅秀潔詩詞亦有家法有佩璐軒
詞行世士賁字燭巖怡情詩酒有晉人風致懿行編參
構李詩繫

孫之湛字又尚諸生家貧授徒修脯悉以奉親母蔡臥疾
侍牀褥五載無倦色長史學論說古今成敗得失洞悉

元本懿行
編

李文祺字鶴君幼從舅氏陳鉞學鉞字雲銘文行為魏徵
士禧朱檢討彝尊所重後又從丁進士棠發遊何焯愛
其文嘗曰浙西名士當以鶴君為第一己卯舉省元不
仕卒著有河干詩草

沈育字沛蒼受庭訓不由師傳事父盡孝養待弟盈科友
愛時周其匱乏舉丙子鄉試授河南永甯令惠民造士
風流令行歸田後杜門著述詩文益進有槃邨集數十

卷

曹源郁字錦含弱冠中副榜所居東園有亭池竹石之勝聚書遊息其中薦舉孝廉方正以親老辭選慶元學博邑界山僻無藏書家郵載家所蓄書親為指授踰年卒著有宸翰堂稿東園叟雜纂子廷棟廷樞有傳以上嘉善志

劉傳彪字炳千諸生好學通經傳事親孝居喪哀毀逾禮叔歿撫從弟成立著近思堂文稿子學謙諸生能文敦

行懿行編

陸光斗字樞升諸生少穎異博綜掌故兵農禮樂無不研

晰原委嘉善志

朱岸登字蹈勇父之榮仗義好施岸登八歲能屬文舉丙子順天鄉試通經史百家言所著詩文詞傳誦人口有獲古堂文稿以子一蜚貴 贈官吳志參嘉善志

孟學中字心陶諸生家貧授徒自給有餘輒分以濟人秀水曹侍郎溶延課諸孫得讀其藏書教人有法度嘗言庸醫殺人止一身庸師悞人及數世著有易解大義嘉善志

沈廷楨字端揆貢生勤學工文性孝不離親側事兄雖異居必晨夕視候子望熊元勳俱諸生陳原字遠岑諸生家貧以脩脯奉親待兄弟友愛甚篤兄早世撫孤成立

以己產讓之

懿行編參
嘉善戈志

錢諒臣字逸宣諸生工詩文通岐黃術尤精六壬著有霽堂詩草子元登傳父學同時蔡鴻遠字去聞潔己力學工行楷馮眺字抒奇貢生詩文書法皆得古人意著有蟬嘶諸集從子煒字丹霞諸生能詩及駢體尤精于醫

吳志參嘉
善戈志

蔣光祖字帖民蔣子以諸生遊北雍為馮大司成元濟沈文恪荃推重歸不得志惟以著述自娛刻有周易翼義杜陵綺語工書法子如壘承家學亦以能書名

蔡煒字亦袁歲貢選臨海訓導邑有明季司李鑿後山寒

南門士風不振煒請復舊制設齋督課文教復興以勞勩卒于官平居孝謹善屬文著有易憲霞城偶草

陳喆倫字安讓龍正孫諸生性狷介授徒自給晚退處先祠老屋數椽吟咏不輟有慎微堂詩稿吳江葉燮謂其筆意在林逋魏野間

蔣向皋字迪思諸生精于春秋四傳遊齊晉楚豫閩蜀足跡半天下題咏甚富著無是園稿

沈嘉字善長拔貢入太學有文名郁世颺字廷皋之章孫諸生文豪邁有奇氣與李永祺齊名稱郁李遊太學卒于旅邸陸紹先字歐亭善屬文兼工詩餘癸卯舉人貧

不能赴禮部試齋志歿

孫炯字奎章貢生著有華黍莊集秋水集柳洲詩錢暉字

子明明相國士升孫諸生詩出入錢劉王孟間著有柳

樊遺草

唐虞字協聞諸生力學敦品槩受其教者皆優于文行性

孝友色養六十餘年晚喜作詩著有萃谿集

以上嘉善戈志

徐之麟又名本潤字白峯骨格清雅為名流折節少工畫

及遊粵西歸觀湘南山水奇勝筆法益進詩尤瀟灑絕

俗徐岳字季方博綜經史好遊褐衣芒履歷嵩岱武夷

峩眉諸名勝足跡半海內晚年結廬斜塘著有見聞錄

吳志參嘉善戈志

曹奕霞字哲庭究心經史百氏弱冠遊京師以雙劍歌著

名康熙乙酉

召試賦白杜鵑花詩稱

旨雍正甲寅舉博學宏詞以老疾辭不就

伊志

丁桂芳字筠溪清惠賓孫貢生肆力於古所居素園有林

泉之勝構讀書樓圖書碑板積累充棟著有方谷詩鈔

二十卷晚號知白居士曾孫秉銓字掌卿諸生負才工

詩著有帝王名臣世系考

伊志

錢元祐字星階康熙甲子舉人任富陽教諭歲大饑上官

捐俸買米佐賑邑書役通同乾沒元祐發其事吐所蝕米散給災黎全活甚衆後選金華府教諭秩滿陞國子

監監丞有起雲堂詩春江詩鈔

伊志

章愷字惇虞讀書五行俱下與青芝山人陳唐善山人多

蓄書愷就觀之手披筆書汗雨下蠅蚋交集不暇一拂

拭乙丑以二甲第一入翰林乞假歸所著有北堂集詩

賦雜文瑣語

伊志

曹廷棟字六圃貢生舉孝廉方正不就絕意仕進杜門著

述四十餘年成書十餘種奉

詔廣搜書籍浙之大吏採訪進呈如宋百家詩存產鶴亭集俱

入四庫館登之著錄工草隸善寫蘭竹以風雅引掖後

進晚年請業益衆壽八十七卒弟廷樞字古謙副貢與

廷棟分纂經義異同辨會舉鴻博報罷補宗學教習卒

京邸著有謙齋詩稿

伊志

支期立七世孫字品山貢生幼敏里黨稱為小五經著有

嘯東吟稿

伊志

顏綸字御飛諸生好理學家言於明儒服膺胡居仁重刻

居業錄行世著碧巢詩稿

伊志

錢夢齡字祚賢士晉元孫諸生讀書砥行爲文根抵經義

詩亦和平溫厚無噍殺鬱結之音晚以哭子喪明或持

詩文就正朗誦一過點竄罔不精當著補巢書屋集伊志

柯煜字南陔於書無所不讀文筆勁健詩則淡雅高潔直

逼王孟又長於駢體雍正癸卯成進士尋以山林積學

薦充明史纂修官謁選得宜都縣改衢州教授薦舉鴻

博不及試卒于家著有石庵樵唱伊志

朱紹周字麟修貢生弱冠偕其兄一蜚以能文名嘗以詩

謁錢文端陳羣與論源流派別紹周洞悉正變舌如翻

水遂訂忘年交一蜚官陝西紹周匹馬往省秦中多古

蹟題咏殆遍詩益蒼秀著有默軒詩鈔伊志

謝垣號東君博學工詩文兼精書畫乾隆丙戌進士官刑

部員外郎性耿介絕去依附不汲汲富貴畫不苟作酒

酣握筆霑灑淋漓題小詩其上古雅可愛著有鐵網齋

壺領山房詩集伊志

孫霖字頌年警敏有才幹康熙辛卯舉人事親孝撫兩弟

友愛著有五經堂文編從子無懷諸生少師霖著有菖

溪子詩草伊志

錢源來字清許諸生幼稱聖童父佳極鍾愛而訓讀極嚴

家有藏書數千卷鍵戶使盡讀為文下筆千言立就長

洲沈德潛嘗序其詩選入別裁集著有攬雲軒詩鈔伊志

浦鏗字金堂貢生少承家學弱冠即從事十三經註疏正

字一書廣購諸經善本校正疑訛得八十二卷鏗著述
工且富有小學紺珠補文選音義雙聲疊韻錄孫魯原
名煒字浩如諸生拓落工詩文今尙書紀昀大學士王
杰俱以國士遇之遊豫章與王侍郎昶倡和成編昶爲
之序著作多散佚僅存遯吉詩草

唐應焯字新周博涉羣集工詩古文兼長駢體兩中順天
副榜教習景山歸卽閉戶授徒不與世事著有棠溪集
葉溶發字養生貢生詩文力追古雅杜門著述垂二十年
著有文獻通考擬正一書

周振榮字青在受經於父澧壬申舉於鄉授青陽縣調合
肥左遷直隸清苑丞補永清令擢永定河南岸同知居
官不廢學警校周禮鄭註坊刻之訛舛者別刊善本又
以讀書當先識字撰刻說文字原一帙作養蒙術分年
程課之法皆有次第云

柯鴻遠字可儀諸生善書工詩賦引掖後進有請業者諄
復不厭著有稻香閣集

丁伯長字孟勤諸生質敏學博工古文詩賦屢試不遇益
發憤以勞瘁卒著有謙湖詩鈔

魏圮字丹石諸生與兄坤有二陸之目性高潔不樂仕進
詩文有古趣兼工畫著有北郭山人集

以上
伊志

程維岳字申伯號受廬僑寓涿涇乾隆庚子進士官山東

道監察御史軍機行走少以詩文負異儕輩服官後珥

筆承明纂排典籍後丁內艱歸主東林書院著有淞笠

齋詩鈔一卷

兩浙輶軒錄

柯汝鏐字清士乾隆壬子舉人選龍泉訓導著有養天錄

眠琴居詩鈔劍川集

子志

張芳桂字補袞少穎異善屬文戊子己丑鄉會連捷授湖

北公安令修書院延名師月課有程文風丕變癸卯分

校得人皆名士尋乞休歸凡遇公舉如學宮書院修建

事皆樂輸贊成著有清麗齋詩文集未梓

子志

顧之莢字葭隣號桐圃由拔貢舉甲午順天鄉試適教習

期滿以知縣分發安徽補當塗縣七次秋闈分校得士

最盛儒雅如崔錫華經學如譚泰詞章如陳春華侯雲

松皆見稱海內之莢雖任煩劇意存閒退顏室曰眇柯

軒黃鉞時登第回籍以門生禮見為晝軒圖善書求者

空集于詩尤喜蘇文忠著有眇柯軒雲僑寒蛩等集後

被吏議繫獄卒子超邕幼慧著紫松館稿孫溶亦能詩

著瓶齋課餘

魏塘人志

陳鴻墀號範川蘭徵孫嘉慶乙丑進士入翰林充武英殿

會典館纂修官嘉慶十年 聖駕謁陵回蹕獻詩擢選

旋以呈誤歸道光初起廢員授內閣中書戊子順天同考官著全唐文紀事全唐文年表賜研齋詩文集抱簫

山道人遺稿

楓溪志

吳遇坤號禹人嘉慶乙丑進士以庶常改知廣西貴縣因

事遣戍赦歸貧無立錫生平著作甚富七經各有辨證

尤長於碑版序記等文有隅齋自訂文彙二卷

于志

浦銑字光卿拔貢穎慧絕人博通今古尤長於詩古文詞

賦足跡半天下所至名流傾倒卒年八十有五著有歷

代賦話二十八卷復小齋賦話二卷唐宋律賦箋註四

卷百一集正續二卷又有柳愚詩存羊城西征等集

于志

孫鳳起字振雲性行沈篤學有根柢湖州姚文僖過魏塘

相與辨論經史旁及星度輿圖無不溯源窮委因歎曰

浙西經學莫如振雲年七十五始中已卯舉人無疾而

卒族弟圻字瑞五亦深於漢學著有鴻泥錄

于志

高稽字古與邑廩生性謙謹不苟言笑著鶴湖漁莊詩集

于志

丁維時字馭青邑庠生性恬靜家藏書萬卷能遍讀之著

有拙漁詩存兼工書畫篆刻

于志

張身濤字翔鷺能詩善隸著有娛志居詩草

于志

錢階泰字六符諸生性疎曠授徒自給亦以隸書擅名於

時刻有讀書樂歌帖行世好吟咏著有靜憇草堂稟于志

曹煥字乃文貢生少孤力學後考授州佐性誠懇事繼母

色養備至嘉慶初當事薦舉孝廉方正以老病辭工寫

蘭竹兼精醫術晚年猶多製丹藥以濟世壽八十有一

著有硯香齋詩集于志

沈大成字集元工詩古文詞為名諸生與邑中黃退庵吳

江郭頻伽友善年未四十齋志以沒郭頻伽為作墓誌

銘載在靈芬館集中黃退庵為哀輯其遺詩稟八卷其

門弟子黃安濤因取釋漱冰汪芝亭諸人遺稟合以刊

之為慰託集于志

錢濤字雪山錫陞子生五十日失母祖母撫之十歲祖母

沒濤以父哀毀嘔血恐重傷父心恆向壁飲泣不令父

見時已能詩有神童之目登岱云絕頂鬱崔嵬登臨氣

壯哉老松千榦鐵響瀑半峯雷但覺雲生腳真看海似

杯仙居應咫尺羽翼上瑤臺暮春書事云小院靜如許

苔痕一徑通人歸花落後春盡客愁中鳥語深叢綠簾

窺夕照紅高樓誰擲笛催月上牆東西湖懷韓忠武云

滿湖秋水碧灣環相見當年此閉關戰伐餘生驚白骨

英雄末路有青山魂消雪窖天仍遠夢繞龍沙月自寒

老驥由來悲伏櫪那禁閒客淚潛潛諸詩風格不減夏

存古其佳句尤多郭頰伽采入靈芬館詩話年十六投

纒死蓋逢崇也有雪山手蹟一卷未刻于志

徐建字雲臺嘉慶甲子舉人官鄞縣教諭與諸生講學論

文處事公正曾與修善邑志著有菽香齋詩文集卒年

八十于志

顧之芳字芬圃號蔚衡學問湛深晚年居鄉里約同人補

種四香亭梅花名流題詠與白下侯雲松郵筒倡和尤

夥著有閒耒草堂稿楓水詩存

顧煥號孝若廩生讀書自勵才名蜚郡邑粵匪犯境被擄

不屈死所著壽花館詩稿并輯楓水詩存楓溪小志

戴兆芬字誦清號臥雲工篆隸善竹梅雜品舒位瓶水齋

詩有題其仿陸復紅梅卷極稱賞之子公望字又黃亦

工寫生梁章鉅開藩吳郡收名蹟必畀品評嘗得惲壽

平小像一幀以神似公望遂贈之公望摹并所刻寶惲

帖首錢塘陳文述著畫林新咏中一絕云畫派甌香有

盛名煙霞持贈亦怡情壁閒一幅廬山瀑深夜疑聞漱

玉聲指公望也詩名近遊草夜航歸棹集楓溪小志

倪以植號默卿性孝友居喪三年不御酒肉鄉薦不售遂

棄帖括矢志經學考據精淹著有四書諸說異同考易

說異同考斜塘竹枝詞銀籐館集新纂

柯萬源號小坡諸生四歲能辨四聲稱神童詩賦秀麗驚人
 人以投醪賦受知山陽汪文端病小學廢置授經宗陸
 氏經典釋文匡謬正俗學者翁從駢語矩矱唐賢於王
 輔文為近著有杏花春雨館詞墨磨人齋集陳迦陵四
 六注周易名物類考禮記鄭陳異同考新纂

孫元琦字白軒幼穎悟塾師授以唐律一再誦即能規仿
 及長名噪黌序厄於科名老以教授終詩近香山劍南
 有清芬館詩十卷黃太守安濤為刊行新纂

顧乃德字碧堂未弱冠受寶學使知入學善治經總諸儒
 說舉大義文有本原黃安濤贈詩云時流只作尋常看

誰信千秋史筆傳卒後郭麐誌墓新纂

朱殷字穆卿善畫工刻石勤學強記有穆卿詩集新纂

沈丹培號黻堂庠生弱歲工綴文嗜韻語隱居邑北鄉名

南沈課耕把卷養親教子其師黃安濤序其詩羨厥幽

居為寫野趣蕩隣夏墓蓮花闌紅村接陶莊柳陰環碧

食舊德服先疇非塵壒所能濁云請業詩娛室幾三十

年著青箱館詩真有益齋文集

奚大綬字印維府學廩生九歲誦三都賦三日成誦詩文

頃刻千言屢薦不售卒年僅二十七著有紅豆山莊集

湘江吟楚遊記畧楚遊雜記魏塘人物志

孫黃鐘字萬元副貢生博覽羣書臨事尤勇於義

魏塘人物志

柯復銓字掄英讀書過目成誦性孤冷不妄言詩見師竹

社稿

魏塘人物志

孫玷字六研國學生乾隆甲辰恭逢

臨雍盛典呈

獻詩册

恩賜金帛阮文達公撫浙延司關權有

暗以金者卻勿納客至瀾茗色甚黝客笑過儉曰物力

不可不惜也性嗜古游秦晉輒於山谷訪搗碑碣藏行

笥書法香光

新纂

黃愷鏞字楠蔭愷鈞同懷弟讀書日百行愛讀少陵歌行

吟諷中節嘗與友人論詩書云太白謂寄興深遠五言

不如四言七言又其靡也四言自三百篇外如韋孟諷

諫等作味同嚼蠟後人模擬幾如優孟衣冠若欲超然

復古非學五古不可近日言詩戶有隋珠然大率喜為

七言小律詩限以四聲倡和雷同試叩以風雅源流如

墮雲霧此詩教所以愈晦也僕欲矯此弊非曹劉陶謝

陳正字張曲江李杜王孟韋柳之詩不讀非古詩不作

非謂近體可廢蓋欲存古學於萬一也持論足以鍼浮

砭薄著有書耕堂集三卷

慰託集

汪繼熊字芝亭世服良賈年弱冠學詩黃退庵多識江浙

知名士凡左顧魏塘者繼熊必為申款洽焉晚年養疴

虎邱山館已瀕綿憒猶事吟哦著有聽香館詩五卷

新纂

黃若濟字子未愷鈞次子由國子監生入貲注布政司經歷銜年十三五經成誦不樂為制舉文專嗜韻語別有會心嘗讀唐宋人詩於白香山諷諭中母別子句云但願將軍重立功更有新人勝於汝評曰願字若易恐字似較溫厚又於張乖厓聞鷓鴣句云北客南來心未穩數聲相望在前村評曰宋不如唐病在說盡此詩落句若易雨昏花落又前村覺有餘韻矣其細心率類此嘉興鴛湖吟社以木棉四詠命題汪布衣澍所作同人折服及就品騰則置乙等汪疑之復質子未曰詠物詩宜

體物情狀細意爬梳出以風人口角方為合作若專以寓情綿渺為長則彼此厮賴得去矣汪乃服又精岐黃術自以濟世多活人故以百藥山房名子二稻孫杞孫俱邑庠生杞孫字丹秋從人辟佐為書記行楷逼近松雪詩有家法並能於十八顆松子刻多心經儼然率更筆意尤為絕技云

真有益齋文集

錢維翰字琛卿廩生嗜學有逸才為文豪邁試輒高等萬學使青藜首稱之薛宰時雨觀風試以郭子儀李光弼合論謂得蘇家父子神髓平湖黃金臺震澤蔡召棠耆儒宿學至呼為小友爭器重之著愛日吟詩草四卷湖

濱雜詠百首庚申遭亂以太素脈為餬口計卒鬱死新纂

許王勳字秋沙恩貢生汝璜父早歲工制藝派宗雲間疊

試優等然躡省闈喟然曰項羽敗嘗言非戰之罪余適

類之喜為詩近北宋名家與華亭袁雲崎同里黃丹秋

輩相唱和優遊桑梓推為祭酒新纂

鍾漑字澹齋慶槐父選拔貢生指分山西直隸州州判早

歲與黃霽青東莊讀書晝夜攻苦於五經箋疏能通大

畧駢體文宗南北宋清利婉轉如其意所欲出新纂

周爾墉字容齋道光乙酉科順天副榜官至工部虞衡司

郎中居官廉靜娛情翰墨尤長於書出入歐虞官京師

時與昆明趙光齊名凡執贄門下得其筆意者無不以

金八法噪都下零章片紙咸珍惜之新纂

丁大椿字頤庵善詩文工書法又精岐黃年十九舉嘉慶

癸酉鄉榜大挑授象山教諭勗諸生以文行後俸滿將

去象山都人士上化育兼施額頌之長子廷鸞癸卯經

魁大挑為江蘇知縣卒新陽任書學率更令與季弟家

駿俱以楷法紹父名家駿丁卯舉於鄉考取內閣中書

踰年歿新纂

鍾文烝字殿才少負異稟即通小學年十二應邑試冠其

軍道光丙午鄉薦再上春官以知縣注選歸絕意仕進

日事著述同治年入江蘇忠義局與長洲陳奐平湖顧
 廣譽同任編纂主講敬業書院十二年崇尚經學尤究
 心春秋謂穀梁子獨得麟經遺意楊注范疏於本傳無
 所發明網羅折衷成穀梁傳補註一書若禘祫祖禴諡
 法數大端實事求是共成二十四卷沈潛反覆二十餘
 年始出問世少年撰述有論語序說詳正鄉黨集說備
 考河圖洛書說各一卷均以婺源江氏為宗甲子後手
 自讐勘存者有乙閏錄四卷新定魯論語二十篇新纂
 金銓字秉三幼孤而敏下筆成誦厭棄舉業師事查丙唐
 入閩阿制軍幕時林文忠在撫廨相訂為莫逆交互證

於經世之務泊黎襄勤督南河宣防事棘聘之司章奏
 凡所策畫當上意黎為納粟入官司筦鑰昇帑
 數萬任塞決家雖斷炊不染絲粟黎倚重之年六十餘
 以子得官棄職就封居禾中數年與陸費中丞瓌沈觀
 營濂朱修撰昌頤為九老會文酒從容杖履養望平生
 善書得趙董神韻詩宗香山劍南有重九短古云應門
 老隸耽風雅種菊披籬足千朶不是人同花性情何能
 冷寄荒籬下張芥航河帥見之曰我國有顏子而不知
 此吾過也其為名公激賞如此新纂
 莊心鑑字其淵由舉人大挑選武義縣教諭未赴任卒早


失怙稟母王氏訓安貧劬學舉道光乙未孝廉時漕無
 定章紳士挾持致釀巨案禡革多人心鑑受母誠獨不
 被株連晚年精醫暑月就診鄉人恆駕無篷舟來卽持
 傘蔽日乘之去無難色貧者更酬藥資存心濟困時摘
 醫要手錄之曰祕旨真傳新纂

羅燦然字廣齋廩生熟精註疏衆推經師學使者歲科試
 經解不攜隻字輒冠曹偶授徒課嚴每講書設高座廳
 事合環立竦聽塾規肅然故遊其門者學皆務實新纂

汪棻字香木廩生授徒終身掃頭巾氣考究文字條分部
 類立一二三一中木禾丫入火八人八又十、乙乙

目丁又人大厂以L J 心口口口口口爲部推廣編
 排以形爲主以音義註釋之名曰文字源流新纂

程光熊字蓮壽 恩貢生富陽訓導訓士勵學工篆隸旁
 通醫著有篆隸指掌知足知不足齋詩草新纂



嘉善善文苑
 嘉善善文苑
 嘉善善文苑

... 嘉善縣志 卷五十五 ...

隱逸

明

袁仁字良貴父祥祖顯皆有經濟學仁於天文地理歷律書數兵法水利之屬靡不諳習謂醫雖小技可以藏身濟人遂寓意於醫崑山魏校疾召仁使者三至弗往謝曰君以心疾召當吮咀仁義炮治禮樂以暢君之精神不然十至無益也校疾愈訪仁與語三日大驚遂定交顯有春秋傳三十卷祥有春秋或問八卷以發其旨仁復作鍼胡編以闡之兩浙名賢錄譚稷字舜臣幼有慧性讀書窺大旨不尋行數墨汎濫百

家史傳尤精於字學聲韻點畫細析牛毛身居市廛超

然遠覽自號西窗居士著金鈴子一卷一螺集譚處士傳

郁鉄字民威父瑾手植四槐於門稱槐里鉄性伉直以詩

文自豪晚築小圃郊外植梅數株駕小艇遊泛其間陸

簣齋邛過之曰倚蘭水仙請為先生鼓之年八十二終

袁志參嘉善楊志

陸繼鉉字默如方頤廣額目光如寒星少遊鬢序有文譽

或勸之投謁有司鉉引袂起曰富貴易令名難也嘗登

燕子磯眺覽江山風物有愴然遺俗之意歸未幾而歿

女夫錢繼章負土治窳崇馬鬣而封之嘉善楊志

王屋字孝時初名畹少傭書過目成誦作詩多奇句邑諸

生顧艾邀與居艾字病已博學善詩文以行誼重介屋

於魏大中魏讀其詩特起揖推重魏罹難兩人各作長

歌哭送隨護千里屋雖布衣慷慨有氣節明季賊陷秦

晉首倡助餉其詩類劉改之詞學辛幼安同時有沈蔚

字仲涵諸生刻苦潛修著兵法歷法等書魏學濂痛父

兄慘死立衣食禁自繩并授三人令規其失蔚尤切直

年未壯即棄舉子偕屋隱先屋卒樵李詩繫參靜志居詩話嘉善楊志

毛士俠字和仲少入場屋一試不售輒棄去放情詩酒奉

老母課幼弟脫去俗累以樂其志堂右枯竹生枝期年

而成林謂人曰嵇阮復生樂此不疲矣

陸守敬字心明少孤自立不苟言笑讀書至老不衰同時

孫應文字懷用沈文標字元嘉丁嚴德字韶石俱志節

高尚不求聞達

朱元鼎字珍兮幼受知於陳赤石補諸生後從遊南嶽沅

湘歸卽屏跡園居詩筒茶竈別無長物侍郎曹勳每稱

其清泉白石支頤高詠得塵外逸致從弟楚翹字赤城

栽花百餘種委棄世故人亦稱其高簡云

以上嘉善楊志

何浩然字希孟諸生國變後高臥邨野畱意星卜之學所

居一室惟著草瓷爐酒瓢詩篋而已戴季華字元樸性

嗜學永夜爇薪苦吟婦農家女機杼佐讀季華自題我

眉散人書於墓碣著有戴氏詩譜昭往錄張翼字羽升

熟韜鈴技勇絕世與浩然友知天下將亂崇禎初遊三

山不知所終

橋李詩繫參吳志嘉善楊志

孫點字公撰祖母黃一百四歲奉事極孝性嗜奇究心元

理遊豫章諸名山訪旌陽遺跡走新安探朱子講學處

徜徉白嶽黃山間閱數載徧歷會稽禹廟天台鴈蕩以

歸杜門不出

嘉善楊志

沈德孚逸其名隱於農衣敝履穿不爲困少嗜老莊乾竺

書後棄去一意探索朱程施約庵張考夫極相引重足

不入城市惟講學一出會畢竟去 嘉善志

沈濡字子雨九歲喪父事母孝屏跡林泉以讀書敦本課

子孫足不履城市者四十年李應文字鏡溪佃儻多才

會明季不樂仕隱居白牛邨敦名節不入城市子友桃

讀書能承父志 嘉善志

國朝

唐嶼字子玉庠生崇禎年土寇竊發由嘉善遷善鄉移居

新豐鎮姚家罅漏賃田舍三椽市隱終身巢端明褚廷

瑄兩孝廉稱莫逆交時褚居褚家埭巢居黃墻里距新

豐僅一舍許投贈翰墨畫蒼潤沈着神似李太僕胥山

樵叟華亭董其昌與嶼三世結契題其小像有少負雋

譽天機鏗宏時為元岳之游飽茹煙嵐之致語其秀逸

可想見 唐氏家譜

曹鑑微字念劬魏忠節外孫不慕榮利順治癸巳遊邑庠

旋棄舉業與魏允札魏圯為世外交結夕陽吟社好事

者繪柳洲三老圖以傳嘗詠懷云縱有奇窮當固守莫

因饑餓懈操存著有南村丈人集 于志

錢洽字西江黯曾孫性清介不慕榮利詩酒外無他好布

衣潘佳晴詩人也謂洽詩清真雋逸有元白風致洽亦

自負舊居梅花里以城市為囂攜家白水塘依祖墓以

嘉興府志 卷五十五
屋茆居數椽琴書自適日與村翁野老遊或有顯者過
訪輒踰垣去生平著述多散佚董柴如蘭集所選亦非
其得意者

伊志

藝術

明

顧孝淵昆弟三人仲恂季愷皆以孝友稱孝淵善草書居
武塘號雪樵從事藩府以註誤遷文安卒恂奉其骸骨
歸葬鄉人哀之滕杲字宏甫山水花木妙絕一時晚居
禪舍絕酒茹素臨終曠然若有所得周振藻字肅陶諸
生工詩書法入晉唐人之室鮑嘉字公受善寫照閩人
曾鯨授沈韶韶授嘉能傳人性情意態著有傳神祕旨
嘉善章志參
楊志戈志

錢安字以甯精究脈理治病如脫子雲字時望精於傷寒

嘉興府志 卷五十五 嘉善藝術

御史春父也後有潘元與雲齊名馮喆字克順長傷寒帶下二症人呼多吉先生子愷博覽醫籍孫科亦工醫

兼善詩字 嘉善于志 參章志

袁澤字世霑精痘疹當痘時每至一村集羣童閱之曰某何日出生某何日出死無不驗子樸柏咸繼其術有馬菊南與澤齊名郁光始字涵春痘證察色一見而決子國英亦以痘症行張逸字泰庵通素問脈訣綱目痘症方脈皆精後有張世顯字寰泉治痘應手立效子文光字幼泉文衡字觀泉能傳家學父子皆年踰八袞 嘉善章志

參楊志 戈志

孫復吉字見心與王冑堂往復參究精其術高隱字果齋從王冑堂遊得其祕奧冑堂醫書六種皆參酌采輯療疾多奇效年九十餘如少壯同時卞模字儀皇亦能起危疾

劉覽字月梧父性良號仰松精外科授太醫院吏目覽事親孝益精其業雲間陸慶紹母奇疾治之神效饋五百金卻之董其昌陳繼儒延譽授太醫院御醫金元德字鍾梧善醫授太醫院吏目張萬春字復泉治嬰孩神效里中有孺子啼張入室灌藥卽歡笑壽九十六授冠帶醫官丁鳳梧字敬山精治無名腫毒壽七十二授太醫

院吏目張丁子孫皆得其傳以上嘉善楊志

朱績字君永治病決生死百不失一遇疫症績至輒愈活

人無算性至孝割股救母親族貧乏者自周給不可勝

數子焯太學生世其業沈篋字叔璉業岐黃貫通醫術

事親孝兄弟雍睦凡診治遇窮乏者濟以藥餌且推食

解衣焉舉鄉飲賓子廷楨有傳

顧朝陞字贊勿善撲著決馬世奇入翰林周宗建罹瑞禍

不爽金文迷字五雲精堪輿多奇驗以上嘉善楊志參弋志

國朝

金鈞字上陶少孤遇異人以醫術授精其業性孝事母以

色養親族貧乏者時周給之著有素靈廣註醫案日鈔

年八十乾隆元年

賜八品頂帶壽至九十而卒伊志

沈又彭字堯峯少習舉子業以國子生三躋鄉闈遂習醫

治輒效不計利有鄰人子瀕危憫其母老無他子會維

揚醮賈以多金聘乃惻然曰此子非我不活忍以嗜利

而令人死且絕乎卒不應所著有醫經讀傷寒論讀女

科讀治哮喘證讀治雜病讀諸書識者謂多入理深談能

發前人所未發者子潞字鏡塘乾隆乙酉舉人亦精醫

學活人無算著有敦仁堂醫案孫圖棻字素忱歲貢生

亦善醫能世其學

伊志參于志

鄭崗字玉蟾諸生醫喉立愈子春回繼業歲大疫食油菜

者患咽喉多不治春回療之皆驗著有喉科源遠集

伊志

沈泰字安洲諸生精醫療人疾頗效工詩有晚香吟草

伊志

張昂字方暉諸生萬春六世孫精脈理決人生死多奇中

有一少年貌甚肥就昂醫昂切脈曰汝速歸是夜竟以

暴疾亡又治一婦昂曰復發不治如期果驗

伊志

張應誕字讓齡諸生精醫有官家女病幾危延應誕治之

甫至而氣已絕應誕切其太谿之脈曰疾可爲也卽以

熱水貯盆中熨其胸取所煉丸灌之隨嘔六七枚狀如

鵝卵應誕曰此唾絨未盡爲痰所裹也復藥之立愈

伊志

閔如愚字眉卿諸生精天文地理有奇驗名振一時著有

地理盤鍼圖說地理元空說干支卦爻說

于志

黃世樞字則含工繪事性廉潔非至交不與寫照畫神佛

勃勃有生氣嘗於羅星臺畫關帝一幅人以爲能鎮邪

崇病家恆請懸之室晚工青綠山水人咸珍之年八十

一卒其徒陸春堂寫照亦極神肖有名於時

于志

孫友金字傳慶邑增生嗜學工詩文兼習岐黃以濟世善

書宗董文敏一時罕有其匹

于志

戴公望字又黃官江蘇理問工詩兼善山水非佳紙不肯

渲染著有近游草夜航歸棹等詩集三卷于志

曹塏字容照幼從族祖文指授丹青遂臻精詣乾隆丁丑

壬午兩次

聖駕南巡供奉畫繪塏亦與焉橐筆所至爭相延致性醇謹不

競時名以是坎壈終其身于志

魏正鎧字震來忠節五世孫生有夙慧未弱冠補博士弟

子員後棄舉業徜徉山水間寄托高遠善畫山水尤長

於梅兼工古篆鐵筆著有冬木詩存等集于志

全福謙字受伯庠生家藏唐宋元人未刻遺書數種時時

抄錄分贈後進篆刻絕精識者珍惜比於金冬心云于志

魏正錡字子湘庠生正鎧弟博通今古書畫篆刻無不精

妙著有鴛水輯聞水檻叢談壺中故事清涼庵詩鈔石

如詩筌等集于志

張源字中照通岐黃尤精痘疹決生死無不驗所著有痘

科正宗續集藏於家未付梓子汝桂克繼其業早世于志

姚慎樞字敦行仁安子世習醫求治者闐門雖遇危症投

劑輒愈暇卽以丹青自娛翛然獨寄著有脈按三卷于志

王坦字履安得閩中曾氏之傳於寫照尤擅場神情逼肖

一時士大夫影神盡出其手于志

蔡廉字思韓遇異人授神仙術以符水刀圭療疾有橘井

風人呼爲七仙

新纂

唐汾字松舟太學生善仿名人手跡逼真隸書方勁追漢

魏兼精篆刻性尤孤介

新纂

錢柱人字此生後改名菜邑增生天材奇特詩法山谷東

坡畫兼寫生山水書法亦佳

魏塘人物志

孫友金字傳慶增生書宗董文敏錢侍郎樾亟稱之

奚廷瑜號竹厂諸生山水秀潤與杭州奚鐵生齊名時號

二奚

施家懋字勗齋工山水善於用墨

蔣山字仁如號姑射庠生工琴與杭州李玉峯郡城夏鷗

筋往來詣益神著有琴譜易知五卷其初習琴也以父

有足疾爲此博親歡是技而進於道也弟州以善書名

以上均見魏塘人物志

黃壽湄字菊泉善花卉師錢塘蔣敬出入新羅白陽之間

新纂

沈潮號蘆舟善山水師奚竹厂并善鼓琴

新纂

張仁錫字希白初爲江南青浦人後居嘉善以儒術爲醫

精於診切著有痢症彙參四言藥性奪錦瑣言醫案醫

說等書雁粵寇之燹弟子吳炳存其稿待梓

新纂

高隱字果哉精於醫受業王官堂治病多奇效有醫論廣

見及雜症等書行世俞東扶古
今醫案按

錢嘉鍾號雲庵由庠生報捐州同為人誠篤謙和精軒岐

甘石家言習青烏術者多從之游尤熟悉水道源委同

治三年命圖禾郡沿海洋面開方計里撰有圖說計所

著有七縣海塘圖六壬兵占奇經八脈考奇門彙考六

卷繙譯名義摘要四卷藥性分經農閒撫筆新纂

陶之金號東圃諸生長山水花卉竹石楷書臨張照尤為

通肖墨香居
畫識

王燦號野亭僑居楓鎮喜仿袁尙統間作人物樹石雅有

卷軸氣墨香居
畫識

許從龍字佐王居常熟官通判山水花鳥得宋元法釋道

不資粉本有所繪五百羅漢像藏虞山畫史彙傳引
常熟縣志

曹佳應號子瑞習堪輿家言著有地理入門二卷傳子錫

瓏號聲和錫疇號佐虞均宗元法兼參三合瓏著徵驗

圖攷一卷殉粵匪難疇著地學摘錦地理枕祕選擇簡

要並精算術新纂

金淦字仿山諸生善書旁通隸篆工鐫印得秦漢人法新纂

嘉善善流寓

嘉善府志卷五十一
流寓
明
夏尚字秀爵世家慈谿至其父始遷仁和宣德間縣學新
設缺弟子員尚自仁和諸生來補正統乙丑登進士授
刑部主事進郎中陞南京大理寺卿尚博學強記詩文
書法冠一時晚營巢居閣于西湖所著有瀛嶼稿家禮
若干卷

流寓

明

夏尚字秀爵世家慈谿至其父始遷仁和宣德間縣學新
設缺弟子員尚自仁和諸生來補正統乙丑登進士授
刑部主事進郎中陞南京大理寺卿尚博學強記詩文
書法冠一時晚營巢居閣于西湖所著有瀛嶼稿家禮

若干卷

王整撰墓志

陳國是字與同南直華亭人入籍嘉善萬曆甲戌進士歷
官郎中出知寶慶府有紳某罹眾怨揭竿而起者千人
國是諭以威信即解散有諸生蕭某聘而未娶江川王

怙勢欲奪之生陳寃王以書來國是立呼鼓吹為生成

禮配焉時久早禱之立應轉廣西副使歸子元壽字鑑

先崇禎丙子舉人從子甲字九先萬歷癸丑進士歷官

南禮部郎中 嘉禾徵獻終

國朝

朱道聖字文石休甯籍僑居魏塘薦饑捐貲設賑贖閩越

虜婦冬夏施絮帷金士維字君範徽州人嘉興府學頌

圮士維潛往捐金不登姓氏當事廉其名勒之貞珉又

有陳應孫字明彝亦徽州籍為人愿慤敦孝友首捐五

十金倡修郡學 嘉善崔志

程光祖字宏先休甯人五歲而孤事母孝晨昏溫清不失

時刻母病目不交睫母沒哀慟屢絕歲除臥墓傍天明

拜謁乃返生平急難重義尤篤宗誼周濟無吝色卒徐

元文銘其墓何業成號建三原籍徽州寓清風涇自幼

敏慧好學不屑屑習章句欲作五嶽遊以母老歸侍親

沒廬墓終身 嘉善崔志參戈志

張光曙字淇園雲間人祖父仕宦有政績光曙幼孤寓斜

塘鎮徙居梅花庵工書善詩詞與李煒毛蕃魏坤蔣廷

棟往來倡和刻有硯北齋詞三卷行世

葛道明字元亮自績溪遷杭養親贍族不私所有以嘉善

風醇俗美遂留居焉子寅字畏庵中癸未武進士點侍衛授江南提標遊擊引退後囊橐蕭然工書畫以自給凡邑中公舉皆殫力從事著有書畫苑以上吳志

錢士清字耕山蘇郡諸生博覽羣書精岐黃術留心內養

自號耕道人僑居魏里嘗寫蘭竹自娛年七十七無疾

終及門錢以坊等建塔于旌陽道院旁著有傷寒合璧

松窗雜咏等書嘉善志

施椅字楚望諸生華亭人祖大經父沛俱清白吏載松江誌名臣傳椅年十三遭父喪有盜入室家人盡逃椅獨

撫棺哭盜稱小孝子而去鼎革後徙居莘川文水濛側

一室圖書寢食坐臥其中自號書龕所著有尙志集書

龕集又有勸孝曲三十二闕伊志

陶爾穉字穎儒青浦人康熙進士官上虞令擢葭州知州

以病乞歸卜居邑之四十區著有遵渚集鈔青浦縣志

程孫濟字元楫上海諸生僑居邑之環整坊博洽工詩詞

與李永祺輩結社倡和著有春雲集寶善堂詞長嘯吟

諸刻伊志

沈廷芳字畹叔仁和人父宰文昌被累戍甯夏母查居邑

之西城園廷芳每歲南北省親極行路之苦乾隆丙辰

舉宏博授編修改御史出為山東按察使矜慎庶獄人

自不寬尤好獎掖後進為風雅宗著有理學淵源十三

經注疏正字經義攷隱拙齋詩集行世族姪維材字楚

望海甯諸生嵇文恭曾筠建節兩河聘入幕一切箋奏

多出其手後來魏塘卒于寓有樗莊詩文稿十卷

伊志

查開字宣門海甯人贅于魏塘即家焉著有吾匏亭詩集

晚年取其伯慎行補註蘇詩及施王兩註正譌芟複為

蘇詩三家合註未刻卒繼配錢氏亦工詩有桐花閣詩

稿

伊志

查虞昌字鳳階海甯人父祥翰林虞昌乾隆甲戌進士授

戶部主事告養歸掌教魏塘後以郎中出為江南池州

知府歲祿辦賑全活甚眾以疾去官居嘉善城熙甯橋

構數楹顏曰息廬著廿三史攬實不若園雜俎

伊志

章輅字乘殷世居富陽少遊邳睢間習河務能隨地隨時

相機應變由從九品歷升至山東運河兵備道有白著

年譜一卷備載其治河方畧可為後法後以積勞回籍

調理卜居嘉善庚子

翠華南幸

特遣太醫往視蓋異數也卒年八十有五今子孫入籍嘉善

于志

袁秉鈞號竹田世華亭人與弟秉直遷居嘉善由考職主

簿分發河南宣力河壩以勤慎稱擢中河通判迴避調

山東上河通判歷著勞績引疾歸做廬數椽僅足容膝
時弟秉直方觀察嘉湖秉鈞恬淡自若門無私謁與人
交謙厚自持絕不以貴介上人也平生愛臨池索書者
常滿戶外至老神明不衰里黨皆稱爲篤實君子云于志
郭慶字祥伯吳江附生遷居嘉善著有靈芬館詩文共五
集詩話雜錄金石例補等俱已梓行又輯唐文粹補遺
二十六卷弟鳳字丹叔時與兄聯牀嘯詠不慕榮利于志
袁秉直松江人由縣丞分發浙江以功能擢至江西布政
使密禁州縣浮勒吏胥苛索而刁劣衿棍亦不能藉端
挾制其平生馭下明而能恕務使各盡其長人樂爲用

以通政司參議歸老嘉善子斯鳳官河南黃沁同知于志

談承坤字厚載號榕亭德清人僑居嘉善倜儻有才畧屢
任丞倅奉職循謹尤熟悉宣房擢黃沁通判兩辦大工
因革利弊北岸無漫墊患以病乞歸鍵戶不問外事菽
蘭種竹詩酒自娛卒年七十四歲于志

